

# JESUCRISTO PIA PEXEINYA DIWESI JUME TATSI JUAN PETINAE DIWESI

---

Meje yabara poxonae Mesías jiwi forotatsi, pon pewun “Pejume”, baraichi

**1** <sup>1</sup>Poxonae cataunxuae daxita nacuan jopa forotsiyo, bapoxonae irun caena bayatha Mesías popona, pon Nacom Pexanto tatsi, pon pewun “Pejume”, baraichi. Bapon Nacom caena bayatha barun poponeiba. Bapon apara bara Nacom. <sup>2</sup>Poxonae aena copiya, bapoxonae bapon caena bayatha Nacom barun popona. <sup>3</sup>Nacom cana exana xua Mesías daxita nacuan foforota. Dapocotsiwa aibi xua yaseicanaya xua pocotsiwa bapon jopa exanaeyo. <sup>4</sup>Bapon Mesías, pon “Pejume” baraichi bapon asun cana exana daxita jiwi tsipei bapon ataya xeina peasun coyenewa. Matautano bapon pena juntu coyeno cana catsiya taexanano jiwi xua jiwi yaputaena po coyene pexainyei coyenewa. <sup>5</sup>Icha pecoicha ichi xua jiwi yaweinchi xua beta pejinompaenexa poxonae quirei, bara juta ichi Mesías. Bapon jiwi yaweinchi xua beta xanepanaya pejjinaponaenexa poxonae bapon Mesías cuiduba jiwi. Caurimonaе pia pentacaponaein tatsi bequein ichichipa xua Mesías peamanayabiwatsi, ichitha caurimonaе pia pentacaponaein tatsi jopa itacupaetsi xua Mesías peamanayabiwatsi tsipei bichocono Mesías peayapuswa xeina.

<sup>6</sup>Bapoxonae irun Nacom itoroba pebin, pon pewun Juan. <sup>7</sup>Bapon patopa xua Mesías peyabara paebinexatsi, po wun xua jei “Pon Nacom itorobica”, jei. Bapon Juan daxita jiwi juntu coyene cui tsacaraba xua jiwi Mesías pewunaeya tatsi, penajuntu cui wunaetsinexa xua daxita jiwi Mesías pejume cowuntsinexa tsainchi. <sup>8</sup>Juan apara Mesías aibi. Apara saya pia Mesías wunaе yabara paebichi xua Juan peitorobixaetsi baxua. <sup>9</sup>Bapon Mesías patopeica po cae pin nacuathe tsique peyawenaenexa daxita carepaya jiwitha pia pecuidubi coyenewantha.

<sup>10</sup>Bapon popona barapo cae pin nacuathe tsique. Bara bequein bapon exana pia coya barapo nacue, po cae pin nacuathe tsica pona, daichitha

barapo cae pin nacuathepiwi jopa Mesías yaitaetsi po coyene xua bapon po cae pin nacuathe tsique forota daxita. <sup>11</sup>Bequein bapon bara pia nacuathe patopeica, daichitha barapo cae pin nacuapiwi bapon jopa weiweinaya matenta wabichi. Matautano jopa yaputaetsi xua po coyene bapon Mesías apara pon Nacom itoroba. <sup>12</sup>Ichitha ichamonae pomonae bapon matenta weiweinaya wabatsi xuano xua bapon jume cowuntatsi, barapomonae Mesías cana exana xua po coyeneya barapomonae Nacom piamonae tatsi penaexanaewa tsane. <sup>13</sup>Tsipei barapomonae jopa naexanaeyo Nacom pia pexui xua poxoru be jiton coyeneya penaexanumenaponaexae. Matautano barapomonae jopa naexanaeyo Nacom pia pexui xua poxoru pebin peichichipaexae xua pepichiwa piowa. Matautano barapomonae jopa naexanaeyo Nacom pia pexui xua poxoru coxiyũn peichipaexae xua pexeinaewa pia pexui. Saya jame barapomonae Nacom pia pexui tatsi naexana, tsipei Nacom cana exana baxua.

<sup>14</sup>Barapon Mesías pon pewũn “Pejume”, baraichichi, bapon poxonae naexana po cae pin nacuathe tsique bara bapon yatsicaya pepa jiton. Matautano naca barũ popona bapon. Bapon wũn ununatatsi “Jesús” baraichichi. Matautano bapon pejuũntũ coyene wetsina bichocono jiwi antobetsi. Matautano bapon xainyeya pepaebin. Matautano paxan pacui tan xua Jesús exaneiba pia pexeinya peayapusũwatha po pexeinya peayapusũwa Jesús Paxa catatsi. Bapon Nacom Pexanto tatsi, bara yatsicaya compa tatsi pepa Pexanto. <sup>15</sup>Juan yabara paeba, Jesús yabara paebatsi. Juan jeye: “Bara barapon apara pon bayatha yabara paeban xua poxonae janje: ‘Pon cotacaya patopa xua xan tsiwana patopan, bapon jame bichocono peainya cuin, beyacaincha xan. Tsipei bapon caena bayatha popona poxonae xan aibin xua poxonae abũ cataunxuae jopa naexanaeinyo’, janje”, jei Juan.

<sup>16</sup>Bapon Jesús naca cata daxita pia peyaputae coyenewan. Jopa juniya amanaya naca catsiyo baxuan, xua pocotsiwa nantawenonatsi juũtema watsita jinompaenexa tsane bapon. <sup>17</sup>Moisés naca cata Nacom pia peitorobi coyenewan tatsi. Baxuan bichocono jopa juniya ayapubeyo. Ichitha Jesucristo, pon “Mesías” baraichi xua pocotsiwa naca cuiduba xua pinae Nacom jopa juniya antobeyo jiwi, xuano xua pocotsiwa naca cuiduba bara baxua yatsicaya pexainyei jume. <sup>18</sup>Dapon aibi pon Nacom petaewatsi. Nacom Pexanto tatsi, pon yatsicaewa compa tatsi bapon naca cana exana xua Nacom wayaputaewatsi, paxa imoxoyo pebarũ poponaexaetsi.

### **Meje yabara poxonae Juan pon jiwi Pebautisabin**

#### **Jesucristo yabara cueicueijeichi**

*(Mt 3.11-12; Mr 1.7-8; Lc 3.15-17)*

<sup>19</sup>Judiomonae pomonae ena Jerusalén tomaratha barapomonae sacerdotemonae itorobatsi irũrũ levitamona itorobatsi Juan beya,

xua Juan peyainyabinexatsi xua pejeinexatsi: “¿Xam jintamũnda?” pejeinexatsi. <sup>20</sup>Juan beta nayabara paeba, jeye:

—Xan Mesías apara aibin, pon Nacom itorobicaena, pon wanaca capanenebiwa tsane, jei Juan.

<sup>21</sup>Nexata equeicha Juan yainyabatsi, jeichichi:

—¿Metha nexata xam jintamũnda? ¿Bara xam bapom pon Nacom peitorobi jume pepaebim pon pewun Elías, pon bayatha tupa? jei barapomona.

Juan jume nota, jeye:

—Xan bapon apara aibin, jei.

Equeicha Juan yainyabatsi, jeichichi:

—¿Nexata jintam metham? ¿Xam bapom pon Nacom peitorobi jume nepaebim pon bewa patopeicaena juinya pata tanecuidubinexa tsane Nacom Pejume Diwesi? jei barapomona.

Equeicha Juan jume nota, jeye:

—Jume, xan apara aibin dapon, jei Juan.

<sup>22</sup>Nexata daxita barapomona Juan baraichi, jeye:

—¿Eta pom metham? Tsipei xua pata tanejume notsiwam pata tha xuya tsipaebichi pomona pana nejume caitoroba. ¿Etabe pana nejumichim tsane xua jinya coutha nenayabara paebiwam? jei barapomona.

<sup>23</sup>Nexata Juan jume nota, jeye:

—Xan bapon aparan pon wawan ichaxota ira xuepana susato tsurucuae nacia beya, xua jan: ‘Patsi najuntũ cui coyene wunaere, pon jiwi pia pepa Pecanamataxeinaeinchi nexa pia pepatopae wunaeya tsane’, xua jan ponxaein xua wawan ira xuepana susato tsurucuae nacia beya. Bayatha Isafas pejume diwesitha taneyabara jume cui wuna tsiwanaya paebixae pon Nacom peitorobi jume pepaebin, jei Juan.

<sup>24</sup>Daxita pomona Juan baru cueicueijeichi, barapomona fariseomona itoroba. <sup>25</sup>Daxita barapomona Juan yainyabatsi, jeichichi:

—Icha xam bapon Mesías aibim xuano xua icha Elías aibim, yawa icha xam bapon aibim pon Nacom peitorobi jume nepaebin, ¿nexata jintam cacui itoroba xua nebautisabiwa jiwi? jei barapomona.

<sup>26</sup>Juan jume nota, jeye:

—Xan meratha bautisaban, ichitha ichun beta exanaena beyacaincha xan. Bapon bara bequein painyamonae pia xantha tatsi popona ichitha bapon jopa payaitaem. <sup>27</sup>Bequein bapon nepuna patopaena, ichitha pocotsiwa bapon exana bichocono ainya cui beyacaincha pocotsiwa exanan. Bichocono pin ura tsita xeinan xua tataxu mũ isanaxubiwa tsane pia penataxu xatatsiwa tatsi, jei Juan.

<sup>28</sup>Daxita baxuan Juan yainyabatsi ichaxota po tomara pewun Betania. Barapo tomara eca icha pocotsiwa xometo weecoina xua icha muxunenetha eca Jordán mentha. Barapo muxunenetha Juan bautisaba jiwi.

**Meje yabara xua poxonae Jesús pon “Cordero”, baraichichi**

<sup>29</sup>Icha mataqueitha Juan tane, Jesús tainchi xua Juan pexainya tarenatsi. Bapoxonae Juan jiwitha jeye: “Incane pataema pon pejúntu coyene xeicaein pon Nacom itorobica, pon ‘Cordero’, baraichichi xua oveja pebto penún. Apra bapon pon jiwi petsitupaewa tsainchi xua abe pia peexanae cuiru coyenein tatsi icha poxonae ovejiyo ichi poxonae tsitupa jiwi abe pia peexanae cuiru coyenein tatsi. <sup>30</sup>Bara bapon apra pon bayatha yabara paeban poxonae janje: ‘Pon cotacaya patopa xua xan tsiwuna patopan, bapon jame bichocono peainya cuin, beyacaincha xan. Tsipei bapon caena bayatha popona poxonae xan aibin xua poxonae abú cataunxuae jopa naexanaeinyo’, janje. <sup>31</sup>Xan copiyatha jopa yaputaeyno xua Jesús bapon barapara Mesías, pon icha wún Cristo, pon Nacom itorobica. Ichitha xan patopan tabautisabinexa meratha Israel piamonae susato saineiwi xua barapomonae bapon peyaputaewa tsainchi”, jei Juan.

<sup>32</sup>Juan yawa namchi, jeye: “Poxonae bapon bautisaban bapoxonae tan Nacom pia Pejumope tñaxú tatsi xua peitaboco weruneica xua be topiboto yaruneica. Barapo Nacom pia Pejumope tñaxú tatsi, bapon pexantha tapatopatsi. <sup>33</sup>Xan cataunxuae bapoxonae xaniwaicha jopa yaitaeyno bapon. Ichitha pon xua necui itoroba xua jiwi bautisaban meratha, nejei bapon: ‘Taename tajumope tñaxú xua be topiboto tsecae xua peitaboco weruneica, po tajumope tñaxú bapon pia xantha tapatopatsi. Poxonae baxua taename bapoxonae yaputaename xua barapo pebin apra pon jiwi pebautisabiwa tsainchi tajumope tñaxútha. Bapon barompaya pia pebautisabi coyenewa exanaena xua poxonae barapo tajumope tñaxú catsibina pomonaetha pomonae piamonaethaxae. Barapoxonae barapo tajumope tñaxú barapomonae yanaba jinompaeinchi’, jei Nacom. <sup>34</sup>Bapoxonae bapon yaitan xua deta cou apra Mesías, yaitama tan xua poxonae bayatha Nacom netsipaeba. Daxota paca tsipaebatsi xua bapon barapara Nacom Pexanto tatsi”, jei Juan jiwitha.

**Meje yabara xua poxonae Jesús itapeta pomonae  
copiya pomonae Jesús pijimonae tatsi**

<sup>35</sup>Icha mataqueitha equeicha Juan pon jiwi Pebautisabin pecoutha patopa xuano xua pebinbe nacueyatabe puna poinchi ponbe xua pia pepuna ponaewichi jiwanae tatsi. <sup>36</sup>Poxonae Juan tane xua Jesús dawerena ichaxoyo Juan dena, bapoxonae Juan jeye xua Jesús yabara jeichi:

—iPataema apra bapon pon ‘Cordero’ baraichi xua oveja pebto penún pon Nacom itorobica xua petsitupaenexa jiwi abe pia peexanae cuiru coyenein tatsi! jei Juan.

<sup>37</sup>Barapo pebinbe ponbe Juan pia pepuna ponaewichi jiwanae tatsi, baraponbe Juan jume tainchibe xua Juan baxua paeba. Bapoxonae barapo pebinbe Jesús puna poinchibe. <sup>38</sup>Nexata Jesús napatomeicha necota caibeya yawa tanebe xua barapo pebinbe Jesús puna poinchibe. Bapoxonae baponbe Jesús yainyaba, jeye:

—¿Painya eta xuatsi?

Jesús jume notatsibe baponbe, jeibe:

—Pon jiwi Necuidubim, ¿exota poponame? jeibe.

<sup>39</sup>Jesús jume nota baponbe, jeye:

—Anetha, matha pataema, jei Jesús.

Nexata napuna ponabe yawa natanebe ichaxota Jesús popona. Barapo mataqueitha naecabe ichaxota Jesús popona. Jopa nawiyaebe tsipei xometo tabopiya tsanaichaba.

<sup>40</sup>Ponbe Juan pejume taexaetsibe xuano pepuna ponaexaetsibe Jesús, caein pewun Andrés, Simón Pedro peweicho tatsi. <sup>41</sup>Andrés copiya matha peweicho wenawenei pon pewun Simón. Andrés barai peweicho, jeye:

—Paxan pacaxinan pon pewun Mesías, jei Andrés. (Barapo wun yabara caunuta xua jei “Cristo”, jei.)

<sup>42</sup>Bapoxonae Andrés peweicho capona, Simón capoinchi ichaxota Jesús uncu. Poxonae Jesús tane xua poxonae Simón tainchi, jeye:

—Xam Simón Juan pexanto tatsim. Ichitha xam anoxuae newun Cefas tsane, barapo wun Cefas wun jei: ‘Iboto’, jei, jei Jesús. Seicaya griego jume wun ‘Pedro’, jei barapo wun iru jei: ‘Iboto’, jei.

### **Meje yabara poxonae Jesús Felipe wabatsi, iru Natanael wabatsi**

<sup>43</sup>Bapoxonae icha mataqueitha Jesús ichichipa xua peponaewa Galilea nacua beya. Bapoxonae Jesús, Felipe caxinatsi, yawa jeichichi:

—Nepuna ponde, jei Jesús.

<sup>44</sup>Barapon Felipe Betsaida tomarapin, po tomaratha iru Andrés popona iru Pedro. <sup>45</sup>Nexata Felipe Natanael wenaweneichi, yawa Felipe barai bapon, jeye:

—Pebin pacaxinan, pon bayatha Moisés yabara tsiwunae cui tina pia peitorobi diwesi jume coyenewatha. Matautano pon bayatha iruru Nacom peitorobi jume pepaebiwi yabara tsiwunae cui tina. Bapon apara Jesús, José pexanto tatsi. Bapon Jesús pon Nazaret tomarapin, jei Felipe.

<sup>46</sup>Natanael jeye:

—Dapon pebin pon pejuntu coyene xanepanaein Nazaret tomara weya bapana jopa pona. Tsipei daxita barapo tomarapiwi apara peajuntuairuyapubewi, jei Natanael.

Felipe jume barai, jeye:

—Anetha incane matha taema, jei Felipe.

<sup>47</sup>Poxonae Jesús tane xua Natanael imoxoyo caquita pona, Jesús jeye:

—Patopa pebin pepa israelmonaepin, pon jopa jiwi pemuxitorobin, pon xaniwaicha pejume cowantsin Nacom, jei Jesús.

<sup>48</sup>Nexata Natanael Jesús yainyabatsi. Natanael jeye:

—¿Eta ichim xua taneyaitaewam? jei.

Jesús jume nota, jeye:

—Bayatha catainchi poxonae higuera nae tabacatha uncuame poxonae cataunxuae Felipe jopa cawabiyo, jei Jesús.

<sup>49</sup>Bapoxonae Natanael jume nota, jeye:

—Pon jiwi Necuidubim. ¡Apara xam bara Nacom Pexantom! ¡Apara bara xam Israel nacuamonae itorobiya pia pepa Neewatsim! jei Natanael.

<sup>50</sup>Jesús jume nota, jeye:

—Xam nejume cowantame poxonae xua saya catsipaebatsi xua cacataewatsi higuera naetha. Ichitha bexa necotsiname xua exanaein pocotsiwa pexeinya peitupanae tsita itutsiwan, beyacaincha xua saya aunxuae catsipaebatsi, jei Jesús.

<sup>51</sup>Equeicha Jesús jeye:

—Xaniyan paca tsipaebatsi paxam pataename xua Nacom peitaboco saranaxuicaena. Matautano pataename matatsunpiwi xua jujuneibicaena xote tsique taxantha pia taneyawenaetsi. Matautano pataename xua equeicha caibe jujuneibiyaena taxainya weicha, ponxaein Nacom Tananeitapetsin, jei Jesús.

**Meje yabara poxonae jiwi tsinacaetuta pexaewa Caná tomaratha xua penabanaenexa xua poxonae pebin pita pecotsiwa**

**2** <sup>1</sup>Poxonae acoibi po matacabibe yapucaewa, bapoxonae irurü pexaewa tsinacaetuta Caná tomaratha xua Galilea nacuatha xua pebin pecotsiwa pepichixae. Jesús pena tatsi irü baxota natane pewabixaetsi. <sup>2</sup>Irü Jesús wabatsi, irü pijimonae tatsi wabatsi xua penaponaewa tsane barapo pexaewa petsinacaetutsiwatha xua poxonae pebin pecotsiwa pita. <sup>3</sup>Vino mera omeicha mene weranapenta tsipei daxita jiwi apa. Daxota Jesús pena baraichi, jeye:

—Nama equeicha ameneibi vino mera omeicha mene weranapenta, jei Jesús pena tatsi.

<sup>4</sup>Jesús jume nota, jeye:

—Ena, abü bexabü abü jopa yabara neyainyabinde baxua. Canta daxua aichica xua petsita itübiwa taexanaewa, jei Jesús.

<sup>5</sup>Bapoxonae barapowa barai pomonaetha pomona pexaewa carena tsaibi, jeye:

—Moya paexande xua pocotsiwa bapon paca itoroba, jei barapowa.

<sup>6</sup>Baxota iratha ena seis po juruwatobe sayawan. Barapo pin juruwaton barompaya cae juruwatontha tsiniya cincuenta po mera bosibü matabüxüyobe tutu canaupä. Icha juruwatontha tsiniya setenta po mera

bosibũ matabũxũyobe tutu canaũpa. Barapo juruwatontha ba judiomonae mene yaebeiba xua barapo merantha penacobe quiateibinexa xua daxota jopa Nacom petsita najũntũ coyene taxobeibinexatsi. <sup>7</sup>Pomonae pexaewa carena tsaibi barapomonae Jesús barai, jeye:

—Barapo saya juruwatontha pawũnbare mera, jei.

Bapoxonae barapomonae barapo juruwaton wũnba. <sup>8</sup>Bapoxonae Jesús barai, jeye:

—Anoxuae barapo juruwaton tsiwixi pajiwana mene wenore xua po mera equeicha vino mera exanan. Pacaponare pontha pexaewa mata canabane, jei Jesús.

Daxota barapomonae bara baxua exana xua Jesús peitorobixae. <sup>9</sup>Pon mata canabane pexaewa, bapon mene pana barapo vino mera, po vino mera copiya saya mera. Ichitha bapon jopa yabara yaputaeyo xua barapo vino mera xua eta werena metha mene capona. Saya meisa pomonae mene eepacaponae barapo juruwatontha barapomonae yaputane xua barapo juruwatontha jiwana mene nota xua po mera vino mera naexana. Bapoxonae pon mata canabane pexaewa waba, pon pecotsiwa pita bapon wabatsi. <sup>10</sup>Bapon barai, pon pecotsiwa pita baraichi, jeye:

—Daxita jiwi ba poxonae aena copiya matha apata po vino mera mene xeica. Poxonae jiwi ba wenaxuba po vino mera xeica, bapoxonae ba barapo jiwi ba equeicha apatatsi po vino mera be conotha xaexaeca. Ichitha nama xam icha coyene exaname. Po vino mera be conotha mene xaexaeca matha copiya apatame jiwi barapo vino mera. Poxonae barapo vino mera jiwi wenaxuba po vino mera be conotha mene xaexaeca bapoxonae apatame po vino mera bichocono xeica, jei bapon.

<sup>11</sup>Baxua xua Jesús exana Caná tomaratha xua Galilea nacuatha. Barapo pexeinya petsita itutsi coyenewa poxonae xua aena copiya matha exana pia peayapusũwatha. Poxonae baxua Jesús pijimonae cui tainchi, Jesús jume cowũntatsi pijimonae.

<sup>12</sup>Poxonae baxua pexaewa najain weta bapoxonae Jesús pona Capernaum tomara beya. Bapon pena barũ pona yawa peweicho jiwi barũ pona, mataũtano pijimonae barũ pona. Baxota Capernaum tomaratha daxita Jesusbarũ be caentacabiyoobe ena.

**Meje yabara poxonae Jesús aisowa benapuna torobabiya  
pomonae Nacom pin pia botha pecaenaetsiwi  
(Mt 21.12-13; Mr 11.15-18; Lc 19.45-46)**

<sup>13</sup>Tsipei poxoru imoxoyo barapo matakabi tsaneba xua Pascua wũn matakabin daxota Jesusbarũ Jerusalén tomara beya pona. Barapo Pascua wũn matakabin, po matakabin poxonae judiomonae yabara nanta xeina xua pinae caena bayatha pia pamo susato jiwi tatsi panenebiya Egipto nacua weya. <sup>14</sup>Baxota Jesús caxina Nacom pin pia botha pomonae baxota

caenaeta buey duweimonae, yawa ovejamaenaeno yawa topibomonae caenaetano. Matautano Jesús tane xua pomonae ena pexaethopaewantha ichaxota paratixi nantiya nacatsiba jiwi. <sup>15</sup>Poxonae Jesús tane barapomonae, Jesús bapoxonae exana xua pocotsiwa xota cuainta xua duwein peru muto. Daxita barapomonae Jesús Nacom pin pia bo wenapuna torobabiya. Yawano Jesús muxuna itaweta xua barapomonae piawanxae, bueymonaeno, ovejamaenaeno. Pomonae xua ena pexaethopaewantha xua ichaxota nantiya nacatsiba paratixi Jesús iratha tabebai paratixi, yawa irabe tayebabareca torobabiya pexaethopaewan. <sup>16</sup>Pomonae baxota caenaeta topibo, Jesús barai barapomonae, jeye:

—iDaxita baxuan panore barapo Nacom pin pia bo weya pocotsiwan pacanaetame! iBarapo Nacom pin pia bo jopa pacana exanaeinde xua be pocotsi bo jiwi ichaxota caenaeta pexaewa! jei Jesús.

<sup>17</sup>Bapoxonae Jesús pijimonae tatsi yabara jume cui nanta xeinarucupa xua Nacom Pejume Diwesitha namchi xua Cristo yabara jeichichi xua jeye: “Yabara nejuntu coyene yuca xua yabara nanta xeinan xua pocotsiwa Taxa pia pin pia botha tatsi xeina. Daxota jiwi necaseba”, jei Nacom Pejume Diwesitha xua Cristo yabara paebatsi.

<sup>18</sup>Nexata judiomonae Jesús yainyabatsi, jeye:

—¿Eta po pexeinya petsita itutsi coyenewa pana netsita itutsiname? Bapoxonae xain payaputaen xua bara cou xam deta xeiname Nacom pia peitorobi coyenewa tatsi xua daxota jiwi cui itawetame Nacom pin pia bo tatsi weya, jei.

<sup>19</sup>Jesús jume nota, jeye:

—Icha barapo bo weraweraca paexanaename, equeicha acoibi po maticabibetha beta caewa xanebin, jei Jesús.

<sup>20</sup>Nexata barapo judiomonae Jesús tsipaebatsi, jeye:

—Jiwi barapo Nacom pin pia bo tatsi acaba ainya wei, cuarenta y seis po weibetha nacobe weta. ¿Eta pocotsiwa baxua paebame xua jinya saya acoibi po maticabibetha equeicha wuna exanaetsi? jei judiomonae.

<sup>21</sup>Po bo xua Jesús yabara paeba apara xua nayabara paeba pia pepon.

<sup>22</sup>Daxota poxonae Jesús equeicha asu juina petupae cuariyatha Jesús pijimonae yabara jume cui nanta xeinatsi xua bayatha Jesús paeba. Daxota jume cowunta Nacom Pejume Diwesi. Yawano Jesús jume cowuntatsi pocotsiwa xua paeba.

### **Meje yabara xua po coyene Jesús daxita juntu coyene yaputane jiwi**

<sup>23</sup>Poxonae Jesús Jerusalén tomaratha popona xua Pascua wun maticabintha bapoxonae pin bicheitomonae Jesús jume cowuntatsi. Daxota barapo bicheiton jume cowunta tsipei tane Jesús pia pexeinya petsita itutsi coyenewan tatsi. <sup>24</sup>Jesús jopa yabara jume cowuntsiyo barapomonae bequein jume cowuntatsi taetha. Tsipei Jesús daxita juntu



coyene yaputane jiwi xua ainya jüntu coyene pexeinaewa. <sup>25</sup>Daxota jopa nantawenonaeyo xua ichamonae Jesús petsipaebiwatsi icha jiwi yabara. Tsipei bapon Jesús daxita jüntu coyenein yaputane jiwi.

### Meje yabara poxonae Nicodemo Jesús tsipaebatsi

**3** <sup>1</sup>Iruru pebin popona pon fariseomonaepin, pon pewun Nicodemo. Bapon judiomonaе canamataxeinatsi. <sup>2</sup>Bapon Nicodemo merawi Jesús siwa poinchi, yawa Jesús jeichichi:

—Pon jiwi Necuidubim, bara paxan payaputan xua Nacom caitoroba xua jinya pata tanecuidubiwam tsane. Tsipei ichun jopa itacupaetsi xua pexeinya petsita itatsi coyenewan peexanaewa Nacom pia peayapusawatha tatsi icha Nacom jopa yantsiyo bapon icha be xua poxonaе ichim poxonaе xua exaname Nacom necayantsixae, jei Nicodemo.

<sup>3</sup>Nexata Jesús Nicodemo jume notatsi, Jesús jeye:

—Xaniyan catsi paebatsi. Pon equeicha jopa caewa naexanaeyo xua pena jiton penaexanaenexa, bapon jopa itacupaetsi xua Nacom piamonaе tatsi penaexanaewa pomonaе Nacom itorobiya peewatsixae, jei Jesús.

<sup>4</sup>Nicodemo Jesús jume epa notsiya yainyabatsi. Nicodemo jeye:

—¿Eta bichi xua pebin pon bayatha pinyo xua equeicha caewa pena jiton naexana? ¿Metha bara itacupatsi xua pena equeicha tsiperu wepatopa xua equeicha caewa penaexanaenexa pena jiton? jei Nicodemo.

<sup>5</sup>Jesús jume nota, jeye:

—Xaniyan catsipaebatsi. Pon meratha jopa bautisabichi xuano xua icha jopa xeinaeyo Nacom pia Pejumope tunaxu tatsi po jumope tunaxu bapon icha jüntu coyene xeina pecana exanaenexatsi, bapon jopa itacupaetsi xua Nacom piamonaе tatsi penaexanaewa pomonaе Nacom itorobiya peewatsixae. <sup>6</sup>Pomonaе pena jiwi tsiperu wenaexana bara jiwi coyeneya yacuiya naexana. Pomonaе naexana Nacom piamonaе tatsi barapomonaе Nacom pia Pejumope tunaxu tatsi cana exana xua barapomonaе pexeinaewa icha jüntu coyene. Barapomonaе yacuiya naexana Nacom piamonaе tatsi tsipei exana pocotsiwa Nacom pia Pejumope tunaxu tatsi itoroba. <sup>7</sup>Jopa najüntu coyene cabenaecaeinde xua tacatsipaebiwatsi xua tacajeiwatsi: ‘Daxita jiwi bewa pena jiwi naexanae equeicha’, tacajeichiwatsi xua. <sup>8</sup>Joibo ba pona ichaxota ichichipa peponaewa. Joibo busi taneme, ichitha jopa yaputaem xua ichaxota weponarena, yawa jopa yaputaem xua xota ponaena. Icha jiwi ichi xua jopa taeyo joibo ichitha tane xua joibo bubujei barichi jiwi jopa taeyo Nacom pia Pejumope tunaxu tatsi. Saya jiwi yaputane xua icha jiwi jüntu coyene xeica cana exainchi barapo Nacom pia Pejumope tunaxu tatsi, jei Jesús.

<sup>9</sup>Nexata Nicodemo equeicha Jesús yainyabatsi, jeye:

—¿Eta metha bichi Nacom pia Pejumope tunaxu tatsi? jei Nicodemo.

<sup>10</sup>Jesús jume barai, Nicodemo jume baraichi, Jesús jeye:

—Xam pon daxita neyaputaein israelmonae pexantha tatsi yawa pon jiwi necuidubim barapomonae pexantha tatsi. Bequein barapo jitom ichitha jopa baxua yabara yaputaem xua tacatsipaebiwatsi. <sup>11</sup>Xaniyan catsipaebatsi xua paxanbe, Juan, pon jiwi Pebautisabin, iru xan Jesús paca tsipaebatsi xua pocotsiwan payaputanbe. Matautano paxanbe bara yatsicaewa pata paebinbe xua patanbe bayatha. Ichitha paxam pomonae judiomonae pam jopa yabara pana nejume cowuntsim pocotsiwa paxanbe paca tsipaebatsi. <sup>12</sup>Icha jopa pana nejume cowuntsim pocotsiwan xua barapo cae pin nacuathe yabare paca tsipaebatsi bara paichim jopa pana nejume cowuntsipaem icha yabara paca tsipaebichipatsi pocotsiwan Nacom pia peitorobi nacua beicha tatsi.

<sup>13</sup>“Dapon aibi pon peitaboco beicha pona Nacom beicha xua equeicha caewa patopeica bara wetsica. Daxota jiwi jopa yabara yaputaeyo Nacom pia peitorobi nacua beicha tatsi. Saya meisa jame xan ponxaein Nacom Tananeitapetsin patopeican tanacua wetsica daxota yabara yaputan Nacom pia peitorobi nacua beicha tatsi. <sup>14-15</sup>Caena bayatha ira xuepana susato tsurucuae nacuatha, pinmonae werapa poxoru jomon sinebatsi. Daxota Moisés penainto asiya duta xua be jomo canaxobiya exana. Pomonae jomon sinebatsi, poxonae barapomonae tane barapo penain jomo, bapoxonae jopa werapaeyo. Icha Moisés ichi bara neichi tsane jiwi. Xan ponxaein Nacom Tananeitapetsin, ichamonae asiya naetotha tɔparucua neexanaena. Barichi tsane pomonae yabara nejume cowuntsina po coyene xua xan naetotha tatsitupaewa tsane xua barapomonae abe pia peexanae cuiru coyenein tatsi, barapomonae jopa weraweracae tsane. Barapomonae xeinaena peajuntɔyapusɔwa, po peajuntɔyapusɔwa ataya tsiteca”, jei Jesús.

### **Meje yabara xua Nacom daxita jiwi bichocono antobetsi barapo cae pin nacuathe**

<sup>16</sup>Equeicha Jesús nayabara paeba poxonae Nicodemo tsipaebatsi. Jesús jeye: “Nacom antobe bichocono daxita carepaya jiwi xua barapo cae pin nacuathe. Daxota Nacom Pexanto itoroba pon yatsicaya compa tatsi. Pon Nacom Pexanto tatsi jume cowuntatsi, bapon jopa weraweracae tsane. Bapon peajuntɔyapusɔwa xeinaena, po peajuntɔyapusɔwa ataya tsiteca. <sup>17</sup>Nacom Pexanto jopa itorobicaeyo xua saya barapo cae pin nacuepiwi atene peexanaenexatsi xua penatsicuentisixae xua abe peexanaexae Nacomtha. Saya apara jame Nacom Pexanto itorobica xua jiwi pecapanenebiyaenexatsi penatsicuentisawa weya.

<sup>18</sup>“Pon Nacom Pexanto tatsi yabara jume cowuntatsi, bapon jopa Nacom tsitatsi xua atene peexanaewa tsainchi xua penatsicuentisixae xua abe peexanaexae Nacomtha. Ichitha nama pon Nacom Pexanto

tatsi jopa yabara jume cowuntsichi bapon Nacom bayatha tsitatsi xua atene peexanaewatsi tsainchi xua penatsicuentsexae jopa peyabara jume cowuntsixaetsi Nacom Pexanto tatsi, pon bara compa. <sup>19</sup>Pomonae jopa Nacom Pexanto tatsi yabara jume cowuntichi, barapomonae Nacom bayatha tsitatsi xua atene peexanaewatsi xua penatsicuentsexae xua abe peexanae cuiru coyenein peexanaexae. Tsipei poxonae Nacom Pexanto tatsi patopeica po cae pin nacuathe tsique, barapomonae ichichipa exana abe peexanaewan beyacaincha xua peexanaewa pocotsiwa Nacom itoroba. <sup>20</sup>Tsipei daxita pomonae abe peexanaewi barapomonae Nacom Pexanto tatsi aichaxaibichi daxota jopa imoxoyo caquita ponaetsi bapon. Barapomonae jopa ichipaeyo xua peyaputaewatsi, xua Nacom Pexanto tatsi peyaputaewa xua pocotsiwa barapomonae abe exana. <sup>21</sup>Ichitha pomonae pejume cowuntsiwi, pomonae yatsicaewa beta xanepanaya exana, barapomonae Nacom Pexanto tatsi imoxoyo caquita poinchi. Tsipei barapomonae ichichipa xua peyaputaewatsi xua Nacom Pexanto tatsi peyaputaewa tsane xua pocotsiwa barapomonae wɔnae peexanaexae, xua pocotsiwa Nacom peitorobixae”, jei Jesús Nicodemotha poxonae nayabara paeba.

**Meje yabara poxonae Juan pon jiwi Pebautisabin  
equeicha Jesús yabara cueicueijeichi**

<sup>22</sup>Poxonae Jesús najume weta xua poxonae Nicodemo tsipaebatsi, bapoxonae pirapae Jesús pijimonae barɔ pona Judea nacua beya. Barapo nacuathe Jesús ainya matacabintha pijimonae barɔ popona. Matautano baxota Jesús pijimonae cui itoroba xua jiwi pebautisabiwa tsainchi. <sup>23</sup>Irɔrɔ Juan bautisaba jiwi Enón tomaratha, po tomara eca ichaxota imoxoyo po tomara pewɔn Salim. Tsipei baxota menein nawita. Pinmonae Juan itata patatsi, yawa Juan bautisaba barapomonae. <sup>24</sup>Juan baxua pewɔnaeya exana xua poxonae jiwi pecubi botha etatsi.

<sup>25</sup>Bapoxonae pomonae Juan pia pepuna jinompaewichi tatsi irɔ judiomonaeno, barapomonae yabara barɔ najume matsontsonobatsi pebautisabi coyenewa. <sup>26</sup>Barapomonae Juan siwa poinchi xua Juan yabara peyainyabinexa tsainchi baxua. Jeye Juantha:

—Pon jiwi Necuidubim, incane matha taema. Pon caniwi cabarɔ popona Jordán mentha xua icha muxunene beya, pon bayatha yabara pana netsipaebame, bapon nama anoxuae bautisabauya jiwi yawa bapon puna poinchi daxita jiwi, jei Juan pijimonae tatsi xua Jesús yabara paebatsi.

<sup>27</sup>Nexata Juan barai barapomonae, jeye:

—Jiwi ba jopa xeinaeyo icha Nacom jopa catsiyo. <sup>28</sup>Paxam bara yatsicaewa pana nejume taneme xua paca jeichi: ‘Xan dapon aibin Mesías’, jan. ‘Apara bapon pia pewɔnaeya tatsi Nacom neitoroba’, jan.

<sup>29</sup>Poxonae ba pebin pecotsiwa pita bapon pona yabũyo pia botha tatsi. Pon piowa pepichixae bapon pia jiton tatsi bichocono jũntũ coyene weiweina xua bapon piowa pepichixae poxonae jume taeuncua xua pia jiton tatsi piowa pita. Icha pebin cana ichichi pia jiton, bara jũta ichin Jesucristoŧha anoxuae. Bichocono jũntũ coyene weiweinan tsipei daxita jiwi Mesías puna poinchi. <sup>30</sup>Bapon bewa mataropeicha ainya cui naexanaponae jiwi peitũtha tatsi. Xan bewa jopa ainya cui naexanaponaein tsane jiwi peitũtha tatsi, jei Juan.

**Meje yabara poxonae Juan yabara paeba pon peitaboco wetsica pona**

<sup>31</sup>Equeicha Juan piamonae barai, jeye:

—Pon peitaboco wetsica pona, bapon jame bichocono peyaputaein beyacaincha xua ichamonae. Pon xua po irathepin bapon apara saya jiton. Bapon saya yabara cueicueije pocotsiwa po irathe yabara. Ichitha pon peitaboco wetsica pona, bapon daxita canamataxeina. <sup>32</sup>Bapon bequein jiwi yabara tsipaebatsi pocotsiwa xua bayatha tane peitabocotha, xuano xua pocotsiwa bayatha jume tane peitabocotha, ichitha jiwi jopa jume cowũntsiyo pocotsiwa bapon paeba. <sup>33</sup>Icha pebin jume cowũnta pocotsiwa paeba pon peitaboco wetsica peponaexae xua Nacom yabara paebatsi, barapon tsita itapeinya xeina ichamonaetha, xua apara Nacom bara xaniwaicha pepaebin. <sup>34</sup>Pon xua Nacom itoroba bara bapon cueicueije Nacom pejumein tatsi, tsipei Nacom jopa juniya nacana jumope tũnaxũ catsiyo xua bapon peyawenaewa tsainchi. <sup>35</sup>Nacom bichocono antobe Pexanto. Pexanto cata peyapusũ itorobi coyenewa xua bapon daxitan pecanamataxeinaewa tsane. <sup>36</sup>Pon Nacom Pexanto tatsi yabara jume cowũntinchi, bapon peajũntũyapusũwa xeinaena, po peajũntũyapusũwa jopa bapana weraweracaeyo. Ichitha pon Nacom Pexanto tatsi jopa yabara jume cowũntichi, bapon jopa xeinae tsane barapo peajũntũyapusũwa. Nama bapon Nacom cana exanaena xua bapon bichocono atene peexanaewa tsainchi, jei Juan.

**Meje yabara poxonae Jesús tsipaeba powayo Samaria nacuapiwayo**

**4** <sup>1</sup>Jesús jume tane xua jiwi tsipaeba fariseomonaetha xua jeye: “Jesús pinmonae xeina, pomonae pia pepuna ponaewichi. Jesús toxeinchiya jopa juniya bautisabiyo jiwi beyacaincha xua poxonae Juan bautisaba jiwi”, jei jiwi fariseomonaetha. <sup>2</sup>(Daumetha Jesús apara jopa bautisabiyo. Apará jame Jesús pijimonae tatsi bautisaba jiwi.) <sup>3</sup>Poxonae Jesús jume yaputane xua jiwi paeba fariseomonaetha, bapoxonae Jesús pijimonae Judea nacua webarũ warapiya. Caibeya warapa Galilea nacua beya.

<sup>4</sup>Poxonae warapa Galilea nacua beya bewa ponaena ichaxoyo Samaria nacua iya, tsipei namto baxoyo ducuiya. <sup>5</sup>Bapoxonae Jesús pijimonae

baru patopa Sicar tomaratha, po tomara eca Samaria nacuatha. Barapo tomara, Sicar tomara eca ichaxota imoxoyo po iriyo caena bayatha Jacob pexanto cata. Barapo Jacob pexanto tatsi pewun José. Jacob iru pexanto tatsi caena bayatha tupabe. <sup>6</sup>Barapo iriyotha mene muthu eca, barapo mene muthu pewun, “Jacob pia muthu”, jei. Tsipei Jesús natsepapona namto dena, tsipei taju werena pona, daxota barapo mene muthu muxuburutha ecopa. Matautano bapoxonae mateinyaxae tsuxubi iru. <sup>7-8</sup>Iru bapoxonae Jesús pijimonae tatsi tomara be-iyiya pecomocaenexa pexaewa. Barapomonae pecoutha tatsi yabuyo Samaria nacuapiwayo patopa ichaxota Jesús po mene muthu muxuburutha eca. Jesús barai bapowa, jeye:

—Mera necare, jei Jesús.

<sup>9</sup>Bapoxonae barapo Samaria nacuamonaepiwayo Jesús jume notatsi. Barapowa jeye:

—¿Eta pocotsiwa metha mera nebaru ununame? Apra judiomonaepim iru xan apra Samaria nacuamonaewayon, jei.

Barapowa baxua paeba tsipei judiomonae iru Samaria nacuamonaecaxita barapomonae jopa naita coxonaeyo. <sup>10</sup>Nexata Jesús jume nota, jeye:

—Icha xam yaputaetsipame xua pocotsiwa Nacom cata jiwitha, yawa icha neyaputaetsipame pon aunxuaein mera sawucatsi, bapoxonae jame newucaetsipame mera, xua icha mera, po mera jiwi peajuntuyapusuwa xeina cana exainchi, po peajuntuyapusuwa jopa bapana weraweracaeyo, jei Jesús.

<sup>11</sup>Bapowa Jesús jume notatsi, jeye:

—Pon jiwi Necanamataxeinaem, apra jopa xeinaem xua xota mene capatame. Yawa po mene muthu apra taju deca. ¿Jinya exota po mene boca inta mene capitichi, po mera jiwi ajuntuyapusuwa exainchi?

<sup>12</sup>Barapon Jacob pata tamo susatopin pana cata barapo mene muthu. Bapon barapo mene muthu mene capaneiba peapeibinexa, iru pia pexui tatsi mene capaneiba xua peapeibinexa, matautano mene capaneiba peapateibinexa pia duweimonaein. ¿Metha bara Jacob toxecha ainya cuim, beyacaincha bapon? jei bapowa.

<sup>13</sup>Jesús jume nota, jeye:

—Daxita pomonae xua po mene muthu the mene capaneiba xua peapeibinexa equeicha meratsipouneibina. <sup>14</sup>Ichitha pon apa xua po mera catan, bapon equeicha jopa caewa meratsipae tsane. Barapo mera icha ira burana mene ichi xua epatoya mene jujuina poxoru bichocono ira burana mene nayuca. Barichi po coyene xua cacatinchi barapo coyene cajuntu coyene yuca cacana exanaena, bapoxonae xeinaename peajuntuyapusuwa, po peajuntuyapusuwa xua ataya tsiteca, jei Jesús.

<sup>15</sup>Nexata bapowa Jesús jume notatsi, bapowa jeye:

—Pon jiwi Necanamataxeinaem, dapó mera necare xua jopá caewa tameratsipouneibiwa tsane yawa xua equeicha po mene mutháthe jopá tapateibiwa tsane xua mera tacapanathopeibinexa, jei barapowa.

<sup>16</sup>Jesús jume nota, jeye:

—Moya matha iyande, matha jinseuri wabare. Nexata bapoxonae xote papatoparebe, jei Jesús.

<sup>17</sup>Bapowa jume nota, Jesús jume notatsi, jeye:

—Taseuri apara jopá xeinaeinyo, jei.

Nexata Jesús jume barai, jeye:

—Bara xainyeya paebame poxonae jam, ‘Taseuri jopá xeinaeinyo’, jam. <sup>18</sup>Tsipei caena bayatha cinco poyobe pebiwi punaxubame. Pon xua anoxuae barú poponame, apara jinseuri aibi. Poxonae paebame baxua bara xainyeya paebame, bara jopá naerabim, jei Jesús.

<sup>19</sup>Barapowa poxonae Jesús baxua jume tainchi barapowa jeye:

—Pon jiwi Necanamataxeinaem, bara catainchi xua xam apara pon Nacom peitorobi jume nepaebim. <sup>20</sup>Pata tamo susato jiwi, Samaria nacuamonaepiwi, barapomonae wúnae jainteiba Nacom xote po demxuwathe. Ichitha paxam judiomonae pam, papaebame xua pinae bewa jiwi wúnae jainteibina Nacom bomúxútha po bo uncua Jerusalén tomaratha po bo Nacom pin pia bo tatsi, jei barapowa.

<sup>21</sup>Jesús jume nota, jeye:

—Yabúyo moya yabara nejume cowúnde xua tacatsipaebiwatsi. Tsipei barapo matakabi imoxoyo patopaena, po mataqueitha xua wúnae pajainteibiname Nacom. Nama jopá painya nenantawenonaewam tsane xua painya neponaewa, po demxuwathe yawa Jerusalén tomara beya xua wúnae painya nejainteibiwa tsane Nacom. <sup>22</sup>Paxam Samaria nacuamonaepiwi, jopá payaputaem pon wúnae pajainteibame. Paxan nama judiomonae pan payaputan pon wúnae pajainteiban, tsipei pon pecapanenebiyaein jiwi apara bapon judiomonae jiwana-pin. <sup>23</sup>Ichitha anoxuae nama patopa po mataqueitha poxonae pomonae xaniwaicha wúnae pejainchiwa Nacom, barapomonae icha coyene cuitha Nacom wúnae jaintinchi, xua barapomonae pia Paxaxae tatsi. Barapomonae xaniwaicha pia pejúntú coyenewatha wúnae jainchina Nacom. Tsipei Nacom baxua ichichipa xua wúnae pejainchiwatsi xua jiwi wúnae pejainchiwa pejúntú coyenewatha. <sup>24</sup>Nacom pejúntú coyene xanepanaein pon peinya jumopein. Daxota pomonae Nacom wúnae pejainchiwatsi, barapomonae bewa xaniwaicha pejúntú coyenewatha wúnae jainchina Nacom, jei Jesús.

<sup>25</sup>Barapowa jume nota, jeye:

—Yaputan xua patopeicaena pon pewún Mesías, (xua pon icha wún ‘Cristo’ baraichi). Poxonae bapon patopeicaena daxita yabaran pana necuidubina, jei bapowa.

<sup>26</sup>Jesús jume nota, jeye:

—Apara xan bapon, pon aunxuaein catsipaebatsi, jei Jesús.

<sup>27</sup>Bapoxonae equeicha Jesús pijimonae tatsi pata. Daxita barapomonae yabara najüntü cui coyene cabenaeca xua Jesús tsipaeba Samaria nacuamonaewayo. Ichitha dapon aibi xua pon pejeiwa Jesustha, “¿Eta xua metha jinya xuatsi? ¿Eta pocotsiwa metha bapowa tsipaebame?” xua pon pejeiwa. <sup>28</sup>Nexata bapowa juruwato cuenta iya tomara be-iya, nainya yacuinaya iya. Bapowa jiwi tsipaeba, jeye:

<sup>29</sup>—Anetha, pataema pebin ichaxota muthü mene. Bapon yabara netsipaeba daxita pocotsiwa bayatha caena exanan. ¡Apara bapon metha Mesías! jei bapowa.

<sup>30</sup>Bapoxonae jiwi tomara we-iyiya peponaenexa ichaxota Jesús popona.

<sup>31</sup>Irürü Jesús pijimonae jume daunweya baraichichi, jeye:

—Pon Patatanecuidubim, matha xaema, jeichichi pijimonae.

<sup>32</sup>Jesús jume barai pijimonae, jeye:

—Xan xeinan pexaewa, po pexaewa jopa payaputaem, jei Jesús.

<sup>33</sup>Jesús pijimonaexae tatsi nexata bara caemonae nayainyaba, jeye:

—¿Metha bara ichün Jesús apatatsi pexaewa? najei barapomonae.

<sup>34</sup>Ichitha Jesús pijimonae jume barai, jeye:

—Icha pebin ichi xua bewa nabanaena, barichin xan bewa exanaein pocotsiwa Nacom ichichipa pocotsiwa bapon tana necui itorobixae. Mataütano bewa nacui wetsin Nacom pia penacuichiwa tatsi xua tana neitorobixae. Daxota xua bapoxonae tanejüntü coyene yucaewa tsane be poxonae pebin xua pexaewa una tonsana. <sup>35</sup>Paxam ba pajam: ‘Abü cataunxuae cuatro po xometobe yapu seica pabitha xua pexaewa penawetsiwa tsane’, ba pajam. Ichitha nama paca jeichi: ‘Pataema bayatha pexaewa naweta xua pabitha’, paca jeichichi. Barapocotsi jüta coyeneya paca jeichi: ‘Jiwi barapo cae pin nacuathe bayatha najüntü cui coyene wünaetaba xua pejume taenexa Nacom Pejume Diwesi xua pejume cowüntsinea’, paca jeichi. <sup>36</sup>Catsibin pomonae tamonaexae pocotsiwa xua pematomatsiwa xua inta ichamonae peyawenaexaetsi xua irürü be tamonaе jiwi penaexanaenexa. Pomonae nejume cowünta barapomonae catsibin peajüntüyapusüwa, po peajüntüyapusüwa jopa weraweracaeyo. Tsipei pomonae tajume diwesi pecueicueijeijiwi copiya xuano irü pomonae tajume diwesi cotacaya xuya yaputane cana exana xua daxota jiwi nejume cowünta, daxita barapomonae matabüxüyobe nabarü jüntü coyene weiweina xua ichamonae nejume cowünta pecana exanaexaetsi. <sup>37</sup>Tsipei po diwesiyo xua tsica diwesiyo, po diwesiyo yabara canaüta jütsiya pepaebiwa bara apara xaniwaicha, po diwesiyo xua ba jeye: ‘Ichün üba, irü ichün xuya jota poxonae naweta’, xua jei po diwesiyo. <sup>38</sup>Paca itorobatsi xua inta payaweneme jiwi xua tajiwiwimonae penaexanaenexa xua po coyene jopa pacata ayapubeyo xua poxonae

paexaname baxua. Baxua paexanaename bequein bara jopa dapomonaē pam pocotsimonaē copiya tajume diwesi paeba barapo jiwitha. Jame paxam apara barapomonaē pam, xua xuya cotacaya yaputane pacana exaname barapo tajiwimonaē. Baraxua icha be poxonaē ichi poxonaē ichun xuya jota cotacaya poxonaē ichun copiya ũba, jei Jesús.

<sup>39</sup>Bapoxonaē pin bicheitomonaē pomonaē barapo tomaratha jinompa xua Samaria nacuaũtha, Jesús jume cowuntatsi, tsipei barapo petsiriwa pejeixae: “Bapon Jesús yabara netsipaeba daxita pocotsiwa bayatha caena exanan”, jei. <sup>40</sup>Poxonaē barapo Samaria nacuapiwi Jestutha pata, bapoxonaē Jesús jume daunweya jeichichi: “Pana barũ ecare pata tomaratha”, jeichichi. Daxota Jesús ainya matabibē naeca barapo tomaratha. <sup>41</sup>Bichocono pinmonaē Jesús jume cowuntaponatsi poxonaē jume tane xua Jesús paeba. <sup>42</sup>Nexata barapomonaē bapowa tsipaebatsi, jeichichi:

—Anoxuae nama pajume cowuntan jopa meisa saya poxoru pata tanetsipaebiwam. Matautano bara pajume cowuntan tsipei yatsicaewa pata muxutonũha pajume tan pocotsiwa bapon paeba. Matautano bara payaputan xua bapon pon jiwi Pecapanenebiyaeinchi abe pia peexanaē cuiru coyenein tatsi weya xua barapo jiwi jopa peweraweracaenexa, jei barapomonaē.

### **Meje yabara poxonaē Jesús axaibi exana pon pentacaponaein pexanto tatsi**

<sup>43</sup>Poxonaē barapo ainya matabibē yapucaewa, bapoxonaē Jesús pijimonaē Samaria nacua webarũ warapiya xua barũ pona Galilea nacua beya. Ichitha pijimonaē jopa barũ patopaeyo pia tomaratha Nazaret tomaratha. <sup>44</sup>Tsipei Jesús bayatha pijimonaē tsipaeba xua nayabara jeye:

—Pon ba Nacom peitorobi jume pepaebin, bapon ba pia nacuapiwi jopa barũ cui itura jinaetsi, jei Jesús. <sup>45</sup>Poxonaē Jesús pijimonaē barũ patopa Galilea nacuaũtha, barapo Galilea nacuapiwi Jesús matenta weyataya wabatsi. Tsipei caena bayatha barapo Galilea nacuapiwi Jesús tainchi Jerusalén tomaratha, poxonaē jiwi nacaetuta xua penabanaenexa pexaewa po matabinũtha pewun Pascua wun matabin poxonaē jiwi yabara canantana xeina xua caena bayatha pia pamo susato jiwi tatsi panenebiya Egipto nacua weya. Matautano tsipei poxoru bayatha barapomonaē tane daxita pocotsiwa Jesús exana baxota.

<sup>46</sup>Bapoxonaē Jesús pecoyo barũ pona pijimonaē Caná tomara beya xua po tomara eca barapo Galilea nacuaũtha. Barapo Caná tomara, po tomaratha ichaxota bayatha Jesús meratha equeicha vino mera cana exana. Poxonaē Jesús Caná tomaratha eca, irũrũ pebin pon pentacaponaein Capernaum tomaratha popona. Bapon pexanto taatenetsi. Barapo pentacaponaein tanacuita, pon jiwi itorobiya pia pepa peewatsinchi tanacuitatsi. <sup>47</sup>Barapon pon pentacaponaein yaputane



xua Jesús pijimonae baru patopa Galilea nacuatha xua Judea nacua weya pona. Bapoxonae Jesús siwa poinchi. Bapon Jesús jume daunwei jeichichi:

—Tabo beya ponde. Inta taxanto axaibi exande tsipei imoxoyo petupae, jei bapon.

<sup>48</sup>Nexata Jesús barai bapon xua piamonae tatsiru, jeye:

—Paxam jopa yabara pana nejume cowuntsim. Saya poxonae pexeinya petsita itutsi coyenewan paca tsita exaneibatsi bapoxonae deta pana nejume cowanteibame, jei Jesús.

<sup>49</sup>Ichitha pentacaponaein jume nota, jeye:

—Pon Necanamataxeinaem jiwi, anetha nainya iyande, xua pewunaeya tsane poxonae taxanto tupaena, jei.

<sup>50</sup>Nexata Jesús jume barai bapon, jeye:

—Moya caibe nawiyama jinya bo beya. Bayatha cata axaibi nexanto, jei Jesús.

Barapo pentacaponaein yabara jume cowunta pocotsiwa Jesús paeba. Bara pontaba pia bo beya. <sup>51</sup>Poxonae barapo pentacaponaein cataunxuae ecapona namtotha xua pia bo beya pona, bapoxonae bapon matenta poinchi pomonae pia petanacuichiwiwaetsi pia botha. Bapon jeichichi:

—Nexanto bayatha cata axaibi, jei barapomonae.

<sup>52</sup>Nexata bapon yainyaba pia petanacuichiwichi, jeye:

—¿Eta poxonae inta taxanto axaibi? ¿Eta xoyo poxonae ecatabiya xometo? jei bapon.

Barapomonae jume nota, jeye:

—Mexuae axaibi tsuxubi poxonae mateinyaxae pepuya weya bapoxonae yasataxotsi domae, jei barapomonae.

<sup>53</sup>Nexata pexuyo paxa tatsi yabara nanta xeinataba xua barapo mateinyaxae pepuya weya xua mexuae Jesús namchi jeye: “Moya caibe nawiyama jinya bo beya, bayatha nexanto cata axaibi”, jei Jesús. Bapoxonae bapon iru pomonae pia botha petaenaewichi Jesús yabara jume cowuntatsi.

<sup>54</sup>Barapo pexeinya petsita itutsi coyenewa xua poxonae equeicha Jesús cotacaya exana poxonae caibe warapiya Galilea nacua beya poxonae Judea nacua wewarapiya.

### **Meje yabara poxonae Jesús axaibi exana pon pecuenobinchi ichaxota po fetiyo pewun Betzata**

**5** <sup>1</sup>Bapoxonae pirapae Jesús pona Jerusalén tomara beya. Barapo tomaratha judiomonae nacaetuta xua penabanaenexa pexaewa.

<sup>2</sup>Barapo tomaratha xua iboton peyacaincha toxoro dutsi acabiwa coiboton cae boupa iya barapo boupa pewun “Oveja pia boupa”, jei. Imoxoyo barapo boupa iya eca tsica mene fetiyo. Barapo fetiyo hebreo jumetha

pewun “Betzata”, jei. Barapo fetiyotha cinco po boutiyobe umena. <sup>3</sup>Barapo boutontha peatenewi iratha bobenapoinya, ichamonae pomonae peitata nacutsi jiwi, iru ichamonaeno pomonae pejayujayujei jiwi, iru ichamonaeno pomonae pecuenobiwichi. Barapomonae ewatabobena xua barapo mene fetiyo mene najirababa. <sup>4</sup>Tsipei ichacuitha tsaibi matatsunpin patopeiqueiba barapo mene fetiyotha xua peitaboco wetsica pona. Barapo matatsunpin mene najirababa exana barapo mene fetiyo. Pon copiya maxu cayatsi mene beya xua baxota cuaranotatsi, bapoxonae axaibi exainchi. <sup>5</sup>Baxota pebin iru boca pon caena bayatha atene treinta y ocho po weiyobetha. <sup>6</sup>Jesús tane xua bapon iratha boca. Matautano Jesús yaputane xua bapon ainya dapaen bayatha ewata boca. Jesús yainyaba bapontha, jeye:

—¿Ichichipame xua neaxaibiwa? jei Jesús.

<sup>7</sup>Pon atene Jesús jume notatsi, jeye:

—Pon Necanamataxeinaem jiwi, dapon inta aibi pon taneyawenaewa xua mene betanemaxu cayaenexa poxonae matatsunpin mene najirababa exana. Poxonae tacoutha taepatotha iya tsaibin ichun copiya netsiwana patopeiba. Bapon axaibi, copiya pecaxinaexae mene, jei pon atene.

<sup>8</sup>Jesús jume barai, jeye:

—Asiya uncuare. Pire jinya nebocaewa. Bara ponde, jei Jesús.

<sup>9</sup>Bapoxonae caena nainya axaibi tsuxubi. Yawa pita pia pebocaewa, bara ponano. Ichitha barapo matabi apara po matabi pentaquei seicae matabi. <sup>10</sup>Daxota judiomonae barai pontha pon axaibi exainchi. Jeichichi:

—Apara anoxuae po matabi xua pentaquei seicae matabi. Barapo matabeitha jopa cacopatsiyo xua bara necaponaewa jinya nebocaewa, jei judiomonae.

<sup>11</sup>Bapon jume barai judiomonae, jeye:

—Pon neaxaibi exana bapon nebarai: ‘Pire jinya nebocaewa, bara ponde’, nejei bapon, jei bapon judiomaetha.

<sup>12</sup>Nexata judiomonae yainyaba bapon, jeye:

—¿Jintam bapon pon baxua cabarai: ‘Pire jinya nebocaewa, bara ponde’, jei? jei barapomonae.

<sup>13</sup>Ichitha bapon jopa wun taeyo pon peaxaibi exanaeatsi, tsipei Jesús pin bicheitotha naita cafetaba. <sup>14</sup>Pirapae bapon Jesús taeba Nacom pin pia botha tatsi. Jesús barai bapon, jeye:

—Incane nejume taema. Jame caaxaibi exanatsi. Equeicha jinxoba abe exaname, tsipei bapoxonae bichocono atenem tsipae beyacaincha xua poxonae copiya atenem, jei Jesús.

<sup>15</sup>Nexata barapo pebin pona judiomonae beya xua pejeinexa:

—Apara pon neaxaibi exana bapon apara Jesús, jei bapon.

<sup>16</sup>Daxota Jesús abe tsiyabara jeitapoinchi xua pebexubiwa tsainchi yaitama Jesús axaibi exana pon atene po matabeitha pentaquei seicae matabeitha. <sup>17</sup>Ichitha Jesús jeye barapomaetha:

—Taxa, apara cataunxuae nacuiteiba daxita matacabintha. Xan barichin bara bequein pentaquei seicae matabi tan, jei Jesús.

<sup>18</sup>Daxota bichocono nama judiomonae jopa juniya anaepanaeyo, yawa ichichipa xua Jesús pebexubiwa tsainchi. Barapomonae anaepana tsipei yaitama Jesús po mataqueitha pentaquei seicae matabitha nacuita poxonae bequein barapomonae jopa copatsiyo. Matautano anaepana tsipei Jesús naexana xua Nacom pecui jupaewatsi, yawa tsipei jeye: “Nacom, Taxa”, jei.

**Meje yabara poxonae Jesús yabara paeba xua  
pexeinaewa pia peayapusu itorobi coyenewa**

<sup>19</sup>Nexata equeicha Jesús barai barapo judiomonae, jeye: “Xaniyan paca tsipaebatsi xua xan Nacom Pexanton jopa exanaeinyo pocotsiwa tacoutha ichichipan. Saya jame exanan pocotsiwa Taxa cui tan pocotsiwa exana. Daxota bapocotsiwan baxua exanan. <sup>20</sup>Taxa bichocono neantobe, yawa netsita ituta daxita xua bapon pocotsiwa exana. Taxa equeicha ichawanno netsita itutsina pocotsiwa xua bichocono wnae beyacaincha xua bayatha exanan. Bapoxonae yabara pana najuntu cui coyene cabenaecaename. <sup>21</sup>Taxa equeicha asu cana exana pomonae caena bayatha werapa. Xan barichin tsane Nacom Pexantonxaein equeicha asu cana exanaein pomonae pewerapaewi, pomonae xua ichichipan xua asu tacana exanaewa. <sup>22</sup>Taxa jopa ba yabara paebiyo jiwi xua penatsicuentisiwa xua abe peexanaexae. Saya meisa xan Pexanto tatsixaein necata barapo peayapusu itorobi coyenewa xua tayabara paebiwa jiwi xua penatsicuentisiwa xua abe peexanaexae Nacomtha. <sup>23</sup>Baxua Taxa barapo peayapusu itorobi coyenewa necata xua daxita jiwi tana nebaru cui itura jinaenexa xua icha barapo jiwi ichi xua poxonae Taxa baru cui itura jinatsi. Xan ponxaein Nacom Pexantoxaein ponxaein Nacom tana neitorobixae pon jopa nebaru cui itura jinaeyo bapon barichi Taxa jopa baru cui itura jinaetsi.

<sup>24</sup>“Bara xainyeya paca tsipaebatsi xua xan, Nacom Pexantoxaein, pon xanepanaya nejume naitaewata pocotsiwa paeban xuano xua Taxa jume cowuntatsi bapon peajuntuayapusuwa xeinaena po peajuntuayapusuwa xua ataya tsiteca. Bapon bapana jopa yabara caunutsin tsane xua bapon Nacom bayatha tsitatsi xua bapon penatsicuentisiwa xua daxota bapon bewa tupaena abe peexanaexae. Tsipei bapon be barapocotsin, bara be pocotsin xua equeicha asu exanan petupaecuiru coyene weya. <sup>25</sup>Xainyeya paca tsipaebatsi. Apara anoxuae barapo matabi patope, po mataqueitha pomonae be pewerapaewi jopa pexeinaexae peajuntuayapusuwa, barapomonae nejume taena. Yawano icha barapomonae nejume cowuntsina bapoxonae xeinaena peajuntuayapusuwa. <sup>26</sup>Taxa xeina xua peajuntuayapusuwa, po pia

peajüntuyapuswa tatsi jopa weraweracaeyo. Daxota bara tayapu xanepanatsi xua ichun pecatsinexatsi barapo peajüntuyapuswa. Matautano Taxa necata barapo peajüntuyapuswa xua daxota xuya jiwi catan. <sup>27</sup>Taxa pia peayapusu itorobi coyenewa necata xua jiwi tayabara paebinexa xua penatsicuentisiwa xua abe peexanaewixae Nacomtha. Tsipei naexanan pepa Jiton daxota necui jupa xua barapo pia peayapusu itorobi coyenewatha jiwi tayabara paebiwa xua penatsicuentisiwa xua abe peexanaexae. <sup>28</sup>Jopa baxua payabara najuntu coyene cabenaecaeinde pocotsiwa tapaca tsipaebiwatsi. Tsipei patopaena icha matacabi po mataqueitha pomonae pewerapaewi nejume taena. <sup>29</sup>Barapomonae pomonae pewerapaewi muthu wejujuinaena. Pomonae xua xanepanaya exana xua poxonae caena bayatha jinompa, barapomonae asu exanaeinchi xua pexeinaewa tsane peajüntuyapuswa. Ichitha nama pomonae abe exana xua poxonae caena bayatha jinompa, barapomonae asu exanaeinchi xua peyabara paebinexatsi xua penatsicuentisiwa xua abe peexanaexae Nacomtha”, jei Jesús.

**Meje yabara poxonae Jesús tsita itapeinya xeina jiwi  
xua bara xeina peayapusu itorobi coyenewa**

<sup>30</sup>Cataunxuae awiya Jesús cueicuejei judi monaetha. Jesús jeye: “Jopa exanaeinyo pocotsiwa tacoutha ichichipan. Jiwi yabara paeban xua penatsicuentisixae xua abe peexanaexae Nacomtha be pocotsi coyeneya Taxa tanecui itorobixae. Baxua xua pocotsiwa poxonae jiwi yabara paeban xua penatsicuentisiwa xua abe peexanaexae apara bara xanepana. Tsipei jopa exanaeinyo pocotsiwa tacoutha ichichipan jame saya exanan pocotsiwa Taxa ichichipa, pon tana neitorobixae. <sup>31</sup>Icha saya meisa nayabara paebichipan tacoutha, yawa icha ichun jopa neyabara jume yawenaetsipae metha bapoxonae pana neyabara jam tsipaem: ‘Apara pocotsiwa bapon pia coutha nayabara paeba jopa xainyeyo’, pana neyabara jam tsipaem. <sup>32</sup>Ichitha ichun neyawena xua tana neyabara paebiwa tsipei paeban xua pocotsiwa bapon paeba. Nanta jupaya papaebanbe. Apara bapon Nacom bara Taxa. Bara yaputan po coyene bapon xua tana neyabara paebiwa apara bara xainyei. <sup>33</sup>Paxam ichamonae paitorobame Juan beya, xua Juan peyainyabiwa tsainchi, pocotsiwa Juan yabara paca jume nota xua xan yabara, bara apara xainyei. <sup>34</sup>Xan jopa jiton nantawenonaeinyo xua tana nebaru jume yawenaewa xua jiwi yabara tana nejume cowuntsiwa xua bara xainyeya tapaebin. Saya yabara paca tsipaebatsi pocotsiwa Juan tana neyabara paebiwa. Poxonae baxua pajume cowuntsiname pocotsiwa Juan tana neyabara paebiwa bapoxonae paca capanenebiyaena abe painya neexanae cuiru coyenein weya xua jopa painya atene tsaibiwa tsane abe painya neexanaewantha. <sup>35</sup>Poxonae pecoicha itanata, jiwi ba caeto juntu coyene weiweina poxoru ichichipa barapo coicha xua yonoyonei. Icha pecoicha ichi Juan barichi. Poxonae Juan paca

cuiduba copiya pajüntu coyene weiweiname caeto, poxoru paichichipame barapo diwesi pocotsiwa bapon paca tsipaeba. <sup>36</sup>Ichitha nama xan xeinan xua pocotsiwa ainya cui beyacaincha xua po diwesi Juan tana neyabara paebiwa. Baxuan xua xuan pocotsiwa exanan apara bara xua pocotsiwa Taxa neitoroba. Po pexeinya petsita itubiwan xua exanan poxonae baxuan jiwi necui tane bapoxonae nejume cowunta xua Taxa necata barapo peayapusu itorobi coyenewa. <sup>37</sup>Matautano Taxa, pon tana neitorobixae, beta xanepanaya neyabara paeba. Ichitha paxam jopa bapana Nacom pajume taem xua pejume. Matautano jopa bapana pataem pia pepon. <sup>38</sup>Nacom Pejume Diwesi jopa paxeinaem painya juntu coyeneintha tsipei jopa pana nejume cowuntsim ponxaein xua Nacom tana neitorobixae. <sup>39</sup>Paxam matowa pana nacuidubame Nacom Pejume Diwesi, tsipei pananta xeiname xua pia bapoxonae Nacom painya nepaca catsibichi pia peajuntuyapusuwa, po peajuntuyapusuwa jopa weraweracaeyo. Ichitha Nacom Pejume Diwesi, po diwesi payorobame, apara xua tana neyabara paebiwa. <sup>40</sup>Ichitha jopa bapana pana nejume cowuntsim xua tapaca catsibinexatsi barapo peajuntuyapusuwa, po peajuntuyapusuwa jopa weraweracaeyo.

<sup>41</sup>“Jopa netsita ainya cuiyiyo xua bara jiwi tana nebaru cui itura jinaewa xua ainya cuin tanaexanaexae. <sup>42</sup>Matautano paca juntu coyene yaputainchi xua painya juntu coyeneintha jopa Nacom paantobem. <sup>43</sup>Xan, Nacom Taxa tana neitorobixae, pacata patopatsi, daichitha jopa pana nejume cowuntsim. Ichitha icha ichun pacata patopaetsipa pon pia coutha naitoroba, bapon xanepanaya pajume cowuntsipame. <sup>44</sup>Jopa paca itacupaeyo xua pana nejume cowuntsiname tsipei saya pananta xeiname xua pia jiwi paca necayabara baru cui itura jineibiwa. Jopa pananta xeinaem xua po coyene Nacom paca necayabara baru cui itura jinaewa tsane. <sup>45</sup>Jopa pananta xeinaeinde xua Taxatha tapaca yabara paewatsi xua po coyene abe painya neexanaewa. Xan dapon apara aibin xua abe tapaca yabara paewatsi. Paxam pananta xeiname, pana najam: ‘Caena bayatha Nacom nacana jume diwesi cata Moiestha xua jiwi pejume cowuntsiwa tsane. Jume cowuntatsi barapo diwesi, daxota Nacom naca capanenebiya tsane’, pana najam. Daichitha jopa paexanaem pocotsiwa Moisés paca itoroba. Poxoru tsipei jopa Nacom pajume cowuntsim daxota Nacomtha abe paexaname. <sup>46</sup>Icha pajume cowuntsipame pocotsiwa Moisés neyabara tinaeya paeba, metha iruru pana nejume cowuntsipame, tsipei Moisés neyabara tina. <sup>47</sup>Icha jopa pajume cowuntsim pocotsiwa Moisés neyabara paeba, bara paichipaem jopa pana nejume cowuntsipaem”, jei Jesús xua judiomona tsipaebatsi.

**Meje yabara poxonae Jesús apata pexaewa cinco mil pebiwi**  
(Mt 14.13-21; Mr 6.30-44; Lc 9.10-17)

**6** <sup>1</sup>Poxonae Jesús najume weta judiomonaetha, bapoxonae Jesús pijimonaе baru pona jeratha xua Galilea pucua icha muxunene

beya. Barapo pucua icha wun Tiberias pucua. <sup>2</sup>Pin bicheito Jesús puna poinchi, tsipei Jesús cui tainchi xua exana pia pexeinya petsita itutsi coyenewan, poxonae axaibi exana peatenewi. <sup>3</sup>Nexata Jesús pijimonae baru ecoinya demxuwa icha. Bapoxonae baxoteicha Jesús pijimonae baru ecopiya. <sup>4</sup>Imoxoyo bara nama patopaena matakabi xua judiomonae pia Pascua wun matakabi tatsi. <sup>5</sup>Jesús tane xua puna poinchi pin bicheito. Bapoxonae Jesús barai, Felipe baraichi jeichichi:

—¿Eta xota metha pexaewa barapomonae upain comocaeinchi? jei Jesús Felipetha.

<sup>6</sup>Baxua Jesús Felipe yainyabatsi, pia xua Felipe jume taetsi, xua po coyeneya Felipe pejume notsiwa tsane. Tsipei Jesús yaputane po coyeneya xua imoxoyo peexanaewa. <sup>7</sup>Nexata Felipe Jesús jume notatsi, jeye:

—Bequein doscientos po pan matabuxumonae comocaetsipathatsi jopa awiya jupaetsipae xua daxita barompaya pexexeinaponaewa barapo bicheito. Barapo denario paratiyo matawun xua bichocono matoma nawita xua caentaqueitha nexa xua matoma xeineiba pomonae penacuichiwi, jei Felipe.

<sup>8</sup>Bapoxonae Andrés pon irarx Jesús pijimonae tatsi jiwana jiton, pon Simón Pedro peweicho tatsi, bapon Jesús jeichichi:

<sup>9</sup>—Meje pewowin wuto uncue. Bapoyo cinco po panbe xeina, po pan xua cebada beno pan. Matautano bapoyo duweiyoy ainyobe capana. Ilchitha apara jopa yapu jupaeyo xua pin bicheito! jei Andrés.

<sup>10</sup>Nexata Jesús jume nota pijimonae, jeye:

—Daxita jiwi patsipaebare xua peenaewa tsane iratha, jei.

Baxota naepanaewan nawita. Baxota pebiwi iratha ena. Barapo bicheito bara be cou cinco mil pebiwi. <sup>11</sup>Nexata Jesús pecobetha pita pan, po pan xua pexuyo capatopa. Bapoxonae Jesús Paxatha tsipaeba: “Axa, maisa juntx coyene weiweinan xua pata tana necatsiwaxaem pexaewa”, jei Jesús. Bapoxonae Jesús pijimonae tsicobe jajanacapona pan. Equeicha Jesús pijimonae tatsi cacatsibapona barapo pan barapo cinco mil pebiwitha. Jesús barichiya exana poxonae duweiyobe pita. Matautano pijimonae tsicobe jajanacapona barapo bicheito nexa. Barapo cinco mil pebiwi bara xane xua ichichipa piyainxae. <sup>12</sup>Poxonae daxita tonsanaruxca, bapoxonae Jesús pijimonae barai:

—Panore xua barapomonae jiwana xane. Pajebare, jopa pabebande, jei Jesús.

<sup>13</sup>Barapomonae Jesús pijimonae tatsi nonotapona pocotsiwa barapo pin bicheito jiwana xaexaepona. Jesús pijimonae tatsi doce po cotebe wunba xua bayatha po cinco panbe jiwana xaexaepona pin bicheito po pan xua cebada beno pan. <sup>14</sup>Barapo cinco mil jiwi poxonae Jesús cui tainchi xua pexeinya petsita itutsi coyenewa exana, jeye:

—Apara bara bapon pon Nacom peitorobi jume pepaebin, pon xua juinya bewa pinae patopaena po nacuathe xua wanacuatha tsica, jei.

<sup>15</sup>Ichitha Jesús yaputane xua barapomonae ichichipa xua po coyene Jesús penaexanaewa tsane be pon jiwi itorobiya pia pepa peewatsinchi tsane barapo bicheito pia nacuatha tatsi. Daxota equeicha Jesús ponataba demxuwa beya, xua compa peecaenexa.

**Meje yabara poxonae Jesús mene matatsun jumatha pona**

*(Mt 14.22-27; Mr 6.45-52)*

<sup>16</sup>Poxonae quirei tsanaicha Jesús pijimonae tatsi pucua itapa bepareca. <sup>17</sup>Bapoxonae jeratha nonobabiya. Barapo pucua iya jeratha epatauta iyiya xua pepatsiwa tsane Capernaum tomara beya. Jesús cuenta iyiyatsi poxoru bayatha quirei, yawano poxoru Jesús jopa cataunxuae patopaeyo. <sup>18</sup>Bapoxonae pin joibo tsuxubi. Yawa maratsaca muxunenababa jera. <sup>19</sup>Poxonae Jesús pijimonae tuwatha yana panenebiya, bapoxonae Jesús pijimonae tainchi. Jesús mene matatsun juma dena pona jera dena. Bapoxonae barapomonae bichocono junuwa. <sup>20</sup>Ichitha Jesús pijimonae barai, jeye:

—iApara xan! iJopa pajunuwinda! jei Jesús.

<sup>21</sup>Bapoxonae Jesús pijimonae yaitaerucupatsi. Bapoxonae Jesús juntu coyene weiweinaya wabatsi pijimonae xua jeratha penontabinaenexa. Bapoxonae nainya patarucupa Capernaum tomaratha.

**Meje yabara poxonae jiwi Jesús wenaweneichi**

<sup>22</sup>Icha mataqueitha pin bicheito, pomonae umena pucua itapatha xua icha muxunenetha, barapomonae tane xua Jesús pijimonae cuenta ponarucupatsi jeratha, po jera saya bara cae nae xua po nae baxota boca. <sup>23</sup>Poxonae cataunxuae Jesús yabara nanta xeinatsi baxua, bapoxonae icha jera naein pata xua po naein Tiberias tomara werendena. Barapo jera naein pata ichaxota po iriyo itama tayeca xua ichaxota bayatha Jesús, pon Wanacanamataxeinaein, Paxa tsipaeba xua jeye: “Axa, maisa juntu coyene weiweinana xua pata tanecatsiwam pan”, xua jei, xuano xua baxota Jesús apata pan jiwitha. <sup>24</sup>Barapomonae yaputane xua Jesús aichurucuae. Matautano yaputane xua Jesús pijimonae tatsi aichurubena. Daxota jeran notarucupa Capernaum tomara be-iyiya xua Jesús pewenaweneiwa tsainchi.

**Meje yabara xua Jesús apara bapon yabara caunutatsi xua poxonae po pexaewa Nacom jiwi itaboco wetaitorobicatsi**

<sup>25</sup>Poxonae barapomonae pata icha muxunene beya xua pucua iya, bapoxonae Jesús tainchi. Barapomonae Jesús yainyabatsi, jeichichi:  
—Pon jiwi Necuidubim, zeta poxonae xote patopame? jei barapomonae.

<sup>26</sup>Jesús jume barai barapo jiwi, jeye:

—Xaniyan paca tsipaebatsi. Pana newenawenam, tsipei bayatha pana najain taneme pexaewa xua beya poxonae patonsaname. Apara jopa

baxua patsipatsim xua bayatha tapaca tsita exanaexaetsi pexeinya tatsita itutsi coyenewan. <sup>27</sup>Jopa pananta xeinaeinde xua saya pexaewa pana natsiupain nacuitame, po pexaewa saya nainya weraweraca. Saya meisa jame payabara nanta xeinare xua peajuntuyapusu coyenewa, po peajuntuyapusu coyenewa jiwi ajuntuyapusu exanatsi, po peajuntuyapusuwa jopa weraweracaeyo. Taxa, Nacom, barapo peajuntuyapusuwa necata, po peajuntuyapusuwa xuya paca catsinchi ponxaein Nacom Tananeitapetsin, jei Jesús.

<sup>28</sup>Nexata barapomonaе Jesús yainyabatsi, jeye:

—¿Eta xua bewa paexanaein xua xainyeya pata exanaewa tsane pocotsiwa Nacom ichichipa? jei.

<sup>29</sup>Nexata Jesús jume nota barapomonaе, jeye:

—Jame Nacom baxua ichichipa xua pata tanejume cowantsiwam tsane ponxaein xua barapon Nacom, Taxa, neitoroba, jei Jesús.

<sup>30</sup>Nexata barapomonaе Jesús yainyabatsi, jeye:

—¿Eta po jinya pexeinya netsita itutsi coyenewa, pana netsita itutsiname? Icha paca cui taeinchi baxua xua pana netsita itutsiname nexata bapoxonaе xua xain paca jume cowantatsi. <sup>31</sup>Ichaxota ira xuepana susato tsurucuae nacuatha wamo susato jiwi xane pexaewa, po pexaewa Nacom taitorobica itaboco wetsica. Barapo pexaewa maná matawun. Barapomonaе baxua cana exanatsi be pocotsi coyeneya Nacom Pejume Diwesitha yabara jeichichi: ‘Nacom cata barapomonaetha pexaewa, po pexaewa itaboco wetaitorobica’, jei Nacom Pejume Diwesitha, jei barapomonaе.

<sup>32</sup>Nexata Jesús jume barai barapomonaе, jeye:

—Xaniyan paca tsipaebatsi, Moisés barapo pexaewa apara jopa wamo susato jiwi catsichi, po pexaewa xua itaboco wetaitorobicatsi. Apara jame Nacom, Taxa, barapo pexainyei nabanae pexaewa taitorobica.

<sup>33</sup>Po pexaewa Nacom itaboco wetaitorobica, apara neyabara wunae caunuta. Nacom neitorobica xua tacana exanaewa tsane jiwi barapo cae pin nacuathe xua jiwi pexeinaewa tsane peajuntuyapusuwa, po peajuntuyapusuwa jopa weraweracaeyo, jei Jesús. <sup>34</sup>Nexata barapomonaе Jesús baraichichi, jeye:

—Patatanecanamataxeinaem, barapo pexaewa pana catsibeibare daxita matakabi tsaibi, jei.

<sup>35</sup>Jesús jume nota, jeye:

—Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wunae caunutsixae ponxaein jiwi peajuntuyapusuwa tacatsin. Bequein jiwi xaiba pexaewa daichitha equeicha jainpouneiba, yawa equeicha meratsipouneiba. Jame pon patopa taxantha yawa pon nejume cowunta bara xeina daxita pocotsiwa penantawenonaewa. <sup>36</sup>Bara bayatha bequein paca tsipaebatsi, daichitha



jopa pana nejume cowũntsim bequein pana netaneme. <sup>37</sup>Daxita pomonae xua Taxa necata, barapomonae bara tamonae. Barichi pomonae nejume cowũnta, barapomonae jopa beban tsane. <sup>38</sup>Xan apara jopa baxua tsipatopeicaeinyo itaboco wetsica xua taexanaewa tsane pocotsiwa tacoutha ichichipan. Apara saya jame baxua tsipatopan xua taexanaewa tsane pocotsiwa Taxa ichichipa. <sup>39</sup>Tsipei Taxa ponxae neitoroba, barapon ichichipa xua daxita jiwi beta ta-eenaewa tsane pomonae tana necatsixae. Mataũtano Taxa jopa ichipaeyo xua barapomonae jiwana caein tanexubiwa. Mataũtano Taxa ichichipa xua equeicha asũ cana exanaein petũpae coyene cuariya weya pomonae tana necatsixae xua poxonae po matabi opi ducuaenaba po cae pin nacuathe. <sup>40</sup>Paxam yabara paca tsipaebatsi xua pocotsiwa Taxa peichichipaewa. Daxita pomonae neyabara paebina po coyene xua xan apara Nacom Pexanton, xuano xua nejume cowũnta, barapomonae xeinaena peajũntũyapusũwa xua ataya tsiteca. Barapomonae asũ exanaein petũpae coyene cuariya weya poxonae matabi opi ducuaenaba po cae pin nacuathe, jei Jesús.

<sup>41</sup>Poxonae Jesús baxua nayabara paeba bapoxonae judiomonae Jesús abe yabara paebatsi, tsipei Jesús jeye: “Xan apara bapon po pexaewa Nacom itaboco wetaitorobica jiwi xua po pexaewa tana neyabara wũnae caunutsixae ponxaein jiwi peajũntũyapusũwa tacatsin”, jei Jesús. <sup>42</sup>Barapomonae najei caemonae:

—Apara bapon Jesús, José pexanto tatsi. Apara coxiyũn bayatha yaputainchi, coxiwano yaputainchino. ¿Eta pocotsiwa metha naca tsipaeba xua pinae itaboco wetsica pona? najei barapomonae.

<sup>43</sup>Nexata Jesús jume barai, jeye:

—Jopa caemonae pana natsipaebinde xua abe papaebame. <sup>44</sup>Dapon aibi pon peitacũpaewatsi xua pia coutha pepatopaewa xantha xua tana nepuna ponaewa tsane icha Taxa pon tana neitorobixae, pia coutha jopa copatsiyo xua jiwi pepatsinexa xantha. Barapomonae asũ exanaein petũpae coyene cuariya weya poxonae po mataqueitha daxita weraweracaena po nacuathe. <sup>45</sup>Nacom peitorobi jume pepaebiwi pia petinae diwesintha jeye: ‘Daxita jiwi Nacom yaputane cana exanaena’, jei barapo Nacom peitorobi jume pepaebiwi pia petinae diwesintha. Daxota daxita pomonae Taxa jume tainchi xuano xua jume cowũntatsino barapomonae bara pata taxantha.

<sup>46</sup>“Dapon aibi pon Taxa tainchi. Jame meisa ponxaein itaboco wepatopeican bara Taxa tan. <sup>47</sup>Xaniyan paca tsipaebatsi, pon nejume cowũnta bapon jame xeinaena peajũntũyapusũwa, po peajũntũyapusũwa jopa weraweracaeyo.

<sup>48</sup>Xan apara bapon xua po pexaewa Nacom itaboco wetaitorobica jiwi xua po pexaewa tana neyabara wũnae caunutsixae ponxaein jiwi peajũntũyapusũwa tacatsin. <sup>49</sup>Painya amo susato jiwi pexaewa xane ichaxota ira xuepana susato tsurucuae nacuathe. Barapo pexaewa maná matawũn. Bequein bara

barapo pexeinya pexaewa nabane daichitha matapainya werapa. <sup>50</sup>Paxam yabara paca tsipaebatsi po pexaewa Nacom itaboco wetaitorobica jiwi xua po pexaewa tana neyabara wuna caunutsixae. Pon nejume cowuntsina jopa weraweracae tsane icha ichun ichi xua poxonae xane barapo pexaewa jopa tupaeyo. <sup>51</sup>Xan apara bapon xua po pexaewa Nacom itaboco wetaitorobica jiwi, po pexaewa ayapusu, xua po pexaewa tana neyabara wuna caunutsixae. Pon xua nejume cowunta bara ataya poponaena icha ichun ichi xua poxonae xane barapo pexaewa bara asu. Po pexaewa xua yabara paeban, apara tapepon xua paca catatsi painya nenabanaewa tsane. Tapaein xua jiwi pexeinaewa tsane peajuntuyapusuwa”, jei Jesús.

<sup>52</sup>Nexata judiomonae caemonae najume matsontsonoba, najei:

—¿Eta pocotsiwa metha bapon naca tsipaeba xua naca catapaeba pia pepon xua wanabanaewa tsane? jei barapomonae.

<sup>53</sup>Jesús barai barapomonae, jeye:

—Xaniyan paca tsipaebatsi xan ponxaein Nacom Tana neitapetsin. Icha jopa paxaem tsane tapepon, yawa icha jopa paapaem tsane tajana, jopa paxeinaem tsane peajuntuyapusuwa, po peajuntuyapusuwa jopa weraweracae. <sup>54</sup>Pon xua tapepon xane yawa xua apa tajana, bapon xeinaena peajuntuyapusuwa, po peajuntuyapusuwa jopa weraweracae. Yawa bapon asu exanaein petupae coyene cuariya weya po mataqueitha poxonae daxita weraweracaena po cae pin nacuathe. <sup>55</sup>Tsipei tapepon be pexeinya pexaewa poxonae xua jiwi pexaewa tsane. Yawa tajana be pexeinya peapaewa xua jiwi peapaewa tsane. <sup>56</sup>Pon tapepon xane yawa apa tajana, bapon nebaru poponeibina yawa xan baru poponeibin. Tsipei poxoru bapon neyabara jume cowunta xua xan bapon pia pepon tatsi tsitupan, yawano xua tajana othoparenaewa bapon nexa xua abe pia peexanae cuiru coyenein tatsi nexa. <sup>57</sup>Taxa ponxae neitoroba bapon ataya asu poponeiba. Iruru xan barichin ataya asu poponeiban tsipei Taxa necata pia peajuntuyapusuwa, po peajuntuyapusuwa jopa weraweracae. Barichiru pon xane tapepon, xua poxonae tana nejume cowuntsiwa, bapon asu poponeibina tacatsixae peajuntuyapusuwa. <sup>58</sup>Xan yabara paeban pexaewa, po pexaewa Nacom itaboco wetaitorobica jiwi. Barapo pexaewa jopa tupaeyo, xua icha be maná matawun ichi, po pexaewa painya amo susato jiwi xane. Daichitha barapomonae matapainya werapa. Po pexaewa yabara paeban icha ichun xane barapo pexaewa, bapon xeinaena peajuntuyapusuwa, po peajuntuyapusuwa jopa weraweracae, jei Jesús.

<sup>59</sup>Baxuan Jesús cuiduba judiomonae pia penacaetutsi botha tatsi xua Capernaum tomaratha.

**Meje yabara poxonae Jesús yabara paeba peajuntuyapusuwa,  
po peajuntuyapusuwa jopa weraweracae**

<sup>60</sup>Pinmonae pomonae Jesús puna poinchi, poxonae barapomonae Jesús jume tainchi pia pecuidubiwa, bapoxonae barapomonae najei:

—Pocotsiwa bapon paeba maisa bichocono ayapube xua wayabara jume cowantsiwa. ¿Jintam metha itacupatsi xua peexanaewa tsane pocotsiwa bapon paeba? najei.

<sup>61</sup>Ichitha Jesús yaputane pocotsiwa xua peyabara paebiwatsi barapomonaē xua peayapubexae pocotsiwa Jesús pepaebiwa. Nexata Jesús yainyaba barapomonaē, jeye:

—Pocotsiwa aunxuae paca tsipaebatsi, ¿baxua pacata ayapube? <sup>62</sup>¿Eta xua metha pananta xeinaetsipame icha pana netaetsipame xua athabe taichaewa itaboco beicha ichaxota bayatha poponan ponxaein Nacom Tananeitapetsin? <sup>63</sup>Jiwi asu jinompa poxoru xeina pejumope tñaxu. Poxonaē pejumope tñaxu panepa jiton ba pia pepon tupa. Icha pejumope tñaxu ichi xua jiton asu exainchi pia pepon, barichi xua xan pocotsiwa tapaca tsipaebiwatsi barapo jume paca juntu coyene ayapusu cana exana xua jopa painya neweraweracaewa tsane. <sup>64</sup>Ichitha cataunxuae pinmonaē pomonaē paxam jiwana pam, jopa nejume cowantsiyo, jei Jesús.

Caena bayatha Jesús copiya wunaē tsiwanaya yaputane pomonaē jopa pejume cowantsiwa tsainchi. Matautano caena bayatha Jesús copiya wunaē tsiwanaya yaputane pon pecaenaetsiwa tsainchi tsane ichamonaetha xua pebexubiwa tsainchi Jesús. <sup>65</sup>Equeicha Jesús barai pomonaetha pomonaē pia pepuna ponaewichi, jeye:

—Daxota paca jeichi: ‘Dapon aibi pon peitacupaewatsi xua pia coutha pepatopaewa xantha xua tana nepuna ponaewa tsane, icha Taxa pia coutha jopa copatsiyo xua bara jiwi pepatsiwa xantha’, paca jeichi, jei Jesús.

<sup>66</sup>Poxonaē Jesús baxua paeba bapoxonaē pin bicheito pomonaē Jesús pepuna ponaewichi barapomonaē Jesús cuenta warapatsi. Barapomonaē equeicha nama jopa Jesús puna ponaetsi. <sup>67</sup>Bapoxonaē Jesús pijimonaē yainyaba pomonaeyoxae xua doce poyobe, pomonaē Jesús pijimonaexae tatsi. Jesús pijimonaē barai, jeye:

—¿Paxam painya iru ponaetsiru? jei Jesús.

<sup>68</sup>Nexata Simón Pedro Jesús jume notatsi. Pedro jeye:

—Patatanecanamataxeinaem, dapon aibi tsipae pon papuna ponan icha paca cuenta ponaetsipatsi. Saya meisa payaputan xua meisa xam compam yabara pana netsipaebame peajuntuyapusuwa, po peajuntuyapusuwa jopa weraweracaeyo. <sup>69</sup>Paxan paca jume cowantatsi. Matautano payaputan xua xam apara pon Nacom caitoroba, pon pepa Nentacuiruyapuxanepanaem, jei Simón Pedro.

<sup>70</sup>Jesús pijimonaē jume nota, jeye:

—Paxam pomonaē doce poyobe pam pomonaē tapaca caitapetsiwichi pam. Daichitha caein jiwana pam cauri piamonaē jiton tatsi, jei Jesús.

<sup>71</sup>Poxonaē Jesús baxua paeba, Jesús yabara paeba Judas, Simón Iscariote pexanto tatsi. Bapon Judas Jesús caenaetsinchi bequein bapon

caein jiwana pomonae Jesús pijimonaexae tatsi, pomonae doce poyobe tatsi.

**Meje yabara poxonae Jesús jopa yabara jume cowantichi peweicho jiwi**

**7** <sup>1</sup>Bapoxonae Jesús popona ducuaeta baxota xua Galilea nacuatha. Jesús aichaxaibi xua pepoponaewa Judea nacuatha, tsipei judiomonae, pomonae baxota jinompa, ichichipa xua Jesús pebexubiwatsi. <sup>2</sup>Bara nama imoxoyo tsurucuae tsozonaeba po maticabintha judiomonae jinompa tsica bomuxuxitha xua penabanaenexa pexaewa. Barapo maticabin ba judiomonae cayabara nanta xeina xua caena bayatha pinae pia pamo susato jiwi tatsi jinompa tsica bomuxuxitha ira xuepana susato tsurucuae nacuatha. <sup>3</sup>Jesús baraichi pia peweicho jiwi, jeye:

—Jopa xote poponaende. Judea nacia beya warapiyama xain baxotiya jinyamonae cacui tane pocotsiwa exaname xua jinya netsita itutsiwa.

<sup>4</sup>Pon xua ba ichichipa peyaputaewatsi daxita jiwi, bapon ba daxita jiwi peitutha exana po coyene xua moya peyawun xeinaewa po coyene jiwi copiya jopa yabara yaputaeyo. Bapon ba jopa nameicha exanaeyo. Xam iruru barichinde. Daxita jiwi peitutha exande xain cacui tane xua jinya netsita itubiwa neexanaewam, jeichichi Jesús peweicho jiwi.

<sup>5</sup>Baxua Jesús baraichichi peweicho jiwi, tsipei Jesús jopa jume cowantichi peweicho jiwi. <sup>6</sup>Nexata Jesús jume barai peweicho jiwi, jeye:

—Apara inta cataunxuae dapo maticabi aichica, po mataqueitha tana naitutsiwa judiomonaetha xua Judea nacuatha. Ichitha poxonae paichichipame xua painya neponaewa moya bara paponde Judea nacia beya. <sup>7</sup>Pomonae jopa Nacom jume cowantichi barapomonae jopa paca casebiyo. Ichitha xan necaseba tayabara paebixae xua po coyene pocotsiwa barapomonae exana pejuntu coyeneintha apara abe. <sup>8</sup>Paxam bara moya paponde ichaxota judiomonae nacaetuta xua penabanaenexa pexaewa. Xan nama jopa ponaeinyo cataunxuae canta tamaticabi aichica, jei Jesús.

<sup>9</sup>Poxonae Jesús baxua najume weta, bapoxonae abu cataunxuae Galilea nacuatha popona be caentacabiyobe xua pecoyo weya peponaenexa.

**Meje yabara poxonae Jesús nasiwa pona Jerusalén tomara ichaxota judiomonae nacaetuta xua penabanaewa tsane pexaewa**

<sup>10</sup>Poxonae Jesús peweicho jiwi tatsi bayatha ponaba penabanaenexa pexaewa iru Jesús bara beya pona. Jesús compa nameicha pipatotha pona. Jopa peburuya naponae jiwitha. <sup>11</sup>Barapo judiomonae penacaetutswatha Jesús wenaweneichi. Barapo judiomonae pia pentacaponae tatsi caemonae nayainyaba, najei:

—¿Incane methara? ¿Exota metha popona bapon? najei barapomonae xua Jesús yabara paebatsi.

<sup>12</sup>Barapo pin bicheitomonaetha ichamonae Jesús yabara paxapaxeya paebatsi. Ichamonae jeye: “Bapon apara pejuntũ coyene xanepanaein”, jei. Ichamonae jeye: “Bũũ, metha jume, apara jiwi muxujainyabeibatsi”, jei barapomonaē.

<sup>13</sup>Ichitha dapon aibi pon pentha pejume jinaewa jiwi peitũtha xua Jesús peyabara paebiwatsi, tsipei judiomonaē pia pentacaponawewi tatsi cunuwatsi.

<sup>14</sup>Poxonaē cuatro po matakabinbe yapucaewa xua poxonaē judiomonaē po matakabintha nacaetuba, bapoxonaē Jesús joniya Nacom pin pia botha. Mataũtano baxota tamropata pitaba xua pecuidubiwa jiwitha.

<sup>15</sup>Bapoxonaē judiomonaē yabara najuntũ cui coyene cabenaeca pocotsiwa Jesús beta caununaya pepaebiwa. Yawano najei:

—¿Eta xua metha bapon bichocono yaputane diwesi bequein jopa nacuidubiyo diwesi xua jopa barichiyo xua waxainchi wepu wanacuidubiwatsi diwesi? jei.

<sup>16</sup>Jesús jume nota barapomonaē, jeye:

—Po diwesi jiwi cuiduban apara jopa barompaya tacuidubi coyenewa. Saya apara Taxa pia pecuidubi coyenewan tatsi jiwi cuiduban, pon tanecui itorobixae baxua. <sup>17</sup>Icha ichũn ichichipa exana pocotsiwa Nacom ichichipa, bapon necayabara yaputaena xua po coyene tacuidubi coyenewa. Bapon yaputaena icha metha bara cuiduban pocotsiwa Taxa neitoroba, xuano xua ichacuiitha icha metha apara cuiduban pexeinya peayapusũ itorobi coyenewatha po coyene xua tawa xua saya tacoutha ichichipan. <sup>18</sup>Pon barompaya pia diwesi pia coutha nayabara paeba, apara bapon pia xua wũnae yabara paebichi xua jiwi wũnaeya peyabara paebiwa tsane. Ichitha ichũn pon ichichipa xua jiwi Nacom wũnae pejainchiwatsi pon Nacom bapon peitorobixaetsi, bapon jame po diwesi pexainyei diwesi paeba. Bapon jame jopa pemuxuitorobin jiwi.

<sup>19</sup>“Moisés paca cata pia peitorobi coyenewa. Daichitha jopa pacayabara jume cui cowũntsiya exanaem. Bequein Moisés paca cui itoroba xua bepa pinae jopa jiton pabexubim tsane. Dapo jumetha, ¿eta xua metha paichichipame xua pata tanebexubiwam?” jei Jesús.

<sup>20</sup>Daxita barapomonaē Jesús jume notatsi, jeye:

—iApara cou cauri xeiname! Dapon apara aibi pon cabexubapaeba, jei judiomonaē.

<sup>21</sup>Jesús jume barai barapomonaē, jeye:

—Daxita paxam payabara najuntũ cui coyene cabenaecame, tsipei pebin axaibi exanan po matakabitha pentaquei seicae matakabitha.

<sup>22</sup>Ichitha paxam irũ panacuитеibame barapo matakabitha. Moisés paca cata pia peitorobi coyenewa xua pexui painya newi thabiwa xua ichaxota pebiwichi xeinatsi xua ichaxota nareixacaena xua ocho po matakabibetha poxonaē yapu othopeiba. Ichitha Moisés jopa tamropata pitabiyo baxua,

saya jame painya amo susato jiwi tamropata notarucupa baxua. Poxonae ocho po matabibe yapu othopeiba pawí thabame pebin wutixi bequein poxonae pentaquei seicae matabi pataetham. <sup>23</sup>Paxam paichichipame xua painya yabara jume cui wetsiwa xua pocotsiwa Moisés paca cui itoroba. Daxota pexui pebin wutixi pawí thabame ichaxota pebiwichi xeinatsi xua ichaxota nareixacaena bequein pentaquei seicae matabi pataetham poxonae. Icha bara paichim pentaquei seicae matabitha, ¿eta pocotsiwa metha pana necasebame xua pebin axaibi taexanaexae pentaquei seicae matabitha? <sup>24</sup>Painya xoba pebin payabara paebame xua penatsicuentiwa xua abe peexanaexae Nacomtha poxonae cataunxuae jopa payaputaem pocotsiwa pebin abe exana. Jame metha copiya pacui yaputaema xua icha bara metha pebin abe exana tsipei methapara barapo pebin xanepanaya exana.

### **Meje yabara xua Jesús yabara paeba xua ichaxota copiya popona**

<sup>25</sup>Pomonae Jerusalén tomaratha jinompa, poxonae barapomonae Jesús baxua jume tainchi, nayainyaba. Barapomonae najei:

—¿Metha apara baponje, pon yabara paebatsi ichamonae xua bepa pinae pon bexubichi? <sup>26</sup>Bapon apara jiwi peitabaratha paebuncuajeba. Ichitha dapon aibi pon pejume matawentsiwatsi bapon. ¿Metha poxoru pentacaponaeawi bapon yabara nanta xeinatsi xua bapon barapara Mesías pon Nacom itoroba daxota jopa pejumeyo barapomonae? <sup>27</sup>Ichitha waxainchi yaputainchi xua ichaxota werena pona bapon. Jame poxonae Mesías patopaena dapon ajibi tsane pon yaputaena xua ichaxota werena peponaewa Mesías, jei barapomonae, pomonae Jerusalén tomarapiwi.

<sup>28</sup>Jesús cuiduba jiwi Nacom pin pia botha tatsi. Poxonae Jesús baxua jume tane pocotsiwa jiwi paeba, bapoxonae Jesús jume daunweya wawai, jeye:

—Pana neyabara cananta xeinaeya yaitaneme. Yawa pana neyabara nanta xeiname xua payaputaneme xua ichaxota werena taponawa. Apará jopa tsipatopaeinyo xua taexanaewanexa pocotsiwan ichichipan tacoutha. Mexeya apara daxota tsipatopan ichun tana neitorobixae pon xua yabara jume xainyeichi xua barapon bara eca peitabocotha. Bapon paxam jopa payaputaem. <sup>29</sup>Bapon bara yaitan tsipei bapon pexainya wetsica ponan. Matautano bapon neitorobica, jei Jesús.

<sup>30</sup>Bapoxonae bequein barapomonae ichichipa xua Jesús pewaetabiwatsi, ichitha Jesús jopa waetabichi tsipei cataunxuae Jesús pia matabi jopa tapatopeicaetsi. <sup>31</sup>Pin bicheitomonae Jesús yabara jume cowuntatsi xua Jesús apara bara Mesías. Barapomonae Jesús yabara jeichichi:

—Barapo pebin pexeinya petsita itutsi coyenewan exana be pocotsi coyene bayatha Nacom peitorobi jume pepaebiwi paeba xua juinya pinae Mesías pocotsiwa exanaena, jei barapomonae.

**Meje yabara poxonaē fariseomonaē itoroba  
policiamonaē xua Jesús pewaetabiwa tsainchi**

<sup>32</sup>Bapoxonaeru fariseomonaē jume tane pocotsiwa jiwi Jesús yabara baraichi: “Bapon apara Cristo”, xua jei jiwi. Nexata bapoxonaē fariseomonaē iruru sacerdotemonaē pia pentacaponae wi tatsi, daxita barapomonaē itoroba policiamonaē Nacom pin pia bo beya xua Jesús pewaetabiwa tsainchi. <sup>33</sup>Nexata Jesús jei jiwitha:

—Saya caeto paca baru popoinchi. Bapoxonaē pirapaeyo equeicha tacoya beicha Taxa beicha ponaein pon tana neitorobixae. <sup>34</sup>Paxam pana newenawenam tsane ichitha jopa pana necaxinaem tsane. Tsipei jopa paca itacupaē tsane xua painya neponaewa xua ichaxota taponae wa tsane, jei Jesús.

<sup>35</sup>Nexata judiomonaē caemonaē nayainyaba, najei:

—¿Exota metha bapon ponaena xua jopa wacaxinaewa tsainchi? ¿Metha icha judiomonaetha ponaena jampa po judiomonaē icha nacua werena pona po judiomonaē griegomonaē baru jinompa jampa? Metha pia bapoxonaē bapon cuidubichi barapo judiomonaē, griegomonaeno. <sup>36</sup>¿Eta xua metha baxua caunuta poxonaē naca jei: ‘Paxam pana newenawenam tsane ichitha jopa pana necaxinaem tsane, tsipei jopa paca itacupaē tsane xua painya neponaewa xua ichaxota taponae wa tsane’, poxonaē xua naca jei? najei judiomonaē.

**Meje yabara poxonaē Jesús yabara paeba xua ira buxupana  
mene epatoyaya ichawa beya mene pona**

<sup>37</sup>Po matabi opi ducuanayaba xua po mataqueitha judiomonaē nacaetuta xua penabanaenexa pexaewa, barapo matabi bichocono peainya cui matabi. Barapo matabitha Jesús uncua jiwi peitabaratha tatsi. Matautano jume daunweya wawaya jeye:

—Icha ichun meratsipa, bu pona xan berena xua peapaenexa mera.

<sup>38</sup>Nacom Pejume Diwesitha paeba: Pinae pon tana nejume cowuntsiwa bichocono juntu coyene yuyuca exanaponaeinchi po coyene xua tana nejume cowuntsiwa, icha be pinae mene ichi tsane po mene ira buxupana mene, po mene xua ichawa beya epatoyaya mene pona bichocono pemene nauuca ponaexae, jei Jesús.

<sup>39</sup>Baxua Jesús paeba, xua pomonaē pejume cowuntsiwa tsainchi, barapomonaē pinae xeinaena Nacom pia Pejumope tūnaxu tatsi. Ichitha cataunxuae Nacom pia Pejumope tūnaxu tatsi aichica. Tsipei cataunxuae Jesús jopa tupaeyo naetha. Matautano tsipei cataunxuae jopa ponaeyo Nacom beicha. Bapoxonaē bexa tsane barapomonaē pomonaē Jesús pejume cowuntsiwichi xeinaena Nacom pia Pejumope tūnaxu tatsi.

**Meje yabara poxonae jiwi Mesías yabara najume matsontsonobatsi**

<sup>40</sup>Baxota iruru ena ichamonae pomonae Jesús jume tainchi poxonae yabara paeba mera. Barapoxonae barapomonae najume matsontsonobiya paeba. Ichamonae jeye:

—Apara barapo pebin pon Nacom peitorobi jume pepaebin, pon wunaewatatsi, pon bewa juinya patopaena, jei.

<sup>41</sup>Ichamonae jeye:

—Apara barapo pebin, bapon apara Mesías pon Nacom itorobeicapaeba peitaboco wetsica, jei.

Ichitha ichamonaeru jeye:

—Jume apara, apara Mesías aibi, tsipei Mesías jopa patopaeyo Galilea nacua werena. <sup>42</sup>Tsipei Nacom Pejume Diwesitha jeye: ‘Bapon Mesías itorobarecaein. Bapon Mesías David pia pemomoxi susato jiwanapin tatsi, pon caena bayatha Judea nacuamonae itorobiya pia pepa peewatsinchi tatsi naexana. Bapon Mesías Belén tomaratha naexanaena, po tomaratha David ichaxota popona bayatha’, jei Nacom Pejume Diwesitha, jei barapomonae.

<sup>43</sup>Daxota pinmonae najume matsontsonoba, tsipei daxita barapomonae Jesús ichawa beya barompaya yabara nanta xeinatsi. <sup>44</sup>Barapomonae jiwanamonae bequein ichichipa xua Jesús pewaetabiwatsi, ichitha dapon aibi pon Jesús pewaetabiwatsi.

**Meje yabara poxonae pentacaponaeawi jopa Jesús yabara jume cowuntichi**

<sup>45</sup>Bapoxonae policiamonae pomonae Nacom pin pia bo peyapu eenaewi nawibiya fariseomonae beya yawa sacerdotemonae pia pentacaponaeawi tatsi beyano. Daxita barapomonae policiamonae yainyabatsi, jeichichi:

—¿Eta xua metha jopa pacarendenaem Jesús? jei daxita.

<sup>46</sup>Barapo policiamonae jume nota barapomonae, jeye:

—iDapon aibi ichun pon beta pepaebiwa, icha bapon ichi xua beta wunaeya paeba! jei.

<sup>47</sup>Daxita nexata barapomonae policiamonae jume notatsi, jeye:

—¿Paxam iruru jiwi pacui jupame, xua iruru pajume cowuntame bequein bara bapon paca muxuitoroba? <sup>48</sup>Tsipei apara jopa payaputaem xua judiomonae pia pentacaponaeawi tatsi jopa yabara jume cowuntsiyo bapon. Iru fariseomonae pia pentacaponaeawi tatsiru jopa yabara jume cowuntsiyo bapon. <sup>49</sup>Pomonae Jesús jume cowuntatsi apara barapomonae jopa yaputaeyo pocotsiwa Nacom paeba pia peitorobi jumeintha. Barapomonae apara Nacom atene cana exanaena xua petsita natsicuentisixaetsi xua abe petsita exanaexaetsi, jei daxita fariseomonae.

<sup>50</sup>Barapo fariseomonae jiwanapin baxota eca, pon pewun Nicodemo, pon merawitha bayatha Jesús siwa poinchi. Bapon Nicodemo jeye fariseomonaetha xua ichamonaetha:



<sup>51</sup>—Waitorobi coyenewatha ba jeichichi: ‘Jopa bewa yabara paebichi pebin xua penatsicuentiwa xua abe peexanaexae poxonae cataunxuae jopa jume taetsi bapon pocotsiwa exana. Jame copiya matha bewa jume taetsi xua bapon pia coutha nayopita xua pocotsiwa exana’, ba jeichichi, jei Nicodemo.

<sup>52</sup>Nexata fariseomona Nicodemo jume notatsi, jeye:

—¿Xam iruru barichim Galilea nacuapin naexaname, po Galilea nacuapiwi jopa beta yaputaeyo? Maisa jame matowa yorobare Nacom Pejume Diwesi. Xain yaputaneme xua dapon aibi pon xua Nacom peitorobi jume pepaebin, pon Galilea nacua werena pona, jei fariseomona.

**Meje yabara poxonae yabuyo abe exana poxonae nasi cui wainmeinta icha pebintha bequein pia pebin xeinaetha**

<sup>53</sup>Nexata daxita barapomona barompaya pia bon be-iyiya.

**8** <sup>1</sup>Nexata Jesús pona demxuwá beya, po demxuwá pewan demxu Olivowa. <sup>2</sup>Icha matabitha poxonae pentha tsina, bapoxonae equeicha Jesús caibeya pona Nacom pin pia bo tatsi beya. Pinmonae Jesús imoxoyo caquita poinchi. Jesús eca yawa tamropata pitaba xua pecuidubiwa jiwi. <sup>3</sup>Bapoxonae judiomona, pomona jiwi pecuidubiwi Moisés pia peitorobi coyene tatsi, iruru fariseomona, daxita barapomona carendena petsiriwa Jesús pia xantha tatsi. Barapomona cui taepona poxonae barapo petsiriwa nasi cui wainmeinta icha pebintha bequein pia pebin xeinaetha. Bapoxonae daxita barapomona barapo petsiriwa cuaranotatsi pin bicheito itabarayo deca xuano xua Jesús peitabarayo deca tatsi. <sup>4</sup>Daxita fariseomona iruru judiomona, pomona jiwi pecuidubiwi Moisés pia peitorobi coyene tatsi daxita barapomona Jesús baraichi, jeye:

—Pon jiwi Necuidubim, paxan jemeicha pacui taeponan xua barapo yabuyo abe exana, poxonae nasi cui wainmeinta icha pebintha bequein pia pebin xeinaetha. <sup>5</sup>Moisés pia peitorobi coyenewatha naca tsipaeba xua pinae bewa tupa exanaetsi ibowantha powaxi poxonae barapo coyene exana xua abe exana. ¿Incane iru xamdu? ¿Jinya eta xua pana netsipaebichi xua pata cana exanaewa bapowatha? jei.

<sup>6</sup>Baxua naemata Jesús yainyabatsi, pia poxonae Jesús abeya jume notsina bapoxonae pia barapomona Jesús abe yabara paebichi. Nexata bapoxonae Jesús irabe taecuareca yawano ira tinano pecobesitha. <sup>7</sup>Tsipei barapomona matowa Jesús yainyabatsi, daxota Jesús equeicha nantacotaxuba. Yawano barai barapomona, jeye:

—Caein paxam jiwana pam, pon bapana jopa abe exanae, bu bapon jame copiya matha bapowa cuintabatsi ibototha, jei Jesús.

<sup>8</sup>Equeicha Jesús irabe taecuareca. Yawano equeicha Jesús ira tina pecobesitha. <sup>9</sup>Ichitha poxonae barapomona Jesús jume tainchi,

bapoxonae daxita barapomonae barompaya nanthuthu cayabara nanta xeina xua iruru abe exanaru barapomonae. Daxita barapomonae Jesús pia xainya weya tatsi tsana nanatsixibapona. Copiya penapataewi pona, bapoxonae cotacaya ichamonae nawibiya, beya jiwaibi. Saya meisa barapo yabuyo compa uncua Jesús pia xantha tatsi. <sup>10</sup>Bapoxonae Jesús equeicha nantacotaxuba. Yawa Jesús tane barapo yabuyo xua compa uncua pia xantha tatsi. Jesús barai yabuyo, jeye:

—¿Incane dapomonae? ¿Dapomonae aibi pomonae cayabara paeba xua nenatsicuentisiwa xua abe neexanaexae Nacomtha? jei Jesús.

<sup>11</sup>Barapowa Jesús jume notatsi, jeye:

—Jume, Tanecanamataxeinaein, dapomonae aibi pomonae neyabara paeba xua tanatsicuentisiwa xua abe taexanaexae Nacomtha, jei.

Nexata Jesús barai bapowa, jeye:

—Xan iruru jopa cayabara paebi tsainchi xua nenatsicuentisiwa xua abe neexanaexae Nacomtha. Nawiyama, equeicha jopa abe peexanae cuiuru coyene exanaeinde, jei Jesús.

**Meje yabara poxonae Jesús namchi, jeye: “Icha pecoicha ichi xua jiwi beta tane cana exainchi merawi, barichin xan jiwi cana exanan xua Nacom beta peyaputaewatsi”, jei Jesús**

<sup>12</sup>Equeicha Jesús tsipaeba jiwi Nacom pin pia botha. Jesús jeye:

—Icha pecoicha ichi xua jiwi beta tanecana exainchi merawi, barichin xan jiwi cana exanan xua Nacom beta peyaputaewatsi xua pomonae jinompa po cae pin nacuathe. Pon nejume cowanta, bapon xeinaena peajuntuyapusuwa, po peajuntuyapusuwa ataya tsiteca xua bapon jopa abe peexanaenexa, jei Jesús.

<sup>13</sup>Nexata fariseomonae Jesús baraichi, jeye:

—Xam apara jinya coutha nayabara diwesi paebame, daxota jopa be paca jume cowantichi tsipei jopa ainya cuiyo pocotsiwa paebame, jei fariseomonae.

<sup>14</sup>Jesús jume nota barapomonaetha, jeye:

—Xua xan nayabara diwesi paeban, baxua apara xainyan, bequein bara tacoutha nayabara diwesi paeban saya. Tsipei yaputan ichaxota werena taponae xua ichaxota beya taponae tsane. Ichitha paxam jopa payaputaem ichaxota werena taponae xua ichaxota beya taponae tsane. <sup>15</sup>Paxam jiwi payabara paebame xua penatsicuentisiwa xua abe peexanaexae Nacomtha saya xua poxonae pataneme xua exana icha po cae pin nacuathepiwi ichi. Xan jopa bapana jiwi yabara paebinyo xua penatsicuentisiwa xua abe peexanaexae Nacomtha saya xua poxonae tan xua exana. <sup>16</sup>Icha jiwi yabara paeban xua penatsicuentisiwa xua abe peexanaexae Nacomtha bara pexainyei coyeneyatha exanan. Tsipei jopa bapana companyo poxonae jiwi yabara paeban xua penatsicuentisiwa

xua abe peexanaexae Nacomtha tsipei Taxa Nacom nebaru exana baxua pon tana neitorobixae. <sup>17</sup>Painya itorobi coyenewatha jeye: ‘Icha ichunbe nanta jupaeya yabara paebabe pocotsiwa tanebe bewa baponbe pajume cowuntsiname tsipei baxua apara ainya cui’, jei. <sup>18</sup>Xan tacoutha nayabara diwesi paeban. Iruru Taxa neyabara diwesi paeba, pon tana neitorobixae. Daxota Taxa pana nacueyatanbe, jei Jesús.

<sup>19</sup>Nexata barapomonae Jesús yainyabatsi, jeye:

—¿Incane Axa, exota poponara? jei.

Jesús jume nota, jeye:

—Paxam jopa pana neyaitaem, matautano Taxa jopa payaitaem. Icha pana neyaitaetsipame bapoxonae metha payaitaetsipame Taxa, jei Jesús xua fariseomonae tsipaebatsi.

<sup>20</sup>Baxuan Jesús caunuta poxonae tsipaeba jiwi Nacom pin pia botha tatsi. Jesús imoxoyo uncua ichaxota jiwi jeba paratixi Nacom nexa. Dapon aibi pon Jesús pewaetabiwatsi, tsipei Jesús pia matacabi cataunxuae taachicatsi.

**Meje yabara poxonae Jesús namchi: “Jopa paca itacupaes tsane xua painya neponaewa tsane ichaxota taponawa tsane”, jei Jesús**

<sup>21</sup>Equeicha Jesús jeye barapo fariseomonaetha:

—Bexa equeicha caibeicha ponaein. Paxam pana neitaxanaename painya tapaca cayawenaenexa tsainchi abe painya neexanae cuiru coyenein weya. Jopa paca capanepae tsainchi abe painya neexanae cuiru coyenein weya xua poxonae pawerapaename. Jopa paca itacupaes tsane xua painya neponaewa ichaxota taponawa tsane, jei Jesús fariseomonaetha.

<sup>22</sup>Nexata judiomonaes caemonaes najei:

—¿Eta pocotsiwa metha bapon naca tsipaeba xua pinae jopa tae tsainchi xuano xua pinae jopa naca itacupaes tsane xua waponawa ichaxota bapon peponaewa tsane? ¿Metha pia coutha pia nabexuichi? jei judiomonaes.

<sup>23</sup>Nexata Jesús barai judiomonaes, jeye:

—Paxam saya betsiquepiwi pam. Xan seicaya nama athabeicha tapoponaein. Paxam seicaya nama po cae pin nacuathepiwi pam. Xan nama po cae pin nacuathepin aibi. <sup>24</sup>Daxota bayatha paca jeichi: ‘Paxam jopa paca capanepae tsainchi abe painya neexanae cuiru coyenein weya poxonae pawerapaename’, jan. Tsipei jopa pana neyabara jume cowuntsim po coyene xua bara tana neitacupaewa xua tapaca cayawenaewatsi, daxota pamuxuna werapaename abe painya neexanae cuiru coyenein, jei Jesús judiomonaetha.

<sup>25</sup>Nexata barapomonae Jesús yainyabatsi, jeye:

—¿Jintam xamda? ¿Etapo jitom? jei.

Jesús jume nota barapomonaе, jeye:

—Poxonaе aena tamropata pitaban xua paca cuidubatsi, bapoxonaе bayatha nayopichiya paca tsipaebatsi po coyene xua ichaxota werena taponaewa. <sup>26</sup>Acoibi nawita xua yabara tapaca tsipaebiwatsi po coyene xua abe peexanaе cuiru coyenein painya neexanaewa xua daxota Nacom patsita natsicuentame xua abe painya neexanaexae Nacomtha. Taxa neitoroba xua jiwi tatsipaebiwa pocotsiwa bayatha Taxa jume tan. Taxa bara yatsicaya jume xainyeya paeba, jei Jesús.

<sup>27</sup>Ichitha barapomonaе jopa yaputaeyo poxonaе Jesús jeye Nacom yabara: “Taxa”, jei xua apara Paxa caunuta, pon Nacom. <sup>28</sup>Daxota Jesús barai barapomonaе, jeye:

—Poxonaе paxam naetotha pana necobe matatabarutsiname xan ponxaein Nacom Tananeitapetsinxae, bapoxonaе pana neyaputaename xua deta cou apara barapo jiton xan. Matautano pana neyaputaename xua xan jopa tacoutha nayabara paebinyo, saya xua cueicueijan pocotsiwa Taxa necuiduba. <sup>29</sup>Tsipei pon neitoroba apara nebaru popona. Taxa bapana jopa compa popona neexanaе tsipei saya exaneiban pocotsiwa Taxa tsita xanepanatsi, jei Jesús.

<sup>30</sup>Poxonaе Jesús baxua caunuta pinmonaе judiomonaе Jesús jume cowuntatsi.

**Meje yabara poxonaе Jesús yabara paeba Nacom pijimonaе tatsi iru pomonaе caurimonaе pia pentacaponaein tatsi piamonaе tatsi**

<sup>31</sup>Nexata bapoxonaе Jesús barai judiomonaе, po judiomonaе Jesús pejume cowuntsixaetsi. Jesús jeye:

—Icha paxam xanepanaya pana nejume cowuntsiya exanaponaeya jinompaename pocotsiwa tapaca tsipaebiwatsi, bapoxonaе bara pepa tajimonaе pam tsane. <sup>32</sup>Bapoxonaе payaputaename po coyene pexainyei coyenewa. Matautano papanenebiyaename pexainya weya pon paca itoroba xua abe painya neexanaewa, jei Jesús.

<sup>33</sup>Barapo judiomonaе, Jesús jume notatsi, jeye:

—Apara paxan Abraham pia pemomoxi susato jiwi tatsi pan. Dapon aibi pon pana itoroba xua pata taexanaewa poxonaе pana itoroba xua poxonaе pana busi tatane. ¿Eta pocotsiwa metha pana nejam: ‘Paxam papanenebiyaename pexainya weya pon paca itoroba xua abe painya neexanaewa’, pana nejam? jei pomonaе Jesús jopa jume cowuntichi.

<sup>34</sup>Jesús barai barapomonaе, jeye:

—Xaniyan paca tsipaebatsi daxita pomonaе xua abe peexanaе cuiru coyenein exana barapomonaе bara exana po coyenein pia pepon itorobatsi icha jiton ichi pon amanaya tanacuita ichun xua poxonaе bewa exanaе pocotsiwa peitorobixaetsi poxonaе busi cui tatainchí. <sup>35</sup>Pon ba amanaya tanacuita ichun, bapon ba apara piamonaе aibi pomonaе

peitorobixaetsi, tsipei bapon pebusi cui taetaeinchí. Ichitha pon ba xua ichun pexantoxae tatsi, bapon ba ataya pexanto tatsi bara piamonae pexeinaexae bapon. <sup>36</sup>Daxota xan Nacom Pexanton, icha panenebiya paca cana exainchi caurimonae pia pentacaponaein tatsi weya, pon xua paca itorobeiba xua abe painya neexanaewa, barapoxonae bara ataya paca capanenebiya tsoponeibi tsainchi bapon pexainya weya tatsi. <sup>37</sup>Bayatha yabara paca yaputainchi xua Abraham pia pemomoxi susatopiwi tatsi pam. Daichitha paichichipame xua pana nebexubame, jopa painya neichipaexae xua painya nejume taewa pocotsiwa paca tsipaebatsi. <sup>38</sup>Xan yabara paeban po coyenein xua Taxa netsita ituta. Paxam paexaname xua po coyenein painya axa paca itoroba, jei Jesús.

<sup>39</sup>Barapomonae Jesús jume notatsi, jeye:

—iPata tamo susatopin pon be pata taxa patsicotan, bapon apara Abraham! jei barapomonae.

Ichitha Jesús jume barai, jeye:

—Icha bara Abraham pia pexui tatsi pam tsipaem, metha bara paexanaetsipame pocotsiwa bapon bayatha caena exana. <sup>40</sup>Bequein bara paca tsipaebatsi po coyene pexainyeiwa xua po coyene Nacom necuiduba, ichitha paichichipame xua pana nebexubame. Apra Abraham jopa bapana baxua daichi. <sup>41</sup>Paxam bara barapocotsiwa paexaname pocotsiwa painya axa exana, jei Jesús.

Nexata barapomonae Jesús baraichi, jeye:

—Paxan dapomonae pan aibi pomonae piacoibi jiwi pan, tsipei pata taena jopa nasi cui wainmeinchiyó. Paxan xaniwaicha payaputan xua bara compa painta pata taxa, bapon Nacom, jei barapomonae.

<sup>42</sup>Nexata Jesús jume barai, jeye:

—Icha bara Nacom pia pexui pam tsipaem metha pana neantobe tsipaem. Tsipei Nacom bapon pia xainya wetsica ponan, anoxuaeno bara uncuanje. Apra jopa daxua tsipatopaeinyo xua tacoutha tana nayabara paebiwa tsane. Saya patopan poxoru Nacom neitoroba. <sup>43</sup>Paxam jopa payaputaem xua paca tsipaebatsi poxoru jopa be painya nejume taexae baxua pocotsiwa paca tsipaebatsi. <sup>44</sup>Caurimonae pia pentacaponaein tatsi, bapon apra painya axa. Barapo caurimonae pia pentacaponaein tatsi bapon piamonae tatsi pam daxota paexaname pocotsiwa bapon paca itoroba. Barapo caurimonae pia pentacaponaein tatsi jiwi jutebapoinchi poxonae Nacom aena nacia forota weya, xua beya anoxuae. Bapon bapana jopa xainyeya pepaebin tsipei po juntú coyene Nacom xainyeya peyabara paebiwatsi jopa xeinaeyo. Poxonae bapon naerabiya paeba, baxua paeba tsipei barapo penaerabi juntú coyene xeina. Bapon jiwi itorobatsi xua jiwi naerabiya pepaebiwiwa tsane. <sup>45</sup>Paxam bapon piamonae tatsi pamxaem daxota jopa xaniwaicha pana nejume cowuntsim pocotsiwa xainyeya tapaebiwa. <sup>46</sup>Paxam caein jiwana pam

dapon aibi pon tana neyabara jeiwa: ‘Maisa bapon abe exana’, pon tana neyabara jeiwa. Bequein bara pexainyei jume paca tsipaebatsi daichitha jopa pana nejume cowuntsim. <sup>47</sup>Pon ba Nacom piamonae tatsi baraba namuxu naewata pocotsiwa Nacom paeba. Paxam apra jopa Nacom piamonae tatsi pam, daxota jopa bepajume cowuntsim pocotsiwa Nacom paeba, jei Jesús xua judiomonae tsipaebatsi.

**Meje yabara poxonae Jesús namchi: “Poxonae cataunxuae Abraham jopa poponaeyo, caena bayatha tsiwanaya ataya poponeiban”, jei Jesús**

<sup>48</sup>Nexata equeicha judiomonae Jesús baraichi, jeye:

—Bara xainyeya paca yabara paebatsi poxonae pana najan: ‘Bapon apra Samaria nacuamonaepin, apra cauri xeina’, poxonae paca yabara jeichichi, jei judiomonae.

<sup>49</sup>Jesús jume nota, jeye:

—Xan apra cauri jopa nebarũ poponaeyo. Saya xua exanan bara pocotsiwa jiwi cana exanan xua Taxa wũnae pejainchiwatsi, ichitha nama paxam pana necasebame, saya abeya pana neyabara paebame. <sup>50</sup>Jopa netsita ainya cuiyiyo xua jiwi wũnae tana nejainchiwa. Bequein Taxa ichichipa xua jiwi wũnae tana nejainchiwa. Bapon Taxa yabara paebina jiwi pomonae xua abe peexanaewa xua penatsicuentsiwa xua abe petsita exanaexaetsi. <sup>51</sup>Xaniyan paca tsipaebatsi pon nejume cowuntsiya exanaena pocotsiwa paeban, bapon jopa bapana tũpae tsane, jei Jesús.

<sup>52</sup>Bapoxonae judiomonae Jesús jume notatsi, jeye:

—Bara xaniwaicha payaputan xua xam cabarũ popona cauri. Abraham irũrũ pomonae Nacom peitorobi jume pepaebiwi daxita barapomonae caena bayatha werapa. Ichitha xam pana nejam: ‘Pon nejume cowuntsiya exanaena pocotsiwa paeban, bapon jopa bapana tũpae tsane’, pana nejam. <sup>53</sup>iXam apra jopa toxecha ainya cuim Abraham pon pata tamo susatopin! Bapon caena bayatha tũpa irũrũ caena bayatha werapa pomonae Nacom peitorobi jume pepaebiwi. ¿Eta xua metha jinya coutha nanta xeiname xua ichamonae cayabara nanta xeinaena xua xam pon peainya cui jitom? jei judiomonae.

<sup>54</sup>Jesús jume nota, jeye:

—Icha saya compa xan tacoutha wũnae najaintan baxua jopa xapain wũnaeyo. Jame pon wũnae nejainta bapon apra Nacom, pon payabara jam: ‘Apra pata Taxa, bapon Nacom’, pajam. <sup>55</sup>Bequein baxua papaebame daichitha jopa xapain payabara yaputaem Nacom. Xan Nacom yaputan. Ichitha icha jan tsipaein: ‘Bapon jopa yaputaeyo’, jan tsipaein, metha apra naerabichipan icha paichim xua naerabiya papaebame poxonae. Ichitha xan yatsicaewa yaputan Nacom daxota bara baxuan itapeta exanan xua pocotsiwa tana neitorobixae pon Taxa bapon Nacom. <sup>56</sup>Abraham painya amo susatopin bayatha yabara wũnae yaputane xua

tapatopaewa tsane po cae pin nacuathe tsique. Daxota bapon bichocono juntu coyene weiweina. Bara xainyei patopan po cae pin nacuathe tsique daxota bichocono juntu coyene weiweina bapon.

<sup>57</sup>Nexata judiomonae Jesús baraichi, jeye:

—Apara pena jitom cataunxuae, jopa xeinaem apara cincuenta po weibe. ¿Eta pocotsiwa metha jam: ‘Abraham tan’, jam? Bara caena bayatha Abraham tɔpaba, jei judiomonae.

<sup>58</sup>Jesús jume nota, jeye:

—Xaniyan paca tsipaebatsi poxonae cataunxuae Abraham jopa poponaeyo caena bayatha tsiwanaya ataya poponeiban, jei Jesús judiomaetha.

<sup>59</sup>Nexata bapoxonae barapomonae anaepanaya ibowan notarɔcɔpa pecuinbabinexatsi Jesús. Ichitha Jesús nantsiyataraba yawa ponataba Nacom pin pia bo weya. Jesús xenta iya, barapomonae pia xainya iya tatsi.

**Meje yabara poxonae Jesús axaibi exana pon peitata  
nacutsin, pon xua pexuyotha yawa naexana**

**9** <sup>1</sup>Iruru Jesús Nacom pin pia bo weya baru pona pijimonae xua poxonae namtotha baru ecapona. Bapoxonae Jesús caxina pebin pon peitata nacutsin xua pon pexuyotha yawa naexana. <sup>2</sup>Jesús pijimonae yainyabiyatsi, jeye:

—Patatanecuidubim, ¿eta pocotsiwa metha bapon itata nacutsiya naexana? ¿Metha poxoru paxa tatsi abe exana? ¿Metha poxoru pena tatsi abe exana? ¿Ichacuitha metha tsipae poxoru bapon pia coutha abe exana? jei barapomonae.

<sup>3</sup>Jesús pijimonae jume barai, jeye:

—Jume apara, jopa apara itata nacutsiyo poxoru abe peexanaexae bapon. Matautano jopa apara baxua xua paxa tatsi abe peexanaexae. Matautano jopa apara baxua xua pena tatsi abe peexanaexae. Jame apara bapon itata nacuta xua jiwi peyaputaenexa xua Nacom peyapusɔwa xeina xua axaibi peexanaenexa tsainchi bapon. <sup>4</sup>Jiton ba nacuita poxonae cataunxuae pentha tsuncuae. Poxonae quirei tsuxubi pebin ba jopa itacɔpaetsi xua penacuichiwa. Xan barichin. Poxonae cataunxuae poponan po cae pin nacuathe bewa exanaein tanacuichiwa. Barapo tanacuichiwa apara pia penacuichiwa tatsi pon tana neitorobixae. Poxonae tɔpaein jopa neitacɔpae tsane xua taexanaewa barapo tanacuichiwa xua bayatha Nacom neitoroba. <sup>5</sup>Poxonae cataunxuae po cae pin nacuathe poponanje jiwi yawenan xua Nacom beta peyabara yaputaewa tsainchi, icha jiton ichichi pecoicha xua yawenatsi merawi xua beta penecotsiwa, jei Jesús pijimonaetha.

<sup>6</sup>Poxonae Jesús baxua najume weta, bapoxonae iratha naone sutaba, yawa peonetha tsoroboyo nacobena ponaxuba. Bapoxonae Jesús barapo

tsoroboyotha itacuere caxueba peitata nacutsin. <sup>7</sup>Nexata Jesús barai bapon, jeye:

—Ponare fetiyo beya, po fetiyo pewun Siloé. Barapo Siloé fetiyotha naitacuere waexore, jei Jesús. (Barapo Siloé fetiyo wun jei: “Po fetiyo Nacom itoroba”, jei.)

Pon peitata nacutsin pona fetiyo beya naitata waexubano. Poxonae equeicha bapon caibe iya Jesús beya, nama bara itacupatsi xua petaewa. <sup>8</sup>Bapon pia petsicuarabu enaewichi tatsi, iruno pomonae pecui yaputaexaetsi xua poxonae bapon aitatabeya popona daxita barapomonae bapon yabara natsipaebatsi. Ichamonae jeye:

—¿Apara baponda pon iratha jiwi wunquequeibara paratixi? jei.

<sup>9</sup>Ichamonae jeye:

—Aa, para bapon, pon iratha jiwi wunquequeiba paratixi, jei.

Ichamonae jeye:

—Apara bapon aibi. Saya para be bapon, jei.

Ichitha pon peitata nacutsin pia coutha jeye:

—Apara bara xan tsocuaein, jei.

<sup>10</sup>Nexata daxita barapomonae peitata nacutsin yainyabatsi, jeichichi:

—¿Eta xua metha anoxuae taneme? jei daxita barapomonae.

<sup>11</sup>Pon peitata nacutsin jume nota barapomonae, jeye:

—Pon pewun Jesús, bapon tsoroboyo peonetha nacobena pontaba, bapoxonae barapo tsoroboyotha neitacuere caxueba. Yawa nejei: ‘Fetiyo beya ponare, po fetiyo pewun Siloé. Barapo fetiyotha naitacuere waexore’, nejei. Bara barabeya ponan. Poxonae baxota naitacuere waexuban, bapoxonae bara tan, jei bapon.

<sup>12</sup>Bapoxonae peitata nacutsin yainyabatsi barapomonae, jeichichi:

—¿Incane dapo pebin, pon caaxaibi exana? jeichichi.

Bapon jume barai bapomonae, jeye:

—Bu, canta jopa taeinyo, jei bapon.

**Meje yabara poxonae pon equeicha xua itata wuna matowa  
yainyabatsi xua fariseomonae matowa yainyaba**

<sup>13</sup>Pon xua equeicha itata wuna, pomonae pia petsicuarabu enaewichi tatsi barapomonae bapon capoinchi fariseomonae beya. <sup>14</sup>Ichitha po mataqueitha Jesús axaibi exana pon peitata nacutsin, xua poxonae tsoroboyo peonetha nacobena pontaba, barapo matakabi para judiomonae pia pentaquei seicae matakabi tatsi. <sup>15</sup>Bapoxonae bapon yainyabatsi fariseomonae, jeye:

—¿Eta bichim xua anoxuae jamaisa necotame? jei fariseomonae.

Bapon jume barai, jeye:

—Bapon tsoroboyo peonetha neitacuere caxueba. Bapoxonae naitacuere waexuban meratha. Bapoxonae yawa bara necotan, jei fariseomonaetha.



<sup>16</sup>Bapoxonae fariseo jiwanamonae bapon baraichi, jeye:

—Pon caaxaibi exana apara Nacom jopa bapon itorobicaeyo, tsipei bapon jopa yabara baru cui itura jinaeyo barapo pentaquei seicae matabi, jei fariseo jiwanamonae.

Ichamonae jeye:

—Icha bapon peajuntucoyenebein, ¿metha nexata eta pocotsiwa pexeinya petsita itutsi coyenewa exana? jei.

Daxita barapo fariseomonae nantiya najume matsontsonoba. <sup>17</sup>Equeicha fariseomonae, pon bayatha itacuere axaibi exainchi, bapon yainyabatsi, jeichichi:

—¿Incane xam, eta xua yabara nanta xeinameru pon caaitacuerexaibi exana? jei fariseomonae.

Bapon jume epa pita, jeye:

—Yaitama bapon neaxaibi exana metha moya bara bapon, pon Nacom peitorobi jume pepaebin, jei bapon.

<sup>18</sup>Ichitha judiomonae jopa bejume cowantsiyo pocotsiwa pon peitata nacutsin bayatha itacuere axaibi exainchi xuano xua anoxuae itacupatsi xua petaewa. Daxota bapoxonae barapo judiomonae pon itacuere axaibi exainchi paxa tatsi wabatsi, yawa pena tatsi wabatsi. <sup>19</sup>Barapo judiomonae jeye coxiyũnbetha:

—¿Baponje bara yatsicaya painya nexanto? ¿Apara bara bapon pon bayatha yaitata nacutsiya naexana? ¿Eta bichi xua anoxuae itacupatsi xua penecotsiwa? jei judiomonae.

<sup>20</sup>Barapo coxiyũnbe jume notabe, jeibe:

—Bara yatsicaewa payaputan xua bapon barapara pata taxanto. Matautano payaputan xua bayatha bapon itata nacutsiya naexana.

<sup>21</sup>Daichitha jopa payaputaeyo xua eta bichi xua bapon anoxuae necota. Matautano jopa payaputaeyo xua pon pata taxanto itacuere axaibi exainchi. Paxam moya bara bapon payainyabare. Bu nexata bapon pia coya paca jume notsina tsipei apara bayatha pinyo, jeibe coxiyũnbe.

<sup>22</sup>Barapo coxiyũnbe cunuwa judiomonae cunuwatsi. Tsipei judiomonae bayatha jei: “Pomonae Jesús yabara jume cowantatsi, pomonae xua jeye: ‘Jesús apara bapon Mesías pon Nacom itorobica’, pomonae jeye, barapomonae paitawetan pata penacaetutsi bo weya”, jei barapo judiomonae. Daxota barapo coxiyũnbe pijunuwi jopa jeibe: “Apara bapon Jesús pon Mesías bapon painta taxanto itacuere axaibi exainchi”, jopa jeibe. <sup>23</sup>Daxota barapo coxiyũnbe barapo judiomonaetha jeibe: “Paxam moya bapon payainyabare. Bu nexata bapon pia coya paca jume nota tsipei bayatha pinyo”, jeibe coxiyũnbe.

<sup>24</sup>Bapoxonae equeicha judiomonae pon itacuere axaibi exainchi yainyabatsi, jeichichi:

—Yatsicaewa xainyeya pana netsipaebare xua iruru Nacom necajume taenexa. Paxan payaputan xua Jesús bapon apara pon peajuntucoyenebein, jei judiomonae.

<sup>25</sup>Bapon jume nota barapo judiomonaetha, jeye:

—Xan jopa yabara yaputaeyno xua icha metha bapon pon peajuntucoyenebein. Saya meisa yaputan xua copiya taitata nacutsin xuano xua anoxuae neitacupa xua tanecotsiwa, jei bapon.

<sup>26</sup>Equeicha barapo judiomonaetha bapon yainyabatsi, jeichichi:

—¿Eta caitacuere ichi poxonae caaitacuereaxibi exana? jei judiomonaetha.

<sup>27</sup>Bapon jume nota barapo judiomonaetha, jeye:

—Bara bayatha paca tsipaebatsiba. Came jopa yabara pana nejume cowuntsim. ¿Eta xua metha equeicha bepa baxua matowa paca tsipaebichi? ¿Painya iruru naexanaetsi Jesús pijimonaetha tatsi? jei bapon.

<sup>28</sup>Ichitha barapo judiomonaetha bapon biatainchi, jeichichi:

—Xam moya Jesús piamonaetha jiton tatsi naexande, nama paxan Moisés pia peitorobi coyenewa pata exanaponaetha jiwi. <sup>29</sup>Paxan payaputan xua Nacom Moisés itorobatsi. Ichitha nama pon caaitacuereaxibi exana jopa payaputaeyno xua ichaxota werena peponaewa xua ichun peitorobixae, jei judiomonaetha.

<sup>30</sup>Bapon jume nota, jeye:

—¡Jina! Paxam jopa payaputaem xua bapon Jesús ichaxota werena peponaewa xua bequein painya tana netaewatham xua Jesús tana neaitacuereaxibi exanaewa. <sup>31</sup>Waxainchi yaputainchi bara, xua Nacom jopa jume naitaewatsiyo pomonaetha pomonaetha abe peexanaewi xua peyawenaewanexa. Nacom saya meisa jume naitaewata pomonaetha pomonaetha wunaetha pejainchixaetsi. Matautano Nacom saya jume naitaewata pomonaetha pomonaetha peitorobixae xua pia petaexanaewa tsainchi pocotsiwa bapon peichichipaexae. <sup>32</sup>Poxonae aena Nacom nacua forota, bapoxonae xua beya anoxuae, dapon aibi pon ichun itacuere axaibi exainchi pon peitata nacutsin. <sup>33</sup>Icha bapon Nacom jopa itorobichipae, metha bapon jopa itacupaetsipaetsi xua ichun itacuere axaibi peexanaewatsi, pon peitata nacutsin, jei bapon.

<sup>34</sup>Nexata bapon baraichi, jeichichi:

—Daxota itata nacutsiya naexaname tsipei ajuntucoyenebeya naexaname. ¡Dacotsiwa apara ichichipame pana necuidubamecai! jei judiomonaetha.

Bapoxonae bapon itawetatsi judiomonaetha pia penacaetutsi bo tatsi weya.

**Meje yabara poxonae Jesús yabara paeba pomonaetha jopa Nacom yaputaetsi**

<sup>35</sup>Jesús yaputane xua pon bayatha itacuere axaibi exainchi itawetatsi judiomonaetha pia penacaetutsi bo tatsi weya, xua judiomonaetha itaweta. Poxonae bapon Jesús caxina, Jesús jeye:

—¿Xam yabara jume cowuntame pon Nacom pia Peitapetsin tatsi? jei Jesús.

<sup>36</sup>Bapon jume barai Jesús, jeye:

—Pon Necanamataxeinaem jiwi, incane netsipaebare, ¿Incane bapon pon Nacom pia Peitapetsin? Bapoxonae tha jume cowuntichi, jei pon peitata nacutsin.

<sup>37</sup>Jesús jume nota, jeye:

—Xam apara bapon bayatha taneme pon Nacom pia Peitapetsin tatsi. Pon aunxuaein catsipaebatsi, apara bara xan, jei Jesús xua nabarai.

<sup>38</sup>Nexata bapon pentabocototha uncua Jesús peitabaratha tatsi xua Jesús wūnae pejainchinexatsi. Bapon jeye:

—iTanecanamataxeinaem, cajume cowuntatsi bara! jei bapon.

<sup>39</sup>Bapoxonae Jesús barai, jeye:

—Barapo cae pin nacuathe patopecan xua jiwi tayabara paebinexa xua penatsicuentsiwa xua abe peexanaexae Nacomtha. Pomonae xua bayatha jopa Nacom cayabara yaputaetsi barapomonae cana exanaein xua barapomonae Nacom cayabara yaputaainchi. Pomonae xua bayatha bequein nanta xeina xua Nacom cayabara yaputainchi barapomonae cana exanaein xua barapomonae equeicha jopa Nacom cayabara yaputae tsainchi, jei Jesús.

<sup>40</sup>Bapoxonae fariseo jiwamonae, pomonae Jesús barꝫ uncua, poxonae barapomonae Jesús jume tainchi, Jesús yainyabatsi, jeye:

—¿Apara pana baram xua equeicha jopa payabara yaputaein tsane Nacom? jei fariseo jiwamonae.

<sup>41</sup>Jesús jume nota, jeye:

—Icha paxam bayatha jopa payabara yaputaemtsipae Nacom, jopa apara painya coutham tsipae xua poxonae abe painya neexanaewa. Ichitha mexeya poxoru pajam: ‘Payaputan Nacom’, pajam daxota apara painya coutham xua bara abe painya neexanaewa, jei Jesús.

### Meje yabara poxonae Jesús yabara paeba pon oveja pe-eeinaein

**10** <sup>1</sup>Equeicha Jesús namchi: “Xaniyan paca tsipaebatsi diwesi xua pata neyabara yaputaewam tsane. Pebin ba oveja pia curara boupa iya joniya. Ichitha pon peboupa jopa joniyaeyo, saya ecoinya icha muxunene werena, bapon apara pon pecaibin oveja. <sup>2</sup>Pon jame joniya pepa boupa iya bapon apara pon pe-eeinaein oveja. <sup>3</sup>Pon peboupa xatababin, bapon boupa saranaxorena pon oveja pe-eeinaein taboupa saranaxorenatsi. Poxonae pon oveja pe-eeinaein junuta oveja, barapo oveja jume copi yaputane baxua. Pon oveja pe-eeinaein, bapon daxita barapo oveja barompaya pia wūnxitha junuta. Bapoxonae bapon curara weya mata coniya ovejamonae. <sup>4</sup>Poxonae curara weya mata coniya daxita bapon mata caecapona yawa punaenapoinchi pejume copi yaputaexaetsi. <sup>5</sup>Ichitha barapo ovejamonae jopa puna ponaeyo ichuntha, pontha pon jopa yaitaeyo. Saya cuitaya dꝫꝫpa tsipei ichꝫn jopa jume copi yaputaetsi”, jei Jesús.

<sup>6</sup>Jesús tsipaeba barapomonae barapo pecayabara juta pepaebi diwesiyo poxonae oveja yabara paeba, daichitha came barapomonae jopa yaputaeyo barapo diwesi.

**Meje yabara xua Jesús pon beta pe-eeinaein jiwi**

<sup>7</sup>Nexata equeicha Jesús tsipaeba barapomonae, jeye: “Icha oveja ichi xua curaratha jojoniya xua peboupa peyawenaexaetsi, barichi jiwi xua Nacom pia nacuatheicha tatsi pata poxoru xanxaein xua tayawenaexae. <sup>8</sup>Daxita pomonae netsiwana pata, pomonae xua jei: ‘Nacom pana itoroba’, jei, barapomonae apara pomonae jiwi pemuxujainyabiwi. Ichitha jiwi jopa yabara jume cowuntsiyo barapomonae, icha oveja ichi xua aichaxaibi pepuna ponaewa ichantha jopa pejume copi yaputaexae. <sup>9</sup>Xan jiwi tayawenaein daxota pon nejume cowanta yawenan xua pepatopaewa Nacom beicha. Icha oveja ichichi xua merawi curaratha yaboupa xatatabatsi xuano xua mataqueitha yausaranaxorenatsi xua pexaenexa naepanaewa, barichi pomonae tana nejume cowuntsiwi barapomonae beta yawenan.

<sup>10</sup>“Pon pecaibin patopa xua saya pecaibinexa oveja, yawa xua saya abe peexanaenexa yawa pebexubinexa. Ichitha nama xan patopan xua jiwi tacatsinexa peajuntuyapuswa, po peajuntuyapuswa jopa weraweracaeyo xua jiwi jopa juniya mataropeichiya xexeinaponae tsane barapo peajuntuyapuswa. <sup>11</sup>Pon beta pe-eeinaein oveja, bapon tsitupa pia ovejamonae, tsipei jopa ichichipaeyo xua petajutebiwatsi pia ovejan tatsi xua poxonae pomonae pecaibiwi jutebina. Barapocotsi coyene ichi jiwi beta ta-eeinaein. Jiwi tsitupaein xua barapomonae tacapanepaenexa. <sup>12</sup>Ichitha pon tanacuita ichun xua tayapu eena oveja apara saya piaparatichi. Poxonae bapon neuthu tane pijunuwi, oveja cuenta naetsiriwa, tsipei barapo ovejamonae pia ovejamonae tatsi aibi. Poxonae neuthu icha ovejan teicatsi, bapoxonae icha ovejamonae tsanaothopa. <sup>13</sup>Bapon naetsiriwa tsipei saya oveja eena xua piaparatichi, xuano xua jopa xapain peyabara nanta xeinaexae ovejamonae.

<sup>14-15</sup>“Xan natsicotan be pon ovejamonae beta tayapu eeinaein tsipei beta ta-eeinaein pomonae tana nejume cowuntsiwi. Taxa neyaitane, xuya Taxa yaitan. Barichi yaitan pomonae tana nejume cowuntsiwi, xuya barapomonae neyaitane. Xan tana nejume cowuntsiwi yaitatsin xua tatsitupaenexa naetotha xua jopa peweraweracaewa tsane barapomonae. <sup>16</sup>Barichi xeinan icha tana nejume cowuntsiwi pomonae jopa israelmonaeyo. Barapomonae bewa iruru nacaetuta exanaein xantha pomonae caena bayatha tana nejume cowuntsiwi iru pomonaeno xua bexa nejume cowuntsinano. Cae bicheito exanaein. Barapomonae exanaena pocotsiwa itoroban. Matautano xeinaena bara compa xua xan ponxaein beta ta-eeinaein, icha pebin ichi pon ovejamonae peyapu eeinaein xua poxonae ovejamonae caetucaetuteta cae curaratha.

<sup>17</sup>“Taxa bichocono neantobe tsipei tsitupaen pomonae tana nejume cowuntsiwi. Ichitha equeicha asun tsane. <sup>18</sup>Dapon aibi pon xua pia coutha tana nebexubiwa. Saya jame poxonae tacoutha ichichipan. Xan itacoxonan xua bara jiwi tatsitupaewa. Matautano itacoxonan xua equeicha asu tapoponaewa tsane petupaewa weya. Baxua itacoxonan xua taexanaewa, Taxa tana neitorobixae”, jei Jesús.

<sup>19</sup>Poxonae barapo judiomonae Jesús baxua jume tainchi, bapoxonae equeicha barapo judiomonae yabara najume matsontsonoba. <sup>20</sup>Ichamonae judiomonae yainyaba xua icha judiomonae yainyabatsi, jeichichi:

—¿Eta xua metha bapon pajume naitawatame pocotsiwa bapon paeba? ¡Apara matayaibatsi! ¡Cauri xeina apara! jei judiomonae.

<sup>21</sup>Ichamonae jeye:

—Dapon aibi pon xanepanaya pepaebiwa icha cauri xeina. Caurimonaepin jopa bapana itacupaetsi xua pon peitata nacutsin axaibi peexanaewatsi, jei ichamonae.

### **Meje yabara poxonae judiomonae Jesús jume itawetatsi**

<sup>22</sup>Poxonae awubo daxita jiwi nacaetuta Jerusalén tomaratha xua penabanaenexa pexaewa. Barapo penacaetutsi maticabin poxonae nabane jiwi yabara nanta xeina xua caena bayatha piamonae tatsi equeicha xaneba Nacom pin pia bo tatsi poxonae ichamonae abe exana. Barapomonae baxua yabara nacaetuta peyabara paebinxua xua barapo bo Nacom nexa. <sup>23</sup>Jesús popona Nacom pin pia bo tauchipa boutotha. Barapo Nacom pin pia bo tauchipa bouto pewun Salomón. <sup>24</sup>Baxota judiomonae Jesús imoxoyo caquita umenarucupatsi yawa Jesús jeichichi:

—¿Eta po maticabibe metha ainya muxu paxeinaein xua pata cayabara yaputaewa tsainchi? Icha bara yatsicaya Mesías xam, moya pana netsipaebare, jei.

<sup>25</sup>Jesús jume nota, jeye:

—Bara bayatha paca tsipaebatsiba ichitha jopa pana nejume yabara cowuntsim. Pocotsiwa xua exanan, xua Taxa tana neitorobixae, baxua apara bara paca tsita naitapeinya xeinatsi xua xan apara bara Mesías. <sup>26</sup>Baxua jopa pana neyabara jume cowuntsim tsipei jopa tajimonae pam be pocotsi coyeneya aunxuae bayatha paca tsipaebatsi. <sup>27</sup>Pomonae tana nejume cowuntsiwi nejume copi yaputane yawa nepuna pona, icha ovejamonae ichi xua jume copi yaputane pontha pon pe-enaexaetsi xuano xua barapo ovejamonae puna pona xua bapon puna poinchi. <sup>28</sup>Tana nejume cowuntsiwi catan peajuntuyapuswa, po peajuntuyapuswa xua bapana jopa peweraweracaewa tsane. Matautano ichamonae jopa itacupaetsi xua tana newecobe notsiwa xua tamonae inta notatsi. <sup>29</sup>Taxa barapomonae necata. Barapon Taxa bichocono toxecha caein ainya cui, beyacaincha ichun xua ainya cui. Dapon aibi pon Taxa

wecobe notatsi xua piamonae tatsi tanotatsi. <sup>30</sup>Xan, iru Taxa bara caein panbe, jei Jesús.

<sup>31</sup>Nexata judiomonae ibotoxi nota xua Jesús pecuinbabiwa tsainchi.

<sup>32</sup>Jesús barai barapomonae, jeye:

—Paxamtha matowa exaneiban pexeinya tatsita itutsi coyenewan Taxa pia peayapuswatha tatsi. ¿Eta po tatsita itutsi coyenewan taexanaexae ibotoxitha painya necuinbabichi? jei Jesús.

<sup>33</sup>Judiomonae jume nota, jeye:

—Jopa apara daxota paca cuinbabichi poxoru pexeinya petsita itutsi coyenewan neexanaexae. Daxota paca cuinbabatsi tsipei jam: ‘Xan iru Taxa bara caein panbe’, jam. Baxua apara abe paebame tsipei be Nacom naexaname jinya coutha poxonae saya pebim, jei judiomonae.

<sup>34</sup>Jesús barai, jeye:

—Nacom Pejume Diwesitha yabara paebatsi pomonae Nacom pejume cowuntsiwichi. Nacom jeye: ‘Paxam iruru nacomonae pam’, yabara jei Nacom, pomonae pejume cowuntsiwixaetsi. <sup>35</sup>Nacom paeba xua pinae pomonae petajume cowuntsiwixaetsi pejume diwesi barapomonae pinae bara nacomonae tsenae. Matautano waxainchi yaputainchi barapo diwesitha xua jopa bapana Nacom naerabiyo. <sup>36</sup>Nacom neitapeta, neitorobano tapatopaenexa barapo cae pin nacuathe. ¿Eta xua metha papaebame xua xan abe paeban poxonae jan: ‘Xan Nacom Pexanton’, jan? <sup>37</sup>Icha jopa exanaeinyo pocotsiwa Taxa neitoroba painya xoba pana nejume cowuntame baxua. <sup>38</sup>Icha exanan pocotsiwa Taxa neitoroba, bapoxonae pana necui yabara jume cowunde pocotsiwa exanan, bequein jopa pana nejume cowuntsim xua paca tsipaebatsi. Bapoxonae xain payaputaename xua xan Taxa nebaru popona, xua barichin xua Taxa baru poponan, jei Jesús.

<sup>39</sup>Equeicha barapomonae ichichipa xua Jesús pewaetabiwatsi ichitha Jesús naetsiriwa barapomonae weya.

<sup>40</sup>Nexata Jesús pijimonae caibe baru nawiya icha muxunene beya xua Jordán mentha. Baraxotiya Jesús pijimonae baru eca, ichaxota Juan bayatha bautisaba jiwi. <sup>41</sup>Pin bicheitomonae Jesús siwa poinchi pejume taenexatsi. Barapomonae Jesús yabara natsipaebatsi, najei:

—Xaniyei bequein Juan pexeinya petsita itutsi coyenewan jopa exanaeyo daichitha daxita pocotsiwa xua Jesús yabara paebatsi, daxita baxuan bara apara xainyei, najei barapomonae.

<sup>42</sup>Baraxotiya pin bicheitomonae Jesús yabara jume cowuntatsi.

### Meje yabara poxonae Lázaro tupa

**11** <sup>1</sup>iru pebin popona, pon pewun Lázaro. Bapon atene. Bapon Betania tomarapin. Iruru bapon Lázaro pamchobe tatsi barichi Betania tomarapiwayobe. Barapo pamchobe tatsi ichowayo pewun

María, ichowayo pewun Marta. <sup>2</sup>Barapowa María, powa Lázaro pamcho tatsi, powa Jesús taxu epatabinchi icha matababitha penasiwatha xua petuxueiwa xuano xua taxu tsewa exanaeinchi pentanatha. <sup>3</sup>María pamchobe najume caitorobabe ichuntha icha tomara beya xua baxotiya Jesús beya petacajume jeichinexatsibe:

—Patatanecanamataxeinaein, jinya jiton atene, petacajume jeichinexatsibe bapon.

<sup>4</sup>Poxonae Jesús baxua jume tane, Jesús jeye:

—Bequein Lázaro atene ichitha barapo peatenewa jopa exanaeyo xua tupa peexaneibiwa ataya. Saya atene, apara Nacom pia jiwi tsita itutsichi pia peayapusya itorobi coyenewa. Matautano iru xan Nacom Pexanton jiwitha tatsita itutsinexa taayapusya itorobi coyenewa, jei Jesús.

<sup>5-6</sup>Bequein Jesús antobe Marta iru María iru Lázaro ichitha cataunxuae eca baxotiya ainya matababibe poxonae jume taetha xua Lázaro bayatha atene nawita. <sup>7</sup>Pirapae Jesús daxita pijimonae barai, jeye:

—Caibeya poinchi Judea nacua beya, jei Jesús.

<sup>8</sup>Nexata daxita Jesús pijimonae baraichi, jeye:

—Pon Patatanecuidubim, cain judiomonae, Judea nacuaatha ichichichipa cacuinbaba ibotoxitha. Dacotsiwa equeicha jinya ponaetsi barapo Judea nacua beya, jeichichi.

<sup>9</sup>Jesús barai, jeye:

—Caentacabi doce po horabe xaina poxonae pentha tsuncuae. Icha pebin mataqueitha popona jopa xuirapopaeayo pentha petsuncuaexae barapo cae pin nacuaethe. <sup>10</sup>Barichin poxonae cataunxuae poponan barapo cae pin nacuaethe bewa exanaein xua Taxa pocotsiwa neitoroba. Tsipei poxonae tupaein jopa neitacurpae tsane xua exanaein baxua, barapo cae pin nacuaethe.

<sup>11</sup>Pirapae Jesús daxita pijimonae barai, jeye:

—Wajiton, Lázaro, maituncua. Ichitha tha bexa yaubaxuichi, jei Jesús.

<sup>12</sup>Nexata daxita Jesús pijimonae baraichi, jeye:

—Patatanecanamataxeinaem, icha bapon maituncua, imetha poxoru anoxuae yasatatsi, daxota baxua paebame? jeichichi.

<sup>13</sup>Ichitha Jesús namchi: “Lázaro bayatha tupa”, jei, xua poxonae jei: “Lázaro maituncua”, jei. Daichitha Jesús pijimonae tatsi nanta xaina xua metha Lázaro maituncua icha merawi ichi poxonae maiteca.

<sup>14-15</sup>Bapoxonae Jesús pijimonae tsita najume itapeinya xaina, jeye:

—Lázaro bayatha naxuba. Pacata daxua wunae xua jopa baxotiya poponaeyo poxonae Lázaro tupa. Tsipei baxua painya nejume cowuntsinexa, daxota jopa nainya ponaeyo. Antha poinchi bara beya ichaxota Lázaro boca, jei Jesús.

<sup>16</sup>Nexata Tomás, pon icha wun Gemelo peweichobe penama naexanaexaebe, bapon Jesús pijimonae tatsi baraichi, jeye:

—Bu naca baru pona Jesús, xain Jesús naca baru werapa, jei Tomás.

**Meje yabara xua Jesús namchi: “Xan pon jiwi asu taexanaein petupae cuiru coyene weya”, jei**

<sup>17</sup>Poxonae Jesús pijimonae baru patopa Betania tomaratha, jiwi Jesús tsipaebatsi xua pinae bayatha Lázaro cuatro po matacabibe yapucaewa xua muthutha xotsi. <sup>18</sup>Betania tomara tajuyo itamataeca Jerusalén tomara saya tres po kilómetro epatiyobe xeina. <sup>19</sup>Pinmonae judiomonae Marta iru María siwa poinchibe pia botha tatsi peitanuwe matutaenexa tsainchibe petatupaexaetsibe peweicho tatsi. <sup>20</sup>Poxonae Marta yaputane xua Jesús pijimonae baru patopa, bapowa bo wejonarena xua Jesús pententa weyataeya wabinexatsi. Ichitha nama María botha eca. <sup>21</sup>Marta Jesús baraichi, jeye:

—Pon Necanamataxeinaem jiwi, icha bayatha xote ecaetsipame, metha bayatha jopa tupaetsipae taeweicho. <sup>22</sup>Yaputan xua methaunxuae Nacom cacatsina daxita pocotsiwa newucaewam, jei Marta.

<sup>23</sup>Jesús barai, jeye:

—Eweicho equeicha cata asu poponaena, jei Jesús.

<sup>24</sup>Marta Jesús baraichi, jeye:

—Aa, bara yaputan xua equeicha asu poponaena poxonae po mataqueitha daxita jiwi Nacom asu exanaena petupae cuiru coyene weya poxonae po cae pin nacue daxita weraweracaena, jei Marta.

<sup>25</sup>Nexata Jesús jume barai, jeye:

—Xan apara barapo jiton, pon jiwi asu jinompa taexanaein petupae cuiru coyene weya. Matautano xan pon jiwi tacatsin peajuntuyapusuwa, po peajuntuyapusuwa jopa weraweracaeyo. Pon nejume cowanta bequein bara tupa ichitha equeicha asu poponaena. <sup>26</sup>Pon xeinaena peajuntuyapusuwa xuano xua nejume cowantsina, bapon bapana jopa weraweracae tsane. ¿Baxua bara yabara jume cowantame? jei Jesús xua Marta tsipaebatsi.

<sup>27</sup>Bapowa jume nota, jeye:

—Aa, Tanecanamataxeinaem, bara baxua yabara jume cowantan xua xam Mesías pon Nacom Pexantom, pon bewa juinya patopaename po cae pin nacuathe tsique, jei Marta.

**Meje yabara poxonae Jesús itamata wecoyiei tsuncuae ichaxota Lázaro yamuthu uncua**

<sup>28</sup>Poxonae Marta najume weta xua Jesús tsipaebatsi, bapoxonae Marta pamcho waba powa pewun María. Marta nameicha pamchotha jeye:

—Pon jiwi Pecuidubin xote patope, cawaba, jei Marta.

<sup>29</sup>Poxonae María baxua jume taeba, bapoxonae caena nainya ponataba Jesús petaenexatsi. <sup>30</sup>Jesús abu cataunxuae pijimonae jopa baru ponaeyo



tomaratha. Jesús caxinatsi ichaxota copiya Marta Jesús caxinatsi.

<sup>31</sup>Judiomonae pomonae María pamchobe itanuwe matateicatsibe xua pomonae pia botha tatsi taenatsibe, poxonae barapo judiomonae tane xua María nainya ponataba, iruru barapomonae napuna pona. Barapo judiomonae nanta xeina xua mexeya itara María pamchobe muthu beya ponabewei xua pewecoyeinexabe ichaxota peweichobe tatsi tayamuthu uncuatsibe.

<sup>32</sup>Poxonae María itamata patopatsi María pentabocototha uncua, yawa Jesús baraichichi, jei:

—Tanecanamataxeinaem, icha bayatha xote ecaetsipame metha bayatha pata taeweicho jopa tupaetsipae, jei María xua Jesús tsipaebatsi.

<sup>33</sup>Jesús tane xua María wecoyei. Taneno xua judiomonae pomonae napona xua iruru wecoyei. Bapoxonae Jesús unthuthu wecoyei yawa anthuthurewe. <sup>34</sup>Jesús baraino barapomonae, jeye:

—¿Exota Lázaro pamuthuthu xubame? jei Jesús.

Jesús jume notatsi, jeye:

—Pon Necanamataxeinaem jiwí, xotiye incane matha taema, jei barapomonae.

<sup>35</sup>Iruru Jesús wecoyei tsanareca. <sup>36</sup>Bapoxonae judiomonae Jesús yabara jeichichi, jeye:

—Incane pataema maisa bapon Lázaro bichocono antobetsi, najei judiomonae.

<sup>37</sup>Ichitha ichamonae judiomonae Jesús yabara jeichichi:

—Icha bapon itacupatsi xua pon peitata nacutsin axaibi exainchi, zeta xua metha bapon jopa itacupaetsi xua Lázaro yawenatsi xua bayatha jopa tupaetsipae? najei judiomonae.

### **Meje yabara poxonae Lázaro equeicha asu popona**

<sup>38</sup>Equeicha Jesús bichocono anthuthurewe. Yawa imoxoyo pijimonae baru pona muthu beya. Barapo muthu ibo muthu, yawa muthu yauxatatabanota pin ibo panawatha. <sup>39</sup>Jesús barai barapomonae, jeye:

—Papataxore ibo panawa, jei Jesús.

Lázaro pon tupa bapon pamcho tatsi Marta, Jesús jeichi:

—Patatanecanamataxeinaem, apara bayatha pepon bichocono tuxamna, tsipei bayatha cuatro po matabibe yapucaewa poxonae tupa, jei Marta.

<sup>40</sup>Ichitha Jesús Marta jume baraichi, jeye:

—Bara bayatha catsipaebatsiba: Icha yabara jume cowuntame, necotsiname Nacom pia peayapuswa, cajeichiba, jei Jesús.

<sup>41</sup>Nexata ichamonae ibo panawa pataxuba. Bapoxonae Jesús peitaboco beicha athabeicha necoicha. Yawa jeye Paxatha:

—Axa, juntu coyene weiweinan, yaitama nejume taneme pocotsiwa tacawucaetaesi. <sup>42</sup>Bara yaputan xua nejume taibame poxonae

cawꞥqueibatsi. Apará catsipaebatsi baxua xua pomonae xote umene barapomonae nexa xua tana neyabara jume cowũntsinexa xua xan pon tana neitorobim, jei Jesús.

<sup>43</sup>Poxonae Jesús najume weta baxua, bapoxonae jume daunweya wawai, jeye:

—iLázaro, bara wejondena! jei Jesús.

<sup>44</sup>Bapoxonae pon xua tupa mũthũ wejondena. Xua bayatha paparuwatha maxũ caecunta cꞥbaxotsi yawa pesito decano yawa xua painyáweratha itabara yarabaxotsi, baxuan Lázaro yawa jondena. Jesús barai jiwi, jeye:

—Daxita baxuan paweisacare, bapoxonae bũ bara pona, jei Jesús.

**Meje yabara poxonae fariseomonae irũ sacerdotemonae  
pia pentacaponae tatsi daxita barapomonae Jesús yabara  
nanta xeinatsi xua po coyeneya Jesús pewaetabiwa tsainchi**  
*(Mt 26.1-5; Mr 14.1-2; Lc 22.1-2)*

<sup>45</sup>Judiomonae pomonae María pamchobe cueyatatsibe, poxonae barapo judiomonae baxua Jesús cui tainchi Jesús yabara jume cowũntatsi pinmonae. <sup>46</sup>Ichitha ichamonae judiomonae fariseomonae beya pona xua peyabara paebinexa pocotsiwa bayatha Jesús exana. <sup>47</sup>Nexata fariseomonae irũ sacerdotemonae pia pentacaponae tatsi daxita barapomonae nacaetuta penacanamata caitorobi bicheitha, yawa najei barapomonae:

—¿Eta xua exanaeinchi metha? Barapo pebin exana nawita pexeinya petsita itũtsi coyenewan. <sup>48</sup>Icha baraxua saya yabara cui copatinchi metha pinmonae bapon yabara jume cowũntsinchi. Barapoxonae romanomonae pia pentacaponae patsina waxantha, yawa abe exanaena Nacom pin pia bo tatsi xua watomaratha, yawa wanacuatha naca jutebina, najei barapomonae.

<sup>49</sup>Caecin bapomonae jiwana pewũn Caifás. Bapon Caifás barapo weitha sacerdotemonae pia pepa pentacaponae tatsi naexana. Bapon Caifás jei pin bicheitha:

—Paxam apara jopa baxua payabara yaputaem. <sup>50</sup>Matautano jopa payabara yaputaem xua po coyene pacata xanepana xua ichũn bara caecin piamonae yaitatsina pebexubinexatsi xua daxita piamonae tatsi jopa petajutebinexa tsainchi, jei Caifás xua piraichi nanta xeina.

<sup>51</sup>Ichitha Caifás jopa baxua pia coutha nanta xeinaeyo. Tsipei Caifás barapo weitha sacerdotemonae pia pepa pentacaponae tatsi naexana, daxota tsiwũnae yabara paeba xua Nacom cueicueijejei exana xua Jesús bewa tsitũpaena judiomonae. <sup>52</sup>Meisa barapo judiomonae Jesús jopa tsitũpaeyo, apara irũrũ ichamonae nexano Jesús tsitũpa xua Jesús caemonae nacaetuta peexanaenexa pomonae Nacom piamonae tatsi,

pomonaeno tajũ ena ichaxota icha nacuantha. <sup>53</sup>Daxota barapomonae judiomonae pia pentacaponaeawi tatsi nabarũ muxu jei po coyeneya xua poxonae Jesús pebexubiwa tsainchi.

<sup>54</sup>Daxota Jesús jopa naitapeinya xeinaeyo judiomonaetha. Saya Jesús Judea nacua wewarapiya, tomara beya pona po tomara pewũn Efraín, po tomara eca ichaxota ira xuepana susato tsurucuae nacua. Barapo tomaratha pijimonae baru eca Jesús.

<sup>55</sup>Bara nama imoxoyo tsurucuae tsoponae po maticabin xua judiomonae pia Pascua wũn maticabin tatsi. Pin bicheitomonae tomara weya pona xua Jerusalén tomara beya pona xua baxotiya pia cui coyenewa peexanaenexa Nacom nexa, xua Nacom jopa petsita natsicuentinexatsi xua abe petsita peexanaexae. Tsipei pia peitorobi coyenewatha tatsi baxua yabara paeba xua barapomonae bewa baxua exanaena Pascua wũn maticabin pewũnaeya. <sup>56</sup>Daxita barapomonae Jesús wenaweneichi. Poxonae barapomonae Nacom pin pia botha pata, baxota barapomonae najei:

—¿Etabe payabara nanta xeinaeya ichim? ¿Metha Jesús xote patopaena jampa? ¿Metha jopa patopae tsane jampa? najei barapomonae.

<sup>57</sup>Fariseomonae irũrũ sacerdotemonae pia pentacaponaeawi tatsi daxita barapomonae jiwi baraichi, jeichichi:

—Pon tane Jesús, nexata bũ pana netsipaeba, xua bapon pata tha waetabichi, jei barapomonae.

**Meje yabara poxonae petsiriwa Jesús mata  
epatabatsi penasiwa, po penasiwa petuxueiwa  
(Mt 26.6-13; Mr 14.3-9)**

**12** <sup>1</sup>Poxonae cataunxuae seis po maticabibe aibi xua Pascua wũn maticabin nexa, Jesús pijimonae baru pona Betania tomara beya. Barapo Betania tomara, po tomara ichaxota Lázaro popona, pon Jesús bayatha asũ exana petũpae cuiru coyene weya. <sup>2</sup>Baxota pexaewa Jesús upain exanatsi. Marta apata pexaewa. Jesús pijimonae tatsi irũ naena pexaethopaewatha. Irũ Lázaro baxota naeca xua irũ naxane. <sup>3</sup>Irũ bapoxonae María carena bosibũ bichocono wũnca petuxuei nasiwa. Barapo tuxusi tuxuei nasiwa bichocono ainya matoma. Barapo tuxusi tuxuei nasiwa pewũn nardo. Barapo petuxuei tuxusi nasiwatha María Jesús mata epatabatsi yawa taxu epatabatsino. Bapoxonae María pentanatha Jesús taxu tsewa exainchi. Daxita bomũxũ tutu canaũpa ducua xua tuxuei tsurucuae. <sup>4</sup>Irũrũ naeca Judas Iscariote, pon Simón pexanto tatsi. Bapon Judas Jesús pijimonae tatsi jiwana. Barapo Judas pon bexa Jesús caenaetsinchi. Bapon namchi, jeye:

<sup>5</sup>—¿Eta pocotsiwa metha saya xuba barapo tuxusi tuxuei nasiwa? Barapo petuxuei tuxusi nasiwa becaenaetsipame xua nentoma xeinaenexa

beyacaincha xua trescientos po paratiximonaebe xua po paratiximonaebe beyacaincha trescientos po matabibibe nexa, poxonae nacuita, jei Judas Iscariote.

<sup>6</sup>Judas apara jopa baxua paebiyo xua peantobexaetsi pomonae peacopeibiwi. Saya apara baxua paeba poxoru bapon pon pecaibin jiwi. Bapon Judas Jesusbaru paratixi dunucue tacapoinchi. Ichitha bapon cou jiwana wenoteiba paratixi poxonae Jesusbaru jeiba. <sup>7</sup>Nexata Judas Jesús barai, jeye:

—iMoyande bara copare! Apara xua barapowa netsibota barapo petuxuei tuxusi nasiwa tapepon nexa xua tatupaein tana neperu waenexa poxonae po mataqueitha muthiya tana neboyaenexa tsane. Baxua netsibota apara xua muthu tana neboyaenexa poxonae tupaein. <sup>8</sup>Barapo irathe peacopeibi jiwi paca baru jinompeibina painya neyawenaenexa tsaibi tsane barapo jiwi. Ichitha nama paxam jopa ataya paca baru poponae tsainchi xua pata tana neyawenaenexam barapo irathe, jei Jesús.

**Meje yabara poxonae sacerdotemonae pia pentacaponawewi tatsi peburuya nanta xeina xua Lázaro pebexubiwa tsainchi**

<sup>9</sup>Pinmonae judiomonae jume tane xua Jesús popona Betania tomaratha. Bapoxonae barapo judiomonae pona Betania tomara beya xua Jesús petaenexatsi iruru xua Lázaro petaenexatsi pon Jesús bayatha asu exana petupaе cuiru coyene weya. <sup>10</sup>Nexata sacerdotemonae pia pentacaponawewi tatsi peburuya nanta xeina xua iru Lázaro pebexubiwa tsainchi. <sup>11</sup>Tsipei pinmonae judiomonae penta sacerdotemonae pia pentacaponawewi tatsi pia pecuidubiwani tatsi. Matautano barapo judiomonae saya Jesús jume cowuntatsi tsipei Jesús cui tainchi pocotsiwa Jesús wunae exana poxonae Lázaro asu exainchi petupaе cuiru coyene weya.

**Meje yabara poxonae Jesús Jerusalén tomaratha patopa  
(Mt 21.1-11; Mr 11.1-11; Lc 19.28-40)**

<sup>12</sup>Icha mataqueitha baya xua poxonae po mataqueitha Jesús taxu wainchi petuxuei nasiwatha, bapoxonae Jesús pijimonae baru pona Jerusalén tomara beya. Bapoxonaeru Jeruslén tomaratha ena pin bicheito pomonae xua copiya bayatha pata Pascua wun matababin nexa. Daxita barapomonae yaputane xua anoxuae methaunxuae patopaena Jesús barapo tomaratha. <sup>13</sup>Barapo pin bicheito peaxu ucuboba po axu icha coichaxu axu ichi. Barapomonae Jesús matenta iyiyatsi xua Jesús pententa weyataeya wabinexatsi. Yawa jume daunweya wawaya jeye:

—iPai jayana! iMaisa Jesús pon Pecanamataxeinaein jiwi deta wunae, bapon patopa Nacom peitorobixae! iMaisa Nacom bichocono wunae

jaintatsi pon peitabocotha eca! ¡Maisa Jesús deta wūnae, pon Israel nacuamonae itorobiya pia pepa Peewatsinchi tatsi! jei barapo pin bicheito.

<sup>14</sup>Bapoxonae Jesús tane burro pon penūn. Bapoxonae barapo burrotha equeica yawa ponano namtotha. Jesús exana be pocotsi coyeneya caena bayatha yabara paebatsi Nacom Pejume Diwesitha, xua Mesías pepatopaewa tsane Jerusalén tomaratha, jeye:

<sup>15</sup>“Sión tomarapiwi pam, jopa pajunuwinde.

Pataema pon itorobiya pepa painya Nepacacaewatsin.

Bapon pacata patopaena xua burrotha

equeicaena”, jei Nacom Pejume Diwesitha.

<sup>16</sup>Bapoxonae Jesús pijimonae tatsi jopa yaputaeyo po coyene xua caena bayatha Jesús wūnae yabara tsiwūnae paebatsi, xuano xua po coyene exanaenano. Ichitha pirapae poxonae Jesús caibe nawicha peitaboco beicha, yawa poxonae Paxa matenta weyataeya wabatsi, bapoxonae barapomonae yaputane po coyene Jesús yabara tsiwūnae paebatsi Nacom Pejume Diwesitha, xuano xua jiwi exana poxonae Jesús wūnae jaintatsi.

<sup>17</sup>Pomonae naponae poxonae Jesús Lázaro wabatsi petūpae cuiru coyene weya, barapomonae tamropata notarūcupa xua jiwitha paeba pomonaetha pomonae Jerusalén tomarapiwi, pomonae bayatha Jesús pecui taexaetsi poxonae Lázaro asū exainchi. <sup>18</sup>Daxota pinmonae pona Jesús beya xua Jesús pematenta weyataeya wabinexatsi. Tsipei barapo pinmonae jume tane pocotsiwa Jesús exana pexeinya petsita itatsi coyenewa poxonae Lázaro asū exainchi. <sup>19</sup>Nexata fariseomonae caemonae natsipaeba, najei:

—¡Incane matha pataema! Barapomonae jopa naca jume cowūntsiyo, yawa daxita jiwi meisa napuna pona bapontha, najei barapomonae.

### **Meje yabara poxonae griegomonae Jesús wenaweneichi**

<sup>20</sup>Barapo pin bicheito, po bicheito copiya bayatha Jerusalén tomaratha ena, xua baxota wūnae pejainchinexa Nacom, barapo pin bicheito jiwamonae, griego nacuamonaepiwi jiwana. <sup>21</sup>Barapo griego nacuamonaepiwi Felipe imoxoyo caquita poinchi. Barapon Felipe Betsaida tomarapin xua Galilea nacuatha. Barapo griego nacuamonaepiwi Felipe tsipaebatsi, jeichichi:

—Incane matha pana nejume taema. Pata bequein Jesús taetsi, jei.

<sup>22</sup>Bapoxonae Felipe jume yopita Andrés beya, xua equeicha baponbe pejume yopichinexabe Jesús beya. <sup>23</sup>Bapoxonae Jesús baraponbe baraichi yawa daxita barapo jiwi baraichi, jeye:

—Nama imoxoyo barapo matacabi tsoponae, po mataqueitha xan, ponxaein Nacom tana neitapetsixae nebexubina ichamonae. Barapo mataqueitha Nacom ainya cui neexanaena. <sup>24</sup>Xaniyan paca tsipaebatsi. Poxonae trigo xuto saya

xu boca yawa icha jopa xu bocaeyo tsorobo tututha, yawa icha jopa xuwiyo, jopa itac̄paetsi xua pexaewa naexana. Ichitha icha barapo trigo xuto tsorobo tututha boca yawa icha xuwa, bapoxonae jame bara pexaewa naexana. Icha barapo trigo xuto ichi, xan barapocotsi coyeneya jiwi bara necana ichi tsane. <sup>25</sup>Pon naantobeya nata exana pocotsiwa bapon ichichipa po cae pin nacuathe, bapon jopa xeinaeyo peajunt̄yapus̄wa, po peajunt̄yapus̄wa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan, bapon xeinaena peajunt̄yapus̄wa, po peajunt̄yapus̄wa ataya tsiteca xua Nacom pia nacua beicha. <sup>26</sup>Pon ichichipa exana tawa xua penacuichiwa, bapon bara bewa moya exanaena pocotsiwa itoroban. Pon exana pocotsiwa itoroban, bapon patopaena ichaxota poponan. Icha pebin exana pocotsiwa itoroban, bapon Taxa cana exanaena xua bapon peainya cui jiton tsane Taxa pia nacua beicha tatsi, jei Jesús.

**Meje yabara poxonae Jesús nayabara paeba xua petupaewa tsane**

<sup>27</sup>Equeicha Jesús jeye: “Anoxuae bichocono anthuth̄rewein tsipei tat̄paewa tsaneba. ¿Eta jumichicuaein tsane metha Taxatha? ¿Metha jan tsane: ‘Axa, necapanepare baxua weya’, metha jan tsane? Jume, apara jopa baxua tsipatopeicaeyo. Apara tsipatopeican xua taaper̄tanewa tsane jiwi nexa. <sup>28</sup>Jame bejan: ‘Axa, bara b̄ jiwi cana exaname xua w̄nae necajainchiwa’, bejan jame”, jei Jesús.

Poxonae Jesús baxua najume weta, bapoxonae Jesús jume tane xua Nacom namchi peitaboco wetsica, jeye: “Bayatha apara baxua jiwi cana exanan xua jiwi w̄nae tana nejainteibiwanea, tsipei daxita beta exanan. Matautano equeicha ichawa exanaein xua jiwi w̄nae tana nejainteibiwanea tsane”, jei Nacom.

<sup>29</sup>Pinmonae umena xua Jesús jume taeumeinchi, ir̄ Jesús pijimonae tatsi baxota umenar̄. Barapo jiwi baxua nayabara yainyaba xua Nacom cueicueije. Ichamonae jeye:

—iApara xua jurujurei yam̄x̄! jei.

Ichamonae jeye:

—iApara bapon tsipaebatsi matatsunpin! jei.

<sup>30</sup>Nexata Jesús pijimonae barai, jeye:

—Pon pajume taneme apara Nacom. Jopa apara paebiyo xua xan nexa. Apara paeba pia xua painya nejume taenexa daxota baxua Nacom paeba.

<sup>31</sup>Imoxoyo nama matacabi patopaena, po mataqueitha Nacom yabara paebina jiwi xua penatsicuent̄siwa xua abe peexanaexae bapontha. Pon jiwi j̄nt̄ coyene itorobatsi xua abe peexanaewa po cae pin nacuathe, nama imoxoyo Nacom amanayabina bapon poxonae xubina barapo cae pin nacue weya. <sup>32</sup>Poxonae ichamonae nedutsina naetha tat̄paenexa tsane, bapoxonae daxita jiwi cana exanaein xua pomonae peichichipaewa tsane xua tana nejume cow̄ntsinea, jei Jesús.

<sup>33</sup>Poxonae Jesús baxua paeba jiwi yaputane exainchi xua Jesús pebexubiwa tsainchi poxonae tupaena. <sup>34</sup>Bapoxonae barapo jiwi Jesús tsipaebatsi. Jesús jeichichi:

—Paxan pajume tan xua poxonae wamonae yoroba Moisés pia peitorobi coyenewatha pocotsiwa baxota jeye: ‘Bara Mesías ataya asu poponeiba’, jei baxota. ¿Eta xua metha pana netsipaebame xua pinae pon Nacom Peitapetsin bewa naetotha tupaena? ¿Jintam metha pon Nacom Peitapetsin? jei barapomonae.

<sup>35</sup>Nexata Jesús tsipaeba barapomonae xua nacaunuta, jeye:

—Saya caeto pana netaneme pon paca yaputane exainchi. Beta pajinompame tapaca yawenaexae tsainchi, icha paichim xua beta pajinompame poxonae xometo paca yawena xua beta pajinompame mataqueitha. Pana nejume cowunde poxonae cataunxuae po cae pin nacuathe poponanje. Matautano poxonae cataunxuae paca itacupa xua pata tanejume cowuntsiwam. Jopa abe paexanaeinde xua poxoru poxonae jopa pata tanejume cowuntsixaemxae. Tsipei bara jütiya ichi, poxonae jiwi abe exana be poxonae pomonae pona ichaxota quirei. Jopa beta ponaeyo tsipei jopa xeinaeyo pecoicha. <sup>36</sup>Pana nejume cowunde poxonae cataunxuae po cae pin nacuathe poponanje. Bapoxonae paxam tajimonae pam tsane, jei Jesús.

Poxonae baxua Jesús najume weta, barapo jiwi weya natsixitaba yawa wepu aichurucuae.

**Meje yabara poxonae Jesús yabara paeba xua eta xua metha pinae Jesús jopa jume cowüntichi judiomonae**

<sup>37</sup>Bequein Jesús matowa exana pia pexeinya petsita itutsi coyenewan barapomonae peitutha tatsi, daichitha pinmonae barapomonae jopa Jesús yabara jume cui cowüntichi po coyene xua Jesús bara bapon Mesías pon Nacom itorobica. <sup>38</sup>Baxua exana xua nayabara jume cui weta po coyene bayatha pon Nacom peitorobi jume pepaebin Isaías wuna tsiwanaya yabara jei:

“Pon jiwi Necanamataxeinaein barapomonae jopa jume cowuntsiyo xua pacuiduban bequein barapomonae tane matowa poxonae paexanan Nacom pia peayapuswatha”,  
jei Isaías.

<sup>39</sup>Barapomonae jopa jume cowuntsiyo, tsipei Isaías equeicha jei:

<sup>40</sup>“Nacom cana exana xua barapomonae jopa beta xapain naita cui coyene yaputaeyo. Matautano Nacom cana exana xua jopa pejume cowuntsiwa pejuntu coyene wetsina. Barapomonae be natsicotane peitata nacutsi

jiwi, tsipei jopa beyaputaeyo, xua  
 icha jũntũ coyene pexeinaewanexa.

Matautano jopa ichipaeyo xua peyabara jume  
 cowũntsiwa po coyene xua Nacom itacũpatsi  
 xua pejũntũ coyene xanepana peexanaewa”,  
 jei Isaías pejume diwesitha.

<sup>41</sup>Daxita baxuan Isaías paeba xua Jesús yabara paebatsi. Isaías  
 caena bayatha tane poxonae eca Mesías pia pexeinya pia peitũpanae  
 peecaewatha. Daxota Isaías yabara paeba, Mesías yabara paebatsi xua  
 pocotsiwa bayatha petaxae.

<sup>42</sup>Bequein daxita judiomonae Jesús jopa jume cowũntichi, daichitha  
 ichamonae judiomonae Jesús jume cowũntatsi. Matautano ichamonae  
 judiomonae xua pomonae judiomonae pia pentacaponawewi tatsi Jesús  
 jume cowũntatsi. Ichitha daxita barapomonae jopa Jesús yabara  
 paebichi jiwi peitũtha tatsi tsipei fariseomonae cunuwatsi. Tsipei  
 icha barapomonae Jesús yabara paebichipatsi, metha barapomonae  
 itawetsipatsi judiomonae pia penacaetutsi bon tatsi weya, xua  
 fariseomonae itawetsipa. <sup>43</sup>Tsipei barapo Jesús pia pejume cowũntsiwichi  
 pijunuwi daxota itapeta jume naitawata xua jiwi jei: “Jopa Jesús  
 payabara paebinde”, jei jiwi. Barapomonae pomonae Jesús pejume  
 cowũntsiwichi baxua itapeta jume naitawata beyacaincha xua poxonae  
 bequein Nacom cui itoroba.

**Meje yabara xua po jume Jesús paeba barapo jumetha jiwi yabara  
 paebinchi xua penatsicuentisiwa xua abe peexanaexae**

<sup>44</sup>Equeicha Jesús jume daunweya jeye: “Pon nejume cowũnta meisa  
 jopa nejume cowũntsi tsane, jame Taxa jume cowũntsinchino pon tana  
 neitorobixae. <sup>45</sup>Pomonae xua neyaputane barapomonae barichi Taxa  
 yaputainchi. <sup>46</sup>Xan pon yabara yaputane paca cana exainchi Nacom.  
 Patopeican po cae pin nacuathe xua pomonae tana nejume cowũntsiwi  
 jopa penantawenonaenexa xua pejinompaewa poxonae jopa Nacom yabara  
 yaputaetsi. <sup>47</sup>Pon bequein jume tane tajume diwesi xuano xua icha bequein  
 jopa exanaeyo tana nejume taewatha pocotsiwa itoroban, bapon jopa  
 yabara paebin tsane xua penatsicuentisiwa xua abe peexanaexae Nacomtha.  
 Tsipei apara jopa baxua tsipatopaeinyo xua tacoya barapocotsi jiwimonae  
 tayabara paebinexa xua penatsicuentisiwa xua abe peexanaexae Nacomtha.  
 Jame apara tsipatopan xua jiwi ¼ tacapanenebiyaenexa tsane. <sup>48</sup>Pon jopa  
 tsita ainya cuichi xua jopa tsita ainya cuinyo, xuano xua icha jopa jume  
 cowũntsiyo pocotsiwa paeban po jume aunxuae paeban, bapon barapo  
 jumetha yabara paebinchi xua penatsicuentisiwa xua abe peexanaexae  
 poxonae po mataqueitha nacua weraweracaena. <sup>49</sup>Tsipei xan jopa paebinyo  
 pocotsiwa tacoutha taichichipaewa. Saya apara baxua daxita exanan



pocotsiwa Taxa neitoroba pocotsiwa bewa paebin xuano xua pocotsiwa bewa jiwi cuidubin. <sup>50</sup>Yaputan Taxa pia peitorobi coyenewa, barapo peitorobi coyenewa jiwi cana exainchi xua pexeinaewa peajuntuyapusuwa, po peajuntuyapusuwa ataya tsiteca. Daxota pocotsiwa paca tsipaebatsi apara xua Taxa bayatha tana neitorobixae”, jei Jesús.

**Meje yabara poxonae Jesús pijimonaе taxu matawane meratha**

**13** <sup>1</sup>Barapoxonaeru bara barapo matacabi tsuxubi, po matacabi tsiwanaya mata carucua xua Pascua wun matacabin. Jesús yaputane xua bara nama imoxoyo bara po matacabi tatsoponaetsiba, po mataqueitha Jesús cuenta ponaena po cae pin nacue xua Paxe beicha peponaewa tsane. Jesús antobe tsaibi pia pejume cowantsiwichi pomonaе xua tajinompatsi po cae pin nacuathe. Nama imoxoyo Jesús exana xua pocotsiwa jiwi yaputane xua Jesús jopa juniya antobeyo pomonaе pia pejume cowantsiwichi.

<sup>2-4</sup>Judas, pon Simón Iscariote pexanto tatsi, bapon cui itorobatsi caurimonaе pia pentacaponaein tatsi xua Jesús pecaenaetsinexatsi ichamonaetha. Jesús yaputane xua bayatha Paxe wetsica pona. Matautano xua equeicha Paxe beicha patopaena xuano xua Paxe catatsi daxita pia peayapusuwa itorobi coyenewa. Baxua bequein xeina, daichitha poxonaе pijimonaе baru eca pexaethopaewatha asiya uncuataba. Yawa paparuwa nama jonta, po paparuwa matha weruya. Yawa icha paparuwatha naepa cuta. <sup>5</sup>Bapoxonaе Jesús mera epata corototha. Bapoxonaе pijimonaе taxu matawaepona meratha. Yawa paparuwatha taxu tsewa exana po paparuwatha naepa cuta.

<sup>6</sup>Poxonaе Jesús Simón Pedro muxu petaxu matawaetsi, Simón jeje: —Tanecanamataxeinaem, ¿eta pocotsiwa metha iru jinya netaxu matawaetsi? jei Simón Pedro.

<sup>7</sup>Jesús jume barai, jeje: —Xua baxue cata exanatsi anoxuae jopa yabara yaputaem. Ichitha bexa tsane baxua yabara yaputaename, jei Jesús.

<sup>8</sup>Ichitha equeicha Simón Pedro jume barai, jeje: —Bapana jopa netaxu matawaem tsane, jei Simón Pedro. Jesús jume barai, jeje:

—Icha jopa cataxu matawaetsipaetsi meratha nexata jopa tajimonaе jitom tsipaem, jei Jesús.

<sup>9</sup>Simón Pedro jume barai, jeje: —Tanecanamataxeinaem, meisa jopa netaxu matawaеinde, jame yawa necobe matawaema, yawa nentasipa matawaema, jei Simón Pedro.

<sup>10</sup>Jesús jume barai, jeje: —Pon xua anoxuae nowaexuba, bapon equeicha jopa nantawenonaeyo xua pia pepon matawaeinchi, saya jame meisa petaxu. Paxam pejuntu coyene xeicaе jiwi pam, saya caein jiwana pam jopa daichiyo, jei Jesús.

<sup>11</sup>Jesús jeye: “Paxam pejüntu coyene xeicae jiwi pam, ichitha caein jiwana pam jopa daichiyo”, jei. Jesús baxua paeba tsipei yaputane xua caein jiwana pomonae Jesús pijimonae tatsi, bapon Jesús caenaetinchi.

<sup>12</sup>Poxonae Jesús nacobe weta xua pijimonae taxu matawane meratha equeicha paparuwa nama xatata po paparuwa copiya nama xuenaxuba. Bapoxonae equeicha econeca pexaethopaewatha. Yawa pijimonae barai, jeye:

—¿Bara payaputaneme xuaunxuae pacata exanatsi? <sup>13</sup>Pana neyabara jam: ‘Pon Patatanecuidubin’, pana neyabara jam. Yawano pana neyabara jam: ‘Pon Patatanecanamataxeinaein’, pana neyabara jam. Bara xainyeya pana neyabara jam baxua, tsipei apara xan bapon. <sup>14</sup>Ichá xan painya Tapacacuidubinchi xuano xua painya Tapacacanamataxeinaeinchi xua paca taxu matawainchi meratha bewa paxam bara paichim tsane, bewa nantiya pana nataxu matawaem meratha. <sup>15</sup>Baxua paca tsita exainchi xua painya bara paichinexam tsane ichaunxuae ichin. <sup>16</sup>Xaniyan paca tsipaebatsi. Pon ba tanacuita bapon jopa ainya cuiyo. Jame bapon pia pentacaponaein tatsi yatsicaya ainya cui beyacaincha pon tanacuita. Pon ba itorobatsi jopa ainya cuiyo. Jame pon peitorobixae bapon ainya cui. <sup>17</sup>Ichá baxua payaputaneme yawa icha baxua paexanaenameno bapoxonae pejüntu coyene weiweinae jiwi pam tsane.

<sup>18</sup>“Apara jopa daxita paca yabara paebichi xua pejüntu coyene weiweinae jiwi pam tsane, tsipei caein jiwana pam jopa daichiyo. Xan paca juntu coyene yaputainchi tsipei tapaca itapetichi jiwichi pam. Ichitha nacui yabara jume wetsina be po coyeneya bayatha Nacom tsiwunaeyabara paeba pejume diwesitha. Nacom jeye: ‘Pon baru xan, pon itara mexeya tajiton, bapon equeicha caewa tana neaitafaetabi jiton naexana’, jei Nacom Pejume Diwesitha. <sup>19</sup>Baxua pewunaeya paca tsipaebatsi xua poxonae necana exanaena pon equeicha caewa tana neaitafaetabi jiton naexana. Bapoxonae painya yabara tana nejume cowuntsinexam tsane xua xan bapon aparán xua ponxaein paca tsipaebatsi. <sup>20</sup>Xaniyan paca tsipaebatsi. Po pebin matenta weyataya waba pontha pon itoroban barapo pebin barapara nententa weyataya waba. Barichi pon nententa weyataya waba barapara Nacom matenta weyataya wabatsi, pon tana neitorobixae”, jei Jesús.

**Meje yabara poxonae Jesús jeye: “Judas necaenaetsina ichamonaetha”, jei (Mt 26.20-25; Mr 14.17-21; Lc 22.21-23)**

<sup>21</sup>Poxonae baxua Jesús najume weta, bapoxonae bichocono anthuthurewe tsanareca. Yawa najume naitapeinya xeinaeya, jeye:

—Xaniyan paca tsipaebatsi. Caein jiwana pam bapon necaenaetsina ichamonaetha, jei Jesús pijimonaetha.

<sup>22</sup>Nexata Jesús pijimonae tatsi naitabara taerucupa, nantiya najeye: “¿Jintam metha bepa Jesús caenaetichi?” najei. Ichitha barapomonae

jopa yaputaeyo xua Jesús yabara jei pon. <sup>23</sup>Caein Jesús pijimonae tatsi jiwana, pon bichocono Jesús antobe, bapon Jesús imoxoyo baru xunaeca, barapo pexaethopaewatha. <sup>24</sup>Simón Pedro pecobetha moya jume itoroba jeye: “Jesús yainyabare: ‘¿Jintam yabara paebame?’ jande”, jei Simón Pedro xua jume itorobatsi pon Jesús imoxoyo caquita ecatsi. <sup>25</sup>Bapoxonae Jesús imoxoyo caquita ecarenatsi equeicha. Jesús yainyabatsi, jeye:

—Tanecanamataxeinaem, ¿jintam cacaenaetsina? jei.

<sup>26</sup>Jesús jume nota, bapon jume notatsi, jeye:

—Pan p̄r̄w̄iyo tha atatsica exanaetsi. Pon catan barapo pan p̄r̄w̄iyo, bapon apara pon necaenaetsina ichamonaetha, jei Jesús pontha pon peyainyabixaetsi.

Poxonae Jesús pan p̄r̄w̄iyo atatsica exana, bapoxonae Jesús cata, Judas catatsi pon Simón Iscariote pexanto tatsi. <sup>27</sup>Poxonae Judas barapo pan Jesús wecobe pitatsi, bapoxonae caena nainya Judas j̄nt̄u coyene itorobatsi Satanás caurimonae pia pentacaponaein tatsi xua Jesús pecaenaetsiwa tsainchi. Bapoxonae Jesús jeye, Judas jeichichi:

—Xua pocotsiwa jinya anoxuae exanaetsi, moya exande nainya, jei Jesús.

<sup>28</sup>Daxita barapomonae pomonae Jesús pijimonae tatsi, pomonae pebaru xunaecaexae, jopa xapain yaputaeyo pocotsiwa Jesús itoroba, xua Judas itorobatsi. <sup>29</sup>Tsipei bapon Judas paratixi doru capopona, daxota Jesús pijimonae tatsi nanta xeina xua mexeya itara Jesús itorobawejei xua pia tacomotichi pexaewa penabanae coyenewa nexa. Yawa nanta xeina xua mexeya itara Jesús itorobawejei xua Judas paratixi pecatsinexa peacopeibi jiwitha. <sup>30</sup>Poxonae Judas Jesús wecobe pitatsi pan p̄r̄w̄iyo, bapoxonae Judas ponataba. Ir̄ru bapoxonae quirei tsanaicharu.

### **Meje yabara poxonae Jesús yabara cuiduba jiwi pena peitorobi coyenewa**

<sup>31</sup>Nexata poxonae Judas pontaba Jesús pijimonae barai, jeye:

—Imoxoyo nama paca tsita itutsinchi taayapus̄ya itorobiya coyenewa xua xan apara bara ponxaein Nacom Tananeitapetsin. Barichino paca tsita itutsinchi Nacom pia peayapus̄u itorobi coyenewa tatsi. <sup>32</sup>Icha xan ponxaein Nacom Tananeitapetsin, icha paca tsita itutatsi Nacom pia peayapus̄u itorobi coyenewa, nexata Nacom xuya nainya paca tsita itutsina taayapus̄u itorobi coyenewa xua xan apara bara ponxaein Nacom Tananeitapetsin. <sup>33</sup>Pomonae be tapexui tapaca canatsicotaewichi pam, bara nama saya caeto paca baru poponaeinchi. Icha ichin xua caena bayatha xua judiomonae tsipaeban, bara paca jumichichi anoxuae: ‘Jopa paca itac̄p̄ae tsane xua pana nepuna ponaename ichaxota taponawa tsane’, paca jeichi. <sup>34</sup>Barapo pena itorobi coyenewa paca cuidubatsi, xua janje: ‘Nantiya pana naantobeinde, icha paca ichichi xua paca antobetsi. Bewa bara paichim tsane xua nantiya pana naantobem tsane’, jan. <sup>35</sup>Icha

paxam nantiya pana naantobem tsurubenanaebiyam tsane, daxita jiwi paca cui yaputaena xua paxam bara apara tana nejume cowũntsi jiwi pam, jei Jesús.

**Meje yabara poxonae Jesús namchi xua Pedro jei tsane:  
“Jopa dapon yaitaeinyo”, pinae yabara jei tsainchi Jesús  
(Mt 26.31-35; Mr 14.27-31; Lc 22.31-34)**

<sup>36</sup>Simón Pedro Jesús yainyabatsi, Pedro jeye:

—Tanecanamataxeinaem, ¿jinya exota ponaetsi? jei Simón Pedro.

Jesús jume nota, jeye:

—Anoxuae jopa caitacũpaeyo xua tana nepuna ponaewam ichaxota ponaein. Ichitha bexa tsane caitacũpaena xua tana nepuna ponaewam ichaxota ponaein, jei Jesús.

<sup>37</sup>Nexata Simón Pedro jume barai, jeye:

—Tanecanamataxeinaem, ¿eta xua metha baxua paebame xua anoxuae jopa neitacũpaeyo xua tacapuna ponaewatsi ichaxota poname? ¡Ichitha xan bara copatan xua jiwi tana nebexubinexa tacapuna ponaenexatsi! jei Pedro.

<sup>38</sup>Jesús jume barai, jeye:

—¿Bara xaniwaicha xua xam bara copatame xua jiwi necabexubinexa tana nepuna ponaenexam? Jume, apara xaniyan catsipaebatsi barapo merawithe acolibi po jumeyobebe neyabara jam tsane: ‘Jopa dapon yaitaeinyo’, neyabara jam tsane. Bapoxonae irũrũ wacara pebto fibina, jei Jesús.

**Meje yabara poxonae Jesús jeye: “Xan apara pon  
jiwi matacaponan Taxa beicha”, jei Jesús**

**14** <sup>1</sup>Equeicha Jesús pijimonae barai, jeye: “Jopa yabara nantũ exabinde ichawan. Pana neyabara jume cowũnteibare yawano Taxa payabara jume cowũnteibareno. <sup>2</sup>Taxa pia nacua beicha bon nawita ichaxota jiwi pejinompaewa. Icha bon ajibi tsipae, metha bayatha jopa paca tsipaebichipaetsi, daxota apara paeban tsipei xainyan. Daxota paca tsiwanaeya pacata tutu wũnaetinchi bara po bon. <sup>3</sup>Poxonae wetan xua Taxa beicha taponae xua xua xua icha nacobe wetan xua bon paca tsiwanaeya tutu wũnaetatsi, bapoxonae equeicha patopeicaein. Paca caponaeinchi ichaxoteicha xua tapoponaewa tsane. <sup>4</sup>Paxam payaputaneme ichaxota ponaein. Daxota payaputanemeno po coyeneya xua painya nepatsiwa tsane baxota”, jei Jesús.

<sup>5</sup>Tomás jeye Jesustha:

—Patatanecanamataxeinaem, jopa payaputaeyo po nacua beya ichaxota ponaename. Tsipei baxua jopa payaputaeyo, daxota jopa pana neitacũpaeyo xua pata ponaewa po nacua beya ichaxota xam ponaename, jei Tomás.

<sup>6</sup>Jesús jume nota, jeye:

—Xan apara pon jiwi tamatacaponaein Taxa beicha. Matautano xan pon xainyeya tapaebin. Matautano xan apara pon jiwi tacatsin peajüntuyapusüwa, po peajüntuyapusüwa ataya tsiteca. Saya meisa xan ba jiwi yawenan xua pepatsiwa Taxa beicha. <sup>7</sup>Icha paxam pana neyaputaneme bara paichim Taxa payaputaneme. Daxota anoxuae nama Taxa payaputaneme yawano patanemeno tsipei paxam pana netaneme, jei Jesús.

<sup>8</sup>Nexata Felipe Jesús baraichichi, jeye:

—Patatanecanamataxeinaem, copare xua Axa pata tha taetsi. Bapoxonae jüntema pata jinompaewa tsane, jei Felipe.

<sup>9</sup>Jesús Felipe jume notatsi. Jesús jeye:

—Felipe, bara bayatha cabarü popoinchiba. ¿Eta xua came jopa neyaputaem? Pon ba netane barichi apara bara Taxa tainchi. Daxota jopa benejam: ‘Copare painta pata tha Axa taetsi’, jopa bepana nejam. <sup>10</sup>¿Eta xua metha jopa jume cowuntsim xua bara Taxa neyanta xua bara irü Taxa yantandü? Daxita pocotsiwan paca tsipaebatsi apara jopa paebinyo pocotsiwa tacoutha ichichipan. Apara Taxa pon neyantsiya popona baxua apara exana pocotsiwa xua exanan. <sup>11</sup>Pajume cowunde xua Taxa neyanta popona, xua Taxa irü yanta poponan xua daxota Taxa be caein panbe. Icha jopa paca itacüpaeyo xua pana nejume cowuntame pocotsiwa yabara paca tsipaebatsi Taxa, moya pana necui yabara jume cowunde xua bayatha exanan pexeinya tatsita itütsi coyenewan. Baxuan jiwi tsita itüban xua bara xainyei xua Taxa neyanta popona xua daxota Taxa be caeinbe panbe. <sup>12</sup>Xaniyan paca tsipaebatsi, pon nejume cowanta, bapon irü exanaena pocotsiwa exanan. Matautano equeicha ichawan mataropeicha exanaena pewünaewan beyacaincha xua pocotsiwa exanan. Tsipei xan ponaein Taxa beicha. <sup>13</sup>Daxita pocotsiwan pana newün caununaya wücame Taxa beicha, bara baxua exanaein, tapaca catsita itütsinexatsi Taxa pia peayapusü itorobi coyenewa tatsi. <sup>14</sup>Bara pacata exanaeinchi poxonae pana newün caununaya wücame Taxa beicha, jei Jesús.

**Meje yabara poxonae Jesús tsiwünaeya paeba xua bexa  
Nacom najumope tünaxü itorobina jiwitha**

<sup>15</sup>Equeicha Jesús barai pijimonae, jeye: “Icha pana neantobem, moya paexande taitorobi coyenewan. <sup>16</sup>Icha baxua paexanaename tha bapoxonae Taxa wücaetsi jan tsane: ‘Axa, ichün itorobare xua barapomonae peyawenaenexatsi’, jan tsane. Bapoxonae Taxa pacata itorobina pon ataya paca yantsiya poponeibina. <sup>17</sup>Pon Nacom itorobina, apara bapon bara pia Pejumope tünaxü tatsi, po Pejumope tünaxü tatsi paca yaputane exana xua bara xainyei xua pocotsiwa Nacom yabara.

Ichitha pomonae jopa nejume cowuntsiyo, barapomonae jopa yaputaeyo Nacom pia Pejumope tñaxu tatsi. Daxota barapo Nacom pia Pejumope tñaxu tatsi jopa itacupaetsi xua barapomonae peyantsiya jinompaewatsi. Daichitha payaputaename barapo Nacom pia Pejumope tñaxu tatsi tsipei pacata patopaena yawano ataya paca yantsiya poponaena”, jei Jesús.

<sup>18</sup>Equeicha Jesús barai pijimonae, jeye: “Jopa paca punapentsi tsainchi. Equeicha caibe patopeicaein xua tapaca baru poponaewatsi tsainchi. <sup>19</sup>Bara caeto jiwi jopa netae tsane pomonae jopa tana nejume cowuntsiwi. Ichitha paxam pana netaename. Paxam equeicha asu pajinompaename tsipei xan equeicha asu poponaein. <sup>20</sup>Barapo mataqueitha poxonae Nacom pia Pejumope tñaxu tatsi patopeicaena, payaputaename xua xan Taxa be caein pana naexananbe iru xua paxam be caein pana necana exaname iru xua xan be caein paca cana exanatsi. <sup>21</sup>Pon yaputane taitorobi coyenewan xuano xua exana xua barapo taitorobi coyenewan paeba, bapon tsita itapeinya xeina jiwitha xua xaniwaicha bara neantobe. Taxa antobe tsane bapon, pon neantobe. Xan barichin antobein tsane bapon. Matautano yaputane exanaein xua bara bapon baru poponan”, jei Jesús.

<sup>22</sup>Iru Judas pon seicaya ichundu, pon Judas Iscariote aibi, barapo Judas Jesús tsipaebatsi, Jesús jeichichi:

—Patatanecanamataxeinaem, zeta xua jinya meisa pana neyaputane exanaetsi xua bara pana nebaru jinompame xua jopa daichim pomonaetha pomonae jopa cajume cowuntsiyo? jei Judas.

<sup>23</sup>Jesús Judas jume notatsi, jeye:

—Pon neantobe bapon exana pocotsiwa itoroban. Bapoxonae Taxa antobe tsane bapon. Xan iruru Taxa pon caein panxaeinbe papatopaeinbe bapontha pata yantsinexa bapon. <sup>24</sup>Pon jopa neantobeyo, bapon jopa exanaeyo pocotsiwa itoroban. Po jume diwesi xuaunxuae pana nejume taneme apara jopa nata paebinyo. Apara baxua paeban tsipei Taxa nejume caitoroba pon tana neitorobixae, jei Jesús xua Judas tsipaebatsi.

<sup>25</sup>Equeicha Jesús pijimonae barai, jeye: “Daxita baxuan paca tsipaebatsi poxonae cataunxuae paca baru popoinchi anoxuae. <sup>26</sup>Inta paxam pacata Nacom najumope tñaxu itorobina. Barapo Nacom pia Pejumope tñaxu tatsi paca yawenaena. Matautano paca cuidubina xua pexainyeiwa xua Nacom yabara. Matautano barapo Nacom pia Pejumope tñaxu tatsi paca cana exanaena xua pana neyabara cananta xeinaename xua pocotsiwan bayatha daxita yabara paca tsipaebatsi.

<sup>27</sup>“Poxonae paca cuenta ponaeinchi juntema jinompa paca cana exanaeinchi. Paca catinchi po coyene juntema tapoponae coyenewa. Barapo juntema tapoponae coyenewa jopa bara be juta ichiyo xua jiwi barompaya juntema pia pejinompa coyenewa tatsi. Jopa yabara pana

najuntũ exabinde ichawan. Matauta jopa junuwiya pajinompaeinde.  
<sup>28</sup>Bayatha pana nejume taneme xua ponaein jan xuano xua equeicha patopeicaein paxamtha xua paca baru poponaeinchi jan. Icha xaniwaicha pana neantobem tsipaem metha pajuntũ coyene weiweinaetsipame xua taponaewa Taxa beicha. Tsipei Taxa bichocono ainya cui, beyacaincha xua xan poxonae cataunxuae poponan po cae pin nacuathe. <sup>29</sup>Baxua paca tsipaebatsi xua tsiwũnae paeban painya tana nejume cowũntsinexam tsane poxonae xaniwaicha baxua tsane.

<sup>30</sup>“Nama imoxoyo jopa neitacupaeyo xua equeicha caeto tapaca tsipaebiwa tsainchi, tsipei nama imoxoyo patopaenaba pon jiwi jũntũ coyene itorobeibatsi po jiwitha jopa tana nejume cowũntsiwi. Ichitha bapon jopa xeinaeyo peayapusũ itorobi coyenewa xua tana neitorobiwa tsane. <sup>31</sup>Bewa exanaein pocotsiwa xua Taxa neitoroba, xua daxita jiwi peyaputaenexa xua apara bara xan ponxaein Taxa bichocono tana neantobein.

“iPanonoba ponde! Weye poinchi”, jei Jesús pijimonaetha.

**Meje yabara poxonae Jesús yabara paeba uva ʌnboto xua pepa ʌnboto**

**15** <sup>1</sup>Equeicha Jesús jeye: “Icha pepa ʌnboto ichi xua petabũ opina wejujuina mene xua uva thei penacoichinexa, xan bara pocotsi jũta coyeneya cana ichin jiwi. Jiwi ajũntũcoyenyapususũ cana exanan pomonae tana nejume cowũntsi jiwi, icha uva pabi pexeinaein ichi xua yabaca xueta xua xanepanaya petaxuwiwa tsainchi. Taxa bara jũta coyeneya ichi. Taxa yawena pomonae tana nejume cowũntsiwi, pomonae xanepanaya inta pejinompaewi. <sup>2</sup>Uva pabi pexeinaein daxita ucuboba po maxũranan xua jopa nacoichiyo. Bapoxonae daxita barapo pemaxũranan po maxũranan xua dubena xanepanaya nacoita beyacaincha xua copiya poxonae nacoita. Taxa barapocotsi jũta coyeneya exana. Taxa itaweta pomonae bequein nejume cowũnta ichitha jopa beta jinompaeyo xan nexa. Barichi pomonae bequein nejume cowũnta ichitha saya tsiwiyo exana pocotsiwa itoroban, Taxa atene cana exana xua barapomonae atene, xua daxota barapomonae beta exanaena pocotsiwa itoroban. <sup>3</sup>Pajũntũ coyene wũnaem painya tana nejume cowũntsixaemxae xua bayatha po jume diwesi tapaca tsipaebixaetsi. <sup>4</sup>Pana necayawa jinompeibare icha ichin xua ataya paca cayawa poponeibinchi. Uva ʌnboto maxũranawa ba poxonae iratha maxũrana boca jopa ba pipatotha matono xuwouncuaeyo xua pethei perubenaenexa. Bara jũta coyeneya paichim. Icha jopa pana necayawa jinompaem, jopa paxeinaem tsane xua po coyene pexeinya peajũntũyapusũ coyenewa.

<sup>5</sup>“Icha pepa uva ʌnboto ichi xua xeina pemaxũranawan, bara jũta coyeneya ichin. Xeinan pomonae tana nejume cowũntsi jiwi pam. Pepa uva ʌnboto nacoita exana nawita pethei pemaxũranawantha tsipei

poxoru pemaɣranawan dubena pepa uva ɯnbototha tsica. Bara jutiya ichi icha pana necayawa jinompame bapoxonae bichocono paca juntu coyene xanepana exanaeinchi. Daxota icha pana nepentsiya jinompame jopa paca itacupaetsipae xua paexaname pocotsiwa xua Nacom ichichipa. <sup>6</sup>Pon jopa necayawa poponaeyo bapon Taxa itawetsina, icha xua uva pabi pexeinaein ichi. Bapon petupae maxɣranawan nota xua bayatha ucobobeba yawa bapoxonae isotototha bebeya petautsinexa.

<sup>7</sup>“Icha pana necayawa jinompaename yawa icha jopa pajuntemainnem tsane pocotsiwa bayatha paca cuidubatsi, bapoxonae pocotsiwa pana newucaename bara baxua pacata exanaeinchi. <sup>8</sup>Jiwi Taxa baru cui itura jinatsi poxonae paca tane xua betiya xanepanaya pajinompame painya neexanaexae pocotsiwa Taxa paca itoroba. Yawa Taxa baru cui itura jinatsi tsipei barapomonae paca cui yaputane xua paxam barapara pepa tamonae jiwi pam. <sup>9</sup>Paca antobetsi icha Taxa ichi xua neantobe. Ataya payacuiya jinompare xua paxam po coyene xua pomonae tapana nejume cowuntsi jiwi pam. <sup>10</sup>Paexanaponde pocotsiwa paca itorobatsi, bapoxonae bichocono tsitecaeya paca antobe tsoponae tsainchi, icha xan ichin xua poxonae exanan pocotsiwa Taxa neitoroba xua daxota ataya tsitecaeya neantobe tsoponae.

<sup>11</sup>“Baxuan paca tsipaebatsi xua paca juntu coyene xanepana exanaeinchi xua bapoxonae bichocono pajuntu coyene weiweinaename. <sup>12</sup>Barapo taitorobi coyenewa baxue xua janje: ‘Nantiya paxam pana naantobeinde, icha paca ichichi xua paca antobetsi’, jan. <sup>13</sup>Yabara paca tsipaebatsi po peantobewa bichocono ainya cui beyacaincha icha peantobewa. Barapocotsi peantobewa xeina pebin poxonae peantobexae pia jiton yaitataba xua pebexubinexatsi xua pia jiton tatsi jopa bepetabexubiwa tsainchi. <sup>14</sup>Paxam apara tajiwiwimonae pam, icha paexanaponaename pocotsiwa xua tapaca itorobiwatsi. <sup>15</sup>Anoxuae jopa bepaca caunutichi xua paxam pomonae inta amanaya penacuichiwi pam. Nama po cae pin nacuathe pomonae petanacuichiwi jopa yabara yaputaeyo pocotsiwa exana pomonae pia pecanamataxeinaewichi tsipei jopa baxua yabara paebiyo. Ichitha paca caunutatsi xua paxam apara tajiwiwimonae pam, tsipei nama xan paca cana exainchi xua payabara yaputaneme daxita pocotsiwan xuan Taxa necui itoroba. <sup>16</sup>Apara jopa pana neitapetsim. Jame apara paca itapetatsi. Paca cui itorobatsi xua xanepanaya painya neexanaewa pocotsiwa Taxa paca itoroba. Ichichipan xua jopa peweraweracaewa tsane pocotsiwan painta exanaename. Bapoxonae Taxa bara pacata exanaena poxonae Taxa beicha pawucame poxonae pana nebuxuna bobenouname. <sup>17</sup>Daxota equeicha paca jeichi: ‘Paxam nantiya pana naantobeinde’, jan”, jei Jesús pijimonaetha.

**Meje yabara poxonae Jesús jeye: “Jiwi necaseba, iru paca caseba”, jei Jesús**

<sup>18</sup>Equeicha Jesús jeye: “Pomonae jopa nejume cowuntsiyo icha barapomonae paca caseba pananta xeinare xua barapomonae copiya



necaseba daxota paca casebaru. <sup>19</sup>Icha paxam pomonae jopa pata tana nejume cowuntsiwi jiwana pam tsipaem, bapoxonae pomonae necaseba paca antobe tsipae icha ichi xua barompaya antobe pijimonae. Pomonae xote jinompe, pomonae jopa tana nejume cowuntsiwi, barapomonae pexantha tatsi paca itapetatsi daxota barapomonae paca caseba. Tsipei anoxuae paxam jopa barapomonae jiwana pam. <sup>20</sup>Pana nejume cayabara nanta xeinare xua bayatha paca tsipaebatsi xua janje: ‘Pon ba tanacuita ichun, bapon jopa ainya cuiyo, jame pia pentacaponaein tatsi ainya cui pon peitorobixaetsi’, paca jeichi. Tsipei jiwi inta abe exana daxota iru pacata abe exana. Jiwi jopa jume cowuntsiyo tacuidubiwa. Barichi jopa jume cowuntsiyo painya necuidubiwa. <sup>21</sup>Daxita baxuan jiwi paca cana exanaena xua painya neexanaexae pocotsiwa paca itorobatsi tsipei jopa yaputaetsi pon neitoroba pon Taxaxae.

<sup>22</sup>“Icha jopa patopaeinchipae po cae pin nacuathe, xuano xua icha jopa cuidubinchipae barapomonaetha, barapomonae jopa natsicuentcipae xua abe peexanaexae tsipei jopa yaputaetsipae xua abe exana. Ichitha anoxuae jopa itacupaetsi xua pejeiwa: ‘Jopa payaputaeyino xua abe paexanan’, xua pejeiwa, tsipei patopan yawa cuiduban barapomonae. <sup>23</sup>Pomonae xua necaseba, barapomonae iru Taxa casebatsi.

<sup>24</sup>Barapomonae tane xua xan exanan pocotsiwa ichun jopa itacupaetsi xua peexanaewa. Icha barapomonae jopa bayatha necui taetsipae xua exanan jopa natsicuentcipae xua abe peexanaexae jopa peyaputaexae tsipae xua abe exana. Ichitha barapomonae bara xaniwaicha necui tane xua exanan. Matautano yaputane xua abe exana. Daxota barapomonae necaseba iru daxota Taxa casebatsi. <sup>25</sup>Ichitha baxua bewa neyabara jume cui wetsina tsipei Moisés pia peitorobi coyenewatha neyabara tsiwunaeya jeye: ‘Barapomonae necaseba poxoru saya apatsi’, jei barapo Moisés pia peitorobi coyenewatha.

<sup>26</sup>“Itorobin Nacom pia Pejumope tunaxu tatsi xua po pejumope tunaxu Taxa werena pona, po pejumope tunaxu paca yawenaena po pejumope xainyeya pepaebin. Barapo pejumope tunaxu neyabara paebina poxonae bapon patopeicaena. <sup>27</sup>Paxam bara paichim tsane ichamonaetha pana neyabara paebiname. Tsipei poxonae aena tamropata pitaban tanacuichiwa barapo cae pin nacuathe, bapoxonae caena bayatha pana nebaru jinompame”, jei Jesús pijimonaetha.

**16** <sup>1</sup>Equeicha Jesús barai pijimonaetha, jeye: “Baxua paca tsipaebatsi xua jopa painya nebarapentsiwa tsane xua tapana nejume cowuntsiwam poxonae jiwi abe pacata exanaena. <sup>2</sup>Paca itawetsina judiomonaetha pia penacaetutsi bon weya. Po mataqueitha poxonae jiwi paca jutebina, barapo jiwi catsawiya nanta xeinaena xua Nacom pecui itorobixae xua daxota painya paca necajutebiwa tsane. <sup>3</sup>Barapo jiwi baxua pacata exanaena, tsipei jopa neyaputaeyo matauta Taxa tsipei jopa

yaputaetsi. <sup>4</sup>Baraxua paca tsipaebatsi xua painya tana necayabara jume cananta xeinaewam tsane poxonae barapo matacabi tsane poxonae po mataqueitha jiwi abe pacata exanaena.

**Meje yabara po coyene xua Nacom pia Pejumope t̃nax̃ tatsi exana**

“Poxonae aena tamropata pitaban tanacuichiwa baraxua jopa paca tsipaebichi tsipei paca baru popoinchi. <sup>5</sup>Ichitha nama anoxuae baxua paca tsipaebatsi tsipei ponaein, xua Taxa beicha taecaewa tsane pon tana neitorobixae. Dapon aibi paxam jiwana pam pon neyainyaba xua nejei: ‘¿Eta xota ponaename?’ pon nejei, tsipei daxita pam bara pana neyaputaneme xua xota taponae. <sup>6</sup>Nama anoxuae bichocono panthuth̃ wecoyam tapaca tsipaebixaetsi baxua. <sup>7</sup>Ichitha bara yatsicaya xainyeya paca tsipaebatsi. Baxua pacata w̃nae xua taponae tsipei icha jopa ponaeinchipae, jopa neitac̃paetsipae xua taitorobiwa Nacom pia Pejumope t̃nax̃ tatsi xua painya nepaca cayawenaenexa. Icha ponaein barapo jumope pacata itorobinchi. <sup>8</sup>Poxonae Nacom pia Pejumope t̃nax̃ tatsi patopeicaena, jiwi yabara yaputane cana exanaeinchi pocotsiwa daxita jiwi abe peexanae cuiru coyenein exana. Matautano barapo Nacom pia Pejumope t̃nax̃ tatsi jiwi yaputane cana exanaeinchi xua xan saya xanepanaya Nacom tayabara paebin. Matautano barapo Nacom pia Pejumope t̃nax̃ tatsi jiwi yaputane cana exanaeinchi xua po coyene poxonae Nacom exanaena xua Nacom yabara paebina daxita jiwi xua penatsicuentisiwa xua abe peexanaexae. <sup>9</sup>Poxonae barapomonae abe peexanae cuiru coyene exana baxua tsita itapeinya xeina xua barapomonae jopa tana nejume cow̃ntsiwi. <sup>10</sup>Matautano jiwi yaputane cana exanaeinchi xua xan saya xanepanaya Nacom tayabara paebin, tsipei Taxa beicha ponaein yawa paxam jopa equeicha pana netaem tsane. <sup>11</sup>Matauta barapo Nacom pia Pejumope t̃nax̃ tatsi jiwi yaputane cana exanaeinchi xua po coyene poxonae Nacom exanaena xua Nacom yabara paebina daxita jiwi xua penatsicuentisiwa xua abe peexanaexae. Tsipei caena bayatha bapocotsiwa exana caurimonae pia pentacaponaeintha, pon jiwi j̃nt̃ coyene itorobatsi barapo cae pin nacuathe xua abe peexanaenexa. Matautano Nacom bapontha cana exanaena xua bexa bapon weraweracaena.

<sup>12</sup>“Ichawa bequein xeinan xua tapaca tsipaebiwatsi ichitha anoxuae jopa paca itac̃paeyo xua painya neyaputaewa tsipei jopa paca coyene c̃paeyo. <sup>13</sup>Poxonae patopeicaena Nacom pia Pejumope t̃nax̃ tatsi, barapo pejumope t̃nax̃ paca tsipaebina daxita xua xuan pocotsiwa pexainyeiwa tsipei apara jopa paebi tsane xua pia coutha peichichipaewa. Saya paebina xua Nacom bayatha jume tainchi. Matautano barapo pejumope t̃nax̃ yabara yaputane paca cana exanaena pocotsiwa bexa tsane exanaena po cae pin nacuathe tsique. <sup>14</sup>Barapo Pejumope t̃nax̃

jiwi cana exanaeinchi xua jiwi wunaē tana nejainchiwa tsane. Pocotsiwa xua paca tsipaebatsi, barapo pejumope tūnaxū xuya yaputane paca exanaena. <sup>15</sup>Daxita xua Taxa pocotsiwa xeina irū apra xan tawa. Daxota paca jeiche: ‘Pocotsiwa tacuidubi coyenewa, barapo coyenewa barapo pejumope tūnaxū xuya equeicha paca cuidubina’, paca jeichi.

<sup>16</sup>“Caeto tsane jopa pana netaem tsane. Ichitha bexa tsane bapoxonae equeicha pana netaename. Bapoxonae pirapaeyo Taxa beicha ponaein”, jei Jesús pijimonaetha.

**Meje yabara poxonae Jesús jeye: “Bequein copiya pawecoyam tsane ichitha bexa equeicha pajūntū coyene weiweinaename”, jei Jesús**

<sup>17</sup>Bapoxonae ichamonae pomonae Jesús pijimonaē tatsi caemonae nayainyaba, najei:

—¿Eta xua bapon naca tsipaebara? ¿Eta xua metha naca jei: ‘Caeto tsane jopa pana netaem tsane. Ichitha bexa tsane, bapoxonae equeicha pana netaename. Bapoxonae pirapaeyo Taxa beicha ponaein’, naca jei? <sup>18</sup>¿Eta xua metha ‘caeto tsane’, jane? Jopa baxua yaputaetsi, najei.

<sup>19</sup>Jesús pijimonaē yaputane xua pijimonaē juntucuru yainyabatsi. Daxota pijimonaē barai, jeye:

—Xuaunxuae paca jeichi: ‘Caeto tsane jopa pana netaem tsane. Ichitha bexa tsane bapoxonae equeicha pana netaename’, jan ¿baxua apra pana necayabara jume yainyabame? <sup>20</sup>Xaniyan paca tsipaebatsi. Tacoutha paxam pawecoyam tsane yawano paanthūthūrewem tsane poxonae irūru jūntū coyene weiweinaena pomonae jopa tana nejume cowūntsi jiwi. Bequein caeto pawecoyam tsane ichitha equeicha pajūntū coyene weiweinaename. <sup>21</sup>Poxonae yabūyo būpana taecatsi pexuyo, poxonae imoxoyo naexanaena pexuyo, bapowa bichocono wecoyei. Ichitha poxonae bayatha pexuyo naexana, bapoxonae bapowa nacayabara jūntemaina xua bayatha yaporowa papai xua peatenexae. Daxota bapowa jūntū coyene weiweina pexuyo bayatha penaexanaexae. <sup>22</sup>Bara jūta coyeneya paichim tsane. Poxonae tūpaein xua taponae nexa tsane, bequein pawecoyam tsane, ichitha panetaename poxonae asūn tsane xua ponaein Taxa beicha. Yawa bapoxonae pajūntū coyene weiweinaename. Dapon aibi pon barapo jūntū weiweinaē coyenewa paca jūntū coyene wejūntemaina cana exanaena.

<sup>23</sup>“Barapo mataqueitha, po mataqueitha Taxa beicha ponaein, equeicha bara nama jopa painya tana neyainyabiwam tsane. Saya meisa poxonae Taxa beicha pana newūn caununaya wūcaename, bara baxua daxita pacata exanaena. Baxuan pocotsiwa paca tsipaebatsi bara xainyan.

<sup>24</sup>Caena bayatha xua beya anoxuae jopa pana newūn caununaya wūcaem Taxa beicha. Anoxuae nama pana newūn caununaya wūcaename Taxa beicha. Bara baxua pacata exanaena xua bichocono yatsicaya painya nejūntū coyene weiweinaewa tsane”, jei Jesús pijimonaetha.

**Meje yabara poxonae Jesús jeye: “Xan amanayabaxubin pon jiwi juntu coyene itorobatsi po cae pin nacuathe”, jei Jesús**

<sup>25</sup>Equeicha Jesús barai pijimonae, jeye: “Pocotsiwan xua bayatha paca tsipaebatsi, bara paeban pecayabara juta pepaebi diwesixitha. Ichitha barapo matacabi patopaena, po mataqueitha jopa paca tsipaebi tsainchi pecayabara juta pepaebi diwesixitha. Barapo mataqueitha bara Nacom yabara jume penthiya paca tsipaebinchi. <sup>26</sup>Barapo mataqueitha pana newun caununaya wucaename Taxa beicha. Jopa paca tsipaebichi xua Taxatha tapacata wucaewa tsainchi tsipei apara bara painya coya paca itacupa. <sup>27</sup>Taxa paca antobe pata tana neantobemxaem yawa pata tana nejume yabara cowuntsixaemxae xua xan bara yatsicaya Taxa wetsica ponan. <sup>28</sup>Taxa pia xainya wetsica ponan xua tapatopaewa tsane po cae pin nacuathe tsique. Ichitha anoxuae barapo cae pin nacue cuenta ponan xua equeicha Taxa beicha taponawa tsane”, jei Jesús pijimonaetha.

<sup>29</sup>Nexata Jesús pijimonaexae baraichichi, jeye:

—Anoxuae bara yatsicaya jume penthiya pana netsipaebame. Jopa paebim pecayabara juta pepaebi diwesixitha. <sup>30</sup>Anoxuae payaputan po coyene xua bara daxita neyaputaewan. Matautano payaputan xua jopa pata nantawenonaewa xua paxan pata paca cayainyabiwatsi. Daxota pajume cowuntan xua xam bara yatsicaewa Nacom wetsica neponaein, jeichichi Jesús pijimonae.

<sup>31</sup>Jesús jume barai pijimonae, jeye:

—iAnoxuae matapainya pana nejume cowuntame! jei Jesús. <sup>32</sup>Bara nama imoxoyo matacabi patopa, po mataqueitha tsana parucupaename poxonae jiwi paca yotabina. Paxam pana necuentarucupaename. Daichitha xan jopa companyo tsane tsipei Taxa neyanta bayatha. <sup>33</sup>Daxita baxuan paca tsipaebatsi painya nejuntu coyene weiweinaenexam tsane tapana necayawa jinompaexaem tsane. Poxonae cataunxuae pajinompaename po cae pin nacuathe jiwi paca atene exanaena poxonae abe paca cana exanaena. Daichitha juntea pajinompare. Tsipei xan amanayabaxubin pon jiwi juntu coyene itorobatsi po cae pin nacuathe, jei Jesús pijimonaetha.

**Meje yabara poxonae Jesús pijimonae tawuca Paxatha**

**17** <sup>1</sup>Poxonae Jesús baxua najume weta xua pijimonae tsipaeba, bapoxonae Jesús itaboco necoicha. Paxatha tsipaeba jeye: “Axa, aunxuae patopaena xua poxonae jiwi tsita itutsiname xua xan, apara bara Nexanton, pon taainya cuin. Bapoxonae jiwi tsita itutsin xua xam jinya neainya cuim. <sup>2</sup>Xam, Nexantonxaein, daxita jinya neitorobi coyenewa necatame xua taitorobinexa tsane jiwi. Daxita po jiwi necatame, po jiwi tana nejume cowuntsiwi, barapo jiwi catsin peajuntuayapuswa,

po peajüntuyarusüwa ataya tsiteca. <sup>3</sup>Axa, yatsicaya compam xam Nacom, irü xan Jesucriston compan ponxaein neitorobame po cae pin nacuathe tsique. Pomonae nejume cowünta irü xuano cajume cowüntano, barapomonae xeinaena peajüntuyarusüwa, po peajüntuyarusüwa ataya tsiteca.

<sup>4</sup>“Po cae pin nacuathe exanan xua jiwi wünae necajainchiwa. Bayatha wetan xua bayatha necui itorobame xua taexanaewa tsane. <sup>5</sup>Axa, anoxuae equeicha ainya cui neexande neitabaratha, icha matha neichim poxonae caena bayatha ainya cui neexaname neitabaratha poxonae nexantha poponan poxonae cataunxuae po cae pin nacue jopa forotsinyo.

<sup>6</sup>“Pomonae bayatha itapetame, pomonae nejume cowünta, barapomonae yabara cuiduban xua xam cayabara paebatsi. Barapomonae bara jinyamonae yawa nepuna pona exaname. Barapomonae bara xanepanaya exana xua pocotsiwa itorobame. <sup>7</sup>Pocotsiwan xua xan paeban xuano xua exanan, daxita baxuan exanan tana necatsimxae jinya pexeinya ayapusü itorobi coyenewa. Anoxuae daxita baxuan barapomonae yaputane. <sup>8</sup>Pocotsiwan necuidubame xuya barapomonae cuiduban. Daxita baxuan barapomonae yabara nejume jejei. Barapomonae yaputane xua xan bara yatsicaya xam wetsica ponan. Mataütano yaputaneno xua xam tana neitorobiwam.

<sup>9</sup>“Cawücatsi barapomonae nexa xua neyawenaewa tsane barapomonae. Apra jopa yabara cawücaetsi pomonae jopa nejume cowüntsiyo xua neyawenaewa tsane. Saya jame yabara cawücatsi pomonae tana necatsixaemxae pomonae jinyamonaexae. <sup>10</sup>Daxita pomonae xua jinyamonae apra tamonaerü. Daxita irürü pomonae xua tamonae, apra jinyamonaerü. Ichamonae wünaeya necayabara nanta xeina xua xan ainya cuin tsipei xanepanaya jinompa, pomonae tana nejume cowüntsi jiwi.

<sup>11</sup>“Xan jopa poponaein tsane po cae pin nacuathe tsipei ponaein nexainya beicha xua tapoponaenexa nexantheicha. Nama barapomonae jopa daichiyo, saya po cae pin nacuathe dubenanaebiyaena. Axa, xam ponxae bichocono nejüntü coyene xanepanaein tsaibim. Pomonae bayatha tana necatsixaemxae barapomonae bebere jinya neayapusü neitorobi coyenewatha xua barapomonae jopa pejüntü coyene cui itorobinexa tsainchi xua abe peexanaewa tsane xua caurimonae pia pentacaponaein tatsi jüntü coyene cui itoroba. Bapoxonae barapomonae be caein cana naexanaeinhibe waantobexaebe barapomonae icha ichichibe xua be caein naexainhibe. <sup>12</sup>Poxonae cataunxuae poponan po cae pin nacuathe, apra xan bebeteiban barapomonae jinya neayapusü neitorobi coyenewatha pomonae tana necatsixaemxae. Barapo tamonaexae beta bebetan yawa jopa copatsinyo xua ichün tana newepu aichurucuaewa, saya meisa caein nexubina barapomonae jiwana. Daxota

bapon bewa tupaena tsipei bichocono peajuntucoyeneyapubein. Bapon abe exana tsipei caena bayatha nejume diwesitha bapon yabara paebatsi po coyeneya xua bapon tana necana exanaewa tsane.

<sup>13</sup>“Anoxuae xan ponan nexainya beicha ichaxoteicha ecame. Ichitha daxita baxuan paeban poxonae cataunxuae po cae pin nacuathe poponanje xua barapomonae bichocono pejuntucoyene weiweinaenexa, po pejuntucoyene weiweinaewa bayatha xeinan. <sup>14</sup>Nejume diwesi catan barapo tamonae. Ichitha barapo tamonae inta casebatsi ichamonae tsipei barapo jiwi po cae pin nacuathepiwi. Barapo tamonae nama po cae pin nacuathepiwi aibi, icha ichin xua xan po cae pin nacuathepin aibin. <sup>15</sup>Apara jopa cawucaetsi xua barapo tamonae nenotsinexa po cae pin nacue weye. Saya apara cawucatsi xua barapomonae nebebetsinexa caurimonae pia pentacaponaein tatsi pecuiyainwa. <sup>16</sup>Ichaxan ichin xua po cae pin nacuathepin aibin, barichi barapo tamonae jopa barapo cae pin nacuathepiwiyo. <sup>17</sup>Nejume diwesi, apara po diwesi nexainyei diwesi jume. Poxonae barapo tamonae jume tane baxua barapomonae catame xua pejuntucoyene weiweinaewa xua peexanaewa tsane pocotsiwa ichichipame. <sup>18</sup>Ichaneichim xua neitorobame pomonaetha pomonae jopa jume cowuntsiyo, barichin pomonae tana nejume cowuntsiwi itoroban pomonaetha pomonae jopa tana nejume cowuntsiwi. <sup>19</sup>Najuntucoyene catan nexainya beya tha xua exanaetsi pocotsiwa ichichipame. Baxua exanan tsipei antobein tamonae. Exande xua barapomonae iru penajuntucoyene catsinexa nexainya beya xua pia peexanaewa tsane pocotsiwa ichichipame. Baxua peexanaenexa tsane pexeinaexae nejume diwesi, po diwesi nexainyei jume diwesi.

<sup>20</sup>“Jopa meisa cawucaetsi barapo tamonae nexa, apara yawano iru yabara cawucatsi pomonae bexa nejume cowuntsina poxonae jume taena tajume diwesi xua poxonae pepaebixae tsane barapo tamonae. <sup>21</sup>Cawucatsi xua barapomonae be caein penaexanaenexa xuano xua cae penanta xeinaeya nacana baru cayawa nanta xeinaenexa tsainchibe. Baxua exanatsibe barapomonaetha icha neichim xua neyantame xuano xua xam cayantatsiru. Poxonae barapomonae be caein nacayawa naexana ponaeinchibe, bapoxonae ichamonae yabara jume cowuntsina xua xam bara yatsicaya tana neitorobiwam. <sup>22</sup>Barapo tamonae peainya cui coyenewa catan, po peainya cui coyenewa xam necatame xua barapomonae be caein penaexanaenexa icha ichichibe xua bara caein naexanatsibe. <sup>23</sup>Xan tamonae yantan iru xam neyantame, tsipei daxitatsi be caein naexainchi daxota barapomonae yatsicaya bara be caein naexana. Bapoxonae daxita jiwi cui yaputaena xua xam bara yatsicaya tana neitorobiwam. Matautano barapo jiwi cui yaputaena xua tamonae antobem icha ichim xua neantobem.

<sup>24</sup>“Axa, necatame barapo tana nejume cowuntsiwi. Ichipan xua barapomonae pomonae tana nejume cowuntsiwi ponaena ichaxoteicha

taponaewa tsane xuano xua pia petaenexa tsane taainya cui coyenewa xua necatame. Tsipei caena bayatha neantobem poxonae cataunxuae jopa forotsiyo po cae pin nacue. <sup>25</sup>Axa, pon bichocono nejuntu coyene xanepanaem. Pomonae jopa tana nejume cowuntsiwi jopa pepa jinyamonaeyo tsipei jopa cayaitaeyo. Ichitha xam bara cayaitainchi. Pomonae tamonae, pomonae tana nejume cowuntsiwi barapomonae neyabara yaputane xua xam tana neitorobiwam. <sup>26</sup>Barapomonae pomonae tana nejume cowuntsiwi yabara yaputane exanan xua xam cayabara paebatsi. Abũ cataunxuae awiya baxua exanaein xua jinya necaantobenexa tsane icha neichim xua neantobem. Matautano barapomonae ataya yaitata poponeibin”, jei Jesús poxonae Paxa tsipaeba.

**Meje yabara poxonae Jesús waetabatsi**  
(Mt 26.47-56; Mr 14.43-50; Lc 22.47-53)

**18** <sup>1</sup>Poxonae Jesús najume weta xua poxonae Paxa tsipaeba, bapoxonae pomonae Jesús pijimonaexae tatsi Jesús barũ pona. Jesús barũ pona foto iya icha muxunene beya, po foto cataunxuae ira tsewa. Barapo foto pewun Cedrón. Barapo icha muxunene beya umena xua ponaein peubi naein, baxota Jesús pijimonae barũ patopa. <sup>2</sup>Judas, pon Jesús caenaetatsi, bapon yaputane barapo momiyo tsipei baxota matha matowa Jesús pijimonae barũ nacaetuteiba. <sup>3</sup>Judas patopa ichaxota Jesús pijimonae barũ uncua. Judas barũ pona soldadomonae irũno policiamonae, po policiamonae pomonae Nacom pin pia bo peyabara umenaewi. Daxita barapomonae, pomonae Judas barũ patopa fariseomonae itoroba irũ sacerdotemonae pia pentacaponae tatsi itorobarũ. Daxita barapomonae cusin capona. Irũ ichamonae lámpan capata irũ ichamonae banaxuton capata. <sup>4</sup>Bequein Jesús tsiwana yaputane barapomonae xua po coyene pecana exanaewa tsainchi, ichitha Jesús itataya yawa yainyaba, jeye:

—¿Jintam pawenawenam? jei Jesús.

<sup>5</sup>Daxita barapomonae Jesús jume notatsi, jeye:

—Apara Jesús Nazaret tomarapin pawenawenan tsompae, jei.

Jesús jume nota, jeye:

—Apara bara bapon uncuanje, jei Jesús.

Irũ Judas, pon Jesús caenaetatsi, baxota nauncuarũ. <sup>6</sup>Poxonae Jesús, jeye: “Apara, bara bapon uncuanje”, jei, bapoxonae barapomonae peũma iyiya caibeya yawa xuirabathopa. <sup>7</sup>Equeicha Jesús yainyaba, jeye:

—¿Jintam pawenawenam tsompae? jei.

Equeicha barapomonae, jeye:

—Apara, Jesús Nazaret tomarapin pawenawenan tsompae, jei barapomonae.

<sup>8</sup>Nexata Jesús barai, jeye:

—Bayatha paca tsipaebatsiba: ‘Apara bara bapon uncuanje’, jan. Icha pana newenawenam bara tamonaē inta painta pu copabare, jei Jesús.

<sup>9</sup>Baxua exana tsipei caena bayatha Jesús jeye Paxatha: “Axa, barapo tamonaexae beta bebetan yawa jopa copatsinyo xua ichun tana newepu aichurucuaewa”, jei Jesús. <sup>10</sup>Bapoxonae Simón Pedro namara wejonta pia wato cusi. Simón Pedro muxuyoro catsoniba pon pewun Malco, po muxuyoroto pecoxa werucuiya. Bapon Malco pon sacerdotemonae pia pepa pentacaponaein tatsi tanacuitatsi. <sup>11</sup>Jesús Pedro baraichi, jeye:

—Cusi jeinca pentacuerutha. ¿Eta pocotsiwa daxua daichim? ¿Xam ichipame xua jopa taexanaewa tsane pocotsiwa caena bayatha Taxa neitoroba xua bara bewa jiwi atene tana necana exanaewa? jei Jesús.

**Meje yabara poxonae Jesús uncua Anás peitabaratha tatsi**

*(Mt 26.57-58; Mr 14.53-54; Lc 22.54)*

<sup>12</sup>Bapoxonae soldadomonae iru soldadomonae pia pentacaponaein tatsi iruru policiamonae, po policiamonae pomonae Nacom pin pia bo peyabara umenaewi, daxita barapomonae Jesús waetabatsi yawa maxu cubatsi. <sup>13</sup>Bapoxonae Jesús capoinchi Anás pia bo tatsi beya. Bapon Anás Caifás paxuyo tatsi. Bapon Caifás barapo weitharu sacerdotemonae pia pepa pentacaponaein tatsi naexana. <sup>14</sup>Barapon Caifás, pon caena bayatha jei judi monaetha: “Metha wunae xua bara caein piamonae yaitatsina pebexubinexatsi xua daxita piamonae tatsi jopa petajutebinexatsi”, jei Caifás xua bayatha paeba.

**Meje yabara poxonae Pedro Jesús yabara paebatsi xua jeye:**

**“Jopa dapon yaitaeinyo”, yabara jeichichi Jesús**

*(Mt 26.69-70; Mr 14.66-68; Lc 22.55-57)*

<sup>15</sup>Simón Pedro iru ichun ponxaeru Jesús pijimonae tatsi jiwana Jesustha napuna ponabe poxonae policiamonae Jesús capoinchi sacerdotemonae pia pepa pentacaponaein tatsi pia botha tatsi. Barapon pon ichun bapon yaitainchi xua sacerdotemonae pia pepa pentacaponaein tatsi yaitane. Daxota bapon sacerdotemonae pia pepa pentacaponaein tatsi pia pin pia bo panatha tatsi Jesús puna jonyatsi. <sup>16</sup>Nama Pedro aisowatha uncua peboupa juma werena. Daxota bapon pon ichun pana weya pona peboupa beya xua yabuyo petsipaebinxatsi powayo yapu eeneiba peboupa. Bapon jeye: “Inta Pedro pu itorobarena xua bara jondenaena”, jei. Tsipei barapo sacerdotemonae pia pentacaponaein tatsi bapon yaitainchi daxota barapowa Pedro bara copatatsi xua bara jondenaena. <sup>17</sup>Nexata poxonae Pedro jondena, bapowa Pedro yainyabatsi, jeichichi:

—¿Bara xam, Jesús pijimonae tatsi caein jiwanamda? jeichichi Pedro. Pedro jume nota, jeye:

—Jume, apara xan dapon aibin, jei Pedro.



<sup>18</sup>Yaitama iru aque tsuncuaeru daxota pomonae sacerdotemonae pia pepa pentacaponaein tatsi tanacuitatsi iru policiamonaeno, daxita barapomonae isoto itutaeta barapo panatha. Daxita barapomonae nonopumena barapo isototha. Pedro iru baxota nanonopuncuaru.

**Meje yabara poxonae sacerdotemonae pia pepa pentacaponaein tatsi Jesús matowa yainyabatsi**  
(Mt 26.59-66; Mr 14.55-64; Lc 22.66-71)

<sup>19</sup>Iru ru bapoxonae sacerdotemonae pia pepa pentacaponaein tatsi tamropata pitaba xua Jesús matowa peyainyabiwatsi. Jesús jeichichi: “Jesús, ¿jintam baru jinyamonae? ¿Eta po diwesi cuidubame barapo jinyamonae?” jeichichi Jesús.

<sup>20</sup>Jesús jume nota, jeye:

—Caena bayatha daxita jiwi peitutha cueicueijan tsaibin. Judiomonae pia penacuetutsi bontha ataya cuidubeiban. Matautano Nacom pin pia botha ichaxota judiomonae nacaetuteiba, baraxotano ataya cuidubeiban. Bapana jopa jiwi wepu nameicha paebin xua pocotsiwa jiwi jopa tana nejume taenexa. <sup>21</sup>¿Eta pocotsiwa metha nejume yabara yainyabame? Jame maisa moya yainyabare pomonae bayatha nejume tane. Moya barapomonae catsipaebina pocotsiwa bayatha tsipaeban barapomonae petanejume yaputaexae pocotsiwa bayatha tsipaeban, jei Jesús.

<sup>22</sup>Poxonae Jesús baxua najume weta, bapoxonae caein policiamonae jiwanapin pomonae baxota umena, po policiamonae Nacom pin pia bo peyabara umenaewi bapon Jesús jumata cuaintaxotsi. Yawa bapon Jesús jeichichi:

—¿Eta xua dapo jume paebame poxonae baxua jume notame sacerdotemonae pia pepa pentacaponaein tatsi? jei bapon.

<sup>23</sup>Jesús jume nota, jeye:

—Icha bara pocotsiwa abe paeban, moya netsipaebare xua abe. Ichitha icha xua wuna paeban, ¿eta pocotsiwa metha nexata nejumata cuaintaxubame? jei Jesús.

<sup>24</sup>Bapoxonae Anás Jesús yamaxu cubiya itorobatsi Caifás beya. Bapon Caifás sacerdotemonae pia pepa pentacaponaein tatsi naexana barapo weitharu.

**Meje yabara poxonae equeicha Pedro Jesús yabara paebatsi:**  
“Jopa dapon yaitaeinyo”, yabara jeichichi Jesús  
(Mt 26.71-75; Mr 14.69-72; Lc 22.58-62)

<sup>25</sup>Poxonae baxuaru, iruru cataunxuae Pedro nanonopuncua. Barapoxonae barapomonae Pedro yainyabatsi, jeichichi:

—¿Xam apara Jesús pijimonae tatsi caein jiwanamda? jeichichi Pedro. Ichitha Pedro jume notsiya jeye:

—Jume, apara xan bapon aibin, jei Pedro. <sup>26</sup>Bapoxonae equeicha ichun Pedro yainyabatsi pon sacerdotemonae pia pepa pentacaponaein tatsi tanacuitatsi. Pon Pedro yainyabatsi, bapon caein jiwana pomonae Pedro jiwana muxuyoro catsoniba. Bapon Pedro yainyabiya jeichichi:

—Xam bayatha caena catainchi poxonae Jesús paca baru pona momiyo beya. ¿Bara methara? jeichichi Pedro.

<sup>27</sup>Pedro equeicha jume notsiya jeye:

—Jume, jopa dapon yaitaeinyo, jei.

Bapoxonaeru caena nainya wacara pebto fiba.

**Meje yabara poxonae Jesús uncua Pilato peitabaratha tatsi**

*(Mt 27.1-2, 11-14; Mr 15.1-5; Lc 23.1-5)*

<sup>28</sup>Caemumbotha Jesús capoinchi Caifás pia bo weya pon jiwi peyanacua ewatsinchi pin pia bo tatsi beya, pon pewun Pilato. Ichitha judiomonae jopa jojoniyayo barapo botha pon jiwi peyanacua ewatsinchi pin pia bothaxae tatsi. Judiomonae pia juntu coyene cui xeina xua jei: “Judiomonae jopa bewa nanacaetutsi pomonae jopa be judiomonae naexanaeyo pia bothaxae tatsi po mataqueitha poxonae imoxoyo Pascua wun matakabin xua poxonae jiwi penabanaewanexa pexaewa”, jei. Tsipei icha baxua exanaetsipa pia coutha najuntu coyene taxobichipa yawa barapomonae jopa itacupaetsipaetsi xua pexaewa xaena, po pexaewa poxonae xane Pascua wun matakabintha. <sup>29</sup>Daxota Pilato aisowa bejoniya pia bo weya xua petsipaebinxatsi pomonae pesatotha umena. Pilato jeye barapomonaetha:

—¿Eta pocotsiwa painya yabara netsipaebichi bapon xua abe peexanaewa? jei.

<sup>30</sup>Barapomonae Pilato jume notatsi, jeye:

—Icha bapon jopa abe exanaetsipae, metha bapon jopa caponaetsipaetsi nexantha, jei barapomonaetha.

<sup>31</sup>Nexata Pilato barai jiwi, jeye:

—Paxam papire bapon, barompaya painya neitorobi coyenewatha payabara paebare xua penatsicuentsiwa xua abe peexanaexae, jei Pilato.

Barapo judiomonae jume nota, jeye:

—Ichitha paxan judiomonae pan, romanomonae pia peitorobi coyenewa jopa pana copatsiyo xua ichun pacui itoroban xua jiton pebexubiwatsi xua poxonae abe peexanaexae, jei judiomonae.

<sup>32</sup>Baxua exana tsipei bayatha Jesús tsiwanaya nayabara paeba po coyeneya jiwi poxonae Jesús pebexubiwa tsainchi. <sup>33</sup>Bapoxonae Pilato equeicha pia pin pia bo bejoniya yawa Jesús wabatsi, jeichichi:

—¿Xam judiomonae itorobiya pia pepa Neewatsin? jei Pilato.

<sup>34</sup>Jesús jume nota, jeye:

—¿Apara jincoya necayabara cananta xeinaeya yainyabame? Apara ichun yabara necatsipaebixae baxua, ¿daxota barapo jumetha neyainyabame? jei Jesús.

<sup>35</sup>Pilato jume nota, jeye:

—Jopa taeinyo tsipei apara xan judiomonaepin aibin. Apará jinya nacuamonaepiwi iru sacerdotemonae pia pentacaponaeawi tatsi, apara barapomonae cacaenaeta taxantha. ¿Eta pocotsiwa metha exaname? jei Pilato.

<sup>36</sup>Nexata Jesús jume nota, jeye:

—Taitorobi coyenewatha jopa itorobinyo jiwi po cae pin nacuathe. Icha baxua exanaetsipan, bara nexata tamonae neyawenaetsipa xua judiomonae jopa tana newaetabinexa. Ichitha taitorobi coyenewatha jopa itorobinyo jiwi po cae pin nacuathe, jei Jesús.

<sup>37</sup>Nexata Pilato Jesús jeichichi:

—¿Apara xam pon jiwi itorobiya pia pepa Neewatsin? jeichichi Jesús. Jesús jume nota, jeye:

—Aa, apara bara xan bapon pon jiwi itorobiya pia pepa Taewatsin xuaunxuae bara paebame. Daxota naexanan po cae pin nacuathe yawa patopan tapaebinexa xua pocotsiwa pexainyeiwa yatsicaewa. Daxita pomonae ichichipa xua pejume cowantsiwa xua barapo pexainyei jume, barapomonae bara nejume tane, jei Jesús.

<sup>38</sup>Pilato Jesús baraichi, jeye:

—¿Eta pocotsiwa metha pocotsiwa pexainyeiwa? jei Pilato.

**Meje yabara poxonae Pilato jume baru jejei xua  
Jesús bara pebexubiwa tsainchi ichamonae  
(Mt 27.15-31; Mr 15.6-20; Lc 23.13-25)**

Poxonae Pilato baxua yainyaba, bapoxonae Pilato equeicha aisowa bejoniya xua equeicha judiomonae petsipaebinxatsi. Pilato barai judiomonae, jeye:

—Xan jopa jume itaraerowinyo bapon xua po jumetha nayaita anae exanaena xua pebexubinxatsi. <sup>39</sup>Ichitha paxam painya cui paxeiname xua ba caein tapacata isanaxubiwatsi pomonae jiwi pecubi botha nobatsi poxonae xua po mataqueitha Pascua wun matacabintha. ¿Bara anoxuae pacata saya pu copatinchi pon judiomonae itorobiya pia pepa peewatsinchi? jei Pilato.

<sup>40</sup>Nexata barapo judiomonae jume daunweya wawai, jeye:

—iJume, jopa dapon isanaxubinde! iMaisa jame Barrabás isanaxore! jei barapo judiomonae.

Barapon Barrabás, pon bichocono jiwi pecaibi.

**19** <sup>1</sup>Nexata Pilato najume caitoroba xua Jesús bara pecuainchinexatsi xua pocotsiwatha eewa xua bichocono amupiya xua xota ba jiwi cuainteibatsi poxonae abe exaneiba. Soldadomonae baxua exana. <sup>2</sup>Barapo soldadomonae Jesús mata xatatatsi pee tepa. Matautano bapoxonae Jesús pia paparuwa juma xuenatsi.

Icha paparuwa juma xatatatsi po paparuwa tsobia. <sup>3</sup>Bapoxonae barapo soldadomonae Jesús imoxoyo cacuita umenarucupatsi. Yawa Jesús cui caponaeya jeichichi:

—iJaina, maisa wunaem pon judiomonae itorobiya pia pepa Neewatsin! jei barapo soldadomonae xua Jesús cui capoinchi.

Bapoxonae Jesús itabara cuaintatsi.

<sup>4</sup>Equeicha Pilato pesato bejoniya judiomonae beya. Pilato barai judiomonae, jeye:

—Matha pataema. Bapon pacata carenaeinchi, painya neyaputaenexa xua xan jopa jume taeinyo xua po jumetha penayaita anae exanaewa xua pebexubinexatsi barapo pebin, jei Pilato.

<sup>5</sup>Bapoxonae Jesús pee tepa pesato beyawa joniya. Yawa paparuwa yawa joniya po paparuwa tsobia. Nexata Pilato barai jiwi, jeye:

—iPataema xote uncue baponje! jei Pilato.

<sup>6</sup>Bapoxonae sacerdotemonae pia pentacaponawewi tatsi iru policiamonae, poxonae daxita barapomonae Jesús taerucupatsi, jume daunweya wawaya jeye:

—iNaetotha bara tupaerucua bewa exanaem! iNaetotha bara tupaerucua bewa exanaem! jei barapomonae.

Pilato barai jiwi, jeye:

—Moya paxam jame bara papire, moya painya coya naetotha tupaerucua paexande. Yaitama xan apara jopa jume taeinyo po jumetha xua bapon penayaita anae exanaewa xua pebexubinexatsi.

<sup>7</sup>Ichitha judiomonae Pilato jume notatsi, jeye:

—Paxan pata taitorobi coyenewa paxeinan. Bapon pia coutha Nacom Pexanto tatsi natsicotane daxota bapon bewa tupaena tsipei pata taitorobi coyenewa baxua peyabara paebixae, jei judiomonae.

<sup>8</sup>Poxonae Pilato baxua jume tane, Pilato nama bichocono equeicha junuwa. <sup>9</sup>Equeicha Pilato Jesús caibe maxu coniyatsi bo beya. Baxota Pilato Jesús yainyabatsi. Jesús jeichichi:

—¿Eta werenapim xam? jei Pilato.

Ichitha Jesús jopa jume notsiyo. <sup>10</sup>Nexata Pilato Jesús baraichi, jeichichi:

—¿Eta pocotsiwa jopa nejume notsim? ¿Apara xam jopa neyaputaem xua xeinan taitorobi coyenewa xua tana neitacupaewa xua jiwi taitorobiwa xua tupaerucua necaexanadutsiwa naetotha? Matautano xeinan taitorobi coyenewa po coyene xua jiwi taitorobiwa xua saya necapu sotabiwa, jei Pilato.

<sup>11</sup>Jesús jume nota, jeye:

—Icha Nacom jopa cacatsipae barapo peitorobi coyenewa metha ichamonae jopa itorobimchipae xua ichamonae abe tana necana exanaewa. Daxota pon necanaeta xamtha bapon jame bichocono abe exana beyacaincha xam xua abe necana exaname, jei Jesús.

<sup>12</sup>Poxonae baxua Pilato jume taeba, bequein bichocono nanta xeina xua Jesús bara saya pepu sotabiwa tsainchi, ichitha junuwa poxoru judiomonae jume daunweya wawai. Barapomonae jeye:

—iIcha xam bara saya, pu sotabame, apara romanomonae itorobiya pia pepa peewatsinchi bapon jopa pia jiton tsipaem! iPon pia coutha naexana xua be natsicotane pon jiwi itorobiya pia pepa peewatsinchi, bapon apara romanomonae itorobiya pia pepa peewatsinchi bapon pia peaitafaetabinchi jitontsi! jei judiomonae.

<sup>13</sup>Poxonae Pilato baxua jume taeba, bapoxonae ecoundeca ichaxota pia coutha cayabara cananta xeinecaeya cueicueije tsequeibi jiwi. Bapon baxota eca yawa najume caitorobeca xua bara berena Jesús pecarendenaenexatsi ichaxota Pilato eca, po pia peecaethopae tutu ibo pana tatsi hebreo jumetha, “Gabata”, jei. Baraxua jei: “Pefaratsiwa ibowa pana”, jei. <sup>14</sup>Bapoxonaerũ barapo matacabi tsuxubirũ, po matacabi copiya tsiwanaya ducua Pascua wũn matacabi. Barapo mataqueitha judiomonae pexaewa xaxaintajeba xua Pascua wũn matacabi nexa xua baya tsane. Poxonae mateinyaxae tsuxubi, bapoxonae Pilato barai judiomonaetha, jeye:

—iIncane pataema pon itorobiya pepa painya Nepacacaewatsin! jei.

<sup>15</sup>Ichitha barapo judiomonae jume daunweya wawaya jeye:

—iMaisa bara tũpaena! iBara naetotha tũparucua exande! jei.

Pilato jume barai, jeye:

—¿Bara itorobin jampa xua pebexubiwatsi pon itorobiya pepa painya Nepacacaewatsin? jei Pilato.

Ichitha sacerdotemonae pia pentacaponae wi tatsi Pilato jume notatsi, jeye:

—Apara ichũn jopa paxeinaeinyo pon jiwi itorobiya pia pepa Peewatsinchi. Jame saya meisa painta bara compa pon itorobiya pepa pata Neewatsin, bapon jame apara pon romanomonae itorobiya pia pepa Peewatsinchi, jei judiomonae.

<sup>16</sup>Barapo jumetha Pilato Jesús canacobena catatsi barapo judiomonaetha. Baxua Pilato exana xua Jesús bara tũpa peexanaenexatsi naetotha. Bapoxonae barapo judiomonae Jesús pitatsi.

### **Meje yabara poxonae Jesús tũparucua exanatsi naetotha**

*(Mt 27.32-44; Mr 15.21-32; Lc 23.26-43)*

<sup>17</sup>Jesús bara pona, yawa pia naeto utucurapona, xua barapo naetotha pecobe matatabarutsinexatsi ichaxota po demxuwatha be jiton matasipa piwa. Barapo demxuwa caunuteiba xua jei tsaibi: “La Calavera”, jei. (Seicaya hebreo jumetha jei tsaibi: “Gólgota”, jei.) <sup>18</sup>Barapo demxu matasoitha Jesús cobe matatabarutatsi naetotha. Iru ainya pebinbe cobe matatabarutatsibe. Jesús tutiyotha yanaeto uncuwa, ichũn Jesús pecoxa weya tayanaeto uncuatsi

irũ ichũn Jesús petsocona weya tayanaeto uncuatsi. <sup>19</sup>Pilato itoroba xua Jesús pentutu wetsica petarutsinexatsi napaeuyo. Barapo napaeuyotha jeye xua tinaduta: “Jesús, Nazaret tomarapin, pon judiomonae itorobiya pia pepa Peewatsinchi”, jei barapo petinae napaeuyotha. <sup>20</sup>Pinmonae judiomonae yoroba barapo petinadutsiwa tsipei ichaxota Jesús cobe matatabarutatsi imoxoyo itama tayeca tomara, po tomara pewũn Jerusalén. Barapo petinae napaeuyotha, hebreo jumetha tina, griego jumetha tinano, irũ latín jumetha tinano. <sup>21</sup>Daxota sacerdotemonae pia pentacaponaeawi tatsi, pomonae judiomonaexae, Pilato baraichi, jeye:

—Jopa jande ‘Pon judiomonae itorobiya pia pepa Peewatsinchi tatsi’, jopa jande. Jame maisa jande: ‘Ponje najei: Xan pon judiomonae itorobiya pia pepa Taewatsin, najei’, jande, jei sacerdotemonae pia pentacaponaeawi tatsi.

<sup>22</sup>Ichitha Pilato jume nota, jeye:

—Xuaunxuae tinadutan bara ducuaena, jei Pilato.

<sup>23</sup>Soldadomonae poxonae Jesús canacobena wetatsi xua cobe matabobatsi, bapoxonae nota Jesús pia paparuwan tatsi. Tsipei cuatro po soldadopinbe daxota nata tsaba xua cuatro poyobe nexa xua soldadomonae. Mataũta dorouto Jesús juma wejontatsi, po dorouto ompareca, xua jopa epa ххххсаеуо. <sup>24</sup>Barapo cuatro poyobe xua soldadomonae caemonae natsipaeba, najei:

—Jopa tsana nata epa tsitsicae tsainchi. Jame metha xanepana xua ibotixi bebeya tsainchi. Bapoxonae yaputaeinchi xua pon ibotiyi beta xoya, moya copiya pichina, jei.

Baxua barapomonae exana peyabara cui wũnae tsiwanaya jeixae pon Nacom peitorobi jume pepaebin. Bapon jeye Cristo yabara, Nacom Pejume Diwesitha: “Tapaparuwan nata tsabina yawa ibotixi bebeya tsane penacueranta notsinexa tsane tapaparuwan”, jei pon Nacom peitorobi jume pepaebin. Bara baxua exana barapo soldadomonae.

<sup>25</sup>Jesús pena tatsi imoxoyo uncua ichaxota Jesús ducua. Barichi Jesús pena tatsi irũ pamcho tatsi baxota umena. Barichi icha María, powa Cleofas piowa tatsi baxota uncua. Barichi icha María, powa María Magdalena, powa Magdala tomarapiwayo, baxota uncua. <sup>26</sup>Poxonae Jesús taenota pena yawa poxonae taenota pon bichocono Jesús antobe, pon pijimonae jiwanapin bapoxonae Jesús barai pena, jeye:

—Ena, taema bapon nexanto cata uncuareque, jei Jesús.

<sup>27</sup>Bapoxonae Jesús barai bapon, jeye:

—Incane taema barapowa, powayo enaxae, jei Jesús.

Bapoxonae barapowa barapon pena tsicotaeya waba pia botha.

**Meje yabara poxonae Jesús tupa**  
(Mt 27.45-56; Mr 15.33-41; Lc 23.44-49)

<sup>28</sup>Bapoxonae pirapaeyo Jesús yaputane xua bayatha yabara jume cui wetatsi xua bayatha Nacom Pejume Diwesitha paeba. Mataũtano xua

Jesús penajume cui yabara wetsinexatsi xua bayatha Nacom Pejume Diwesitha yabara tsiwunaē paebatsi, bapoxonae Jesús jeye:

—Meratsipan, jei.

<sup>29</sup>Baxota juruwato eca xua yawa eca vino mera, po mera atsu. Nexata barapo soldadomonaē esponjatha mene yutsiya capita. Bapoxonae Jesús naewatha tadutatsi yawa tayoichatsi pecoiboto deca. <sup>30</sup>Jesús tsutsubiuya apa barapo vino mera. Bapoxonae jeye:

—Bara daxita neyabara jume cui weta, jei Jesús.

Bapoxonae Jesús nawisi jetataba. Tūpanaicha.

**Meje yabara poxonae soldadomonaepin Jesús epa  
catsitsinaxubiya cawūichatsi dejonatha**

<sup>31</sup>Cataunxuae barapo matabi po matabitha poxonae judiomonaē pewūnaeya nacui wūnaeta pia pentaquei seicaē matabi tatsi nexa. Barapomonaē jopa ichipaeyo xua came naetotha dubenaena po pebiwi naetotha werapa poxonae jopaena barapo pentaquei seicaē matabi, po matabi peainya cui matabixae. Barapo pentaquei seicaē matabi, po matabi tamropata pitaba xua Pascua wūn matabin. Judiomonaē jopa ichipaeyo xua pejontsiwa pepon naetotha barapo pentaquei seicaē matabitha. Daxota barapo judiomonaē Pilato jume itorobatsi, jeye: “Soldadomonaē itorobare xua petopa janacaenexa tsainchi pomonaē naetotha dubena xua nainya barapo pebiwi tūpa peexanaenexatsi. Mataūta itorobare xua barapo pebiwi naeton wetsica penotsinexatsi icha xaniwaicha daxita barapo pebiwi bayatha werapa”, jei barapo judiomonaē.

<sup>32</sup>Nexata soldadomonaē bara beya pona. Yawa barapo soldadomonaē copiya topa janaxuba ichūn pon Jesús icha muxunene wetarucuiyatsi. Bapoxonae equeicha ichūn topa janaxotsi pon Jesús icha muxunene wetarucuiyatsi. <sup>33</sup>Poxonae soldadomonaē imoxoyo umenarūcūpa ichaxota Jesús ducua, bapoxonae Jesús tainchi xua bayatha Jesús tūpa. Daxota barapo soldadomonaē Jesús jopa janaxuichi.

<sup>34</sup>Ichitha caein barapo soldadomonaē jiwana, bapon Jesús epa cawūicha catsitsinaxubiyatsi dejonatha. Bapoxonae caena nainya jana othoparena yawano mera othoparenano. <sup>35</sup>Xan, Juan, baxuan daxita tan pocotsiwa soldadomonaē Jesús cana exanatsi. Daxota pocotsiwa xua baxua paeban bara xainyan, xua daxota painya tana nejume cowūntsinexam.

<sup>36</sup>Barapomonaē baxua exana tsipei bayatha Nacom Pejume Diwesitha Cristo yabara tsiwanaya jeichichi: “Jopa piwa janaxubi tsainchi bapon xua mataūta cae piwano”, jei Nacom Pejume Diwesitha. <sup>37</sup>Mataūtano icha jume diwesitha xua Nacom Pejume Diwesi, jeye: “Necoichaeinchi pon xua cawūichatsi”, jei Nacom Pejume Diwesitha.

**Meje yabara poxonae Jesús petupaein ibo muthutha yaxatatabotatsi**  
(Mt 27.57-61; Mr 15.42-47; Lc 23.50-56)

<sup>38</sup>Bapoxonaeru pebin, pon pewun José, pon Arimatea tomarapin, bapon Jesús iru jume cowuntatsi. Ichitha José baxua jopa nayopichiyo ichamonaetha xua Jesús pejume cowuntsiwatsi, tsipei judiomonaе jume cunuwatsi. Bapon José copiya Pilato muxu tsipaebiya jeichichi, jeye:  
—Nejume baru jejande tha jontichi Jesús petupaein naeto wetsica, jei José.  
—Bara moya taema, jei Pilato.

Daxota José bara beya pona. Bapoxonaе José jonta naetha Jesús petupaein. <sup>39</sup>Iruru ichun napona Jesús pia muthutha. Bapon pewun Nicodemo, pon matha Jesús siwa poinchi merawi. Daxota bapon Nicodemo patopa xua José peyawenaenexatsi. Bapon Nicodemo capatopa treinta po kilobe xua pocotsiwa pebeno, po beno xua tuxuei. Barapo benotha muxunaxuba po petuxuei nain pewun mirra, xuano xua icha petuxuei nainwano po petuxuei nainwa pewun áloe. <sup>40</sup>Bapoxonaе José iru Nicodemo pitabe Jesús petupaein. Yawa paparuwatha petuxuei beno muxuna capanaboinca mata quiyontabicabe. Baxua exanabe, tsipei judiomonaе pia cui coyene xeina xua poxonae pon petupaein canacui wunae wetatsi poxonae namuthuqueiba. <sup>41</sup>Imoxoyo ichaxota Jesús po demxuwatha tupa, baxota peubi naein umena. Barapo peubi naein uniyotha ibo itapatororotha muthu boca pena muthu, po muthutha cataunxuae jopa muthutha xubichi petupaein ichun. <sup>42</sup>Barapo pena muthutha Jesús boyatsi, tsipei barapo pena muthu imoxoyo boca ichaxota Jesús tupa. Matauta tsipei quirei tsanaicha xua poxonae patopa pentaquei seicaе matababi, po mataqueitha judiomonaе jopa nacuichiyo.

**Meje yabara poxonae Jesús equeicha asu juina**  
**exanatsi petupae cuiru coyene weya**  
(Mt 28.1-10; Mr 16.1-8; Lc 24.1-12)

**20** <sup>1</sup>Bapoxonaeru domingo matababi jopa, po matababi xua copiya ducua cae semanatha. Bapoxonaе caemumbotha poxonae cataunxuae quiriquirica, bapoxonaе María Magdalena, powa Magdala tomarapiwayo, muthutha patopa ichaxota Jesús boca. Barapowa tane xua muthu yapusauncia xua bequein ichamonaе yapu xatatabanota pin ibo panawatha. <sup>2</sup>Bapoxonaе barapowa nainya pata taxainya becuinaerena ichaxota Simón Pedro uncua iru xan, Juan, baxota uncuan ponxaein Jesús bichocono neantobe. Yawa pana nejey:

—Cou Jesús petupaein pitatsi, pon Wanacanamataxeinaein. Jopa payaputaeyno ichaxota equeicha botatsi, pana nejey.

<sup>3</sup>Bapoxonaе Simón Pedro, iru xan Juan, muthu bepaiyanbe. <sup>4</sup>Bara beya pana nacuara cuinayanbe. Ichitha xan, Juan, bichocono bichoinan



beyacaincha Pedro. Daxota muthutha patopan copiya. <sup>5</sup>Yawa muthu beya nabuxu tsutiya necobiyen. Paparuwa tan xua iratha boca, po paparuwatha Jesús petupaein mata quiyontabatsi, ichitha jopa joniyaeyino. <sup>6</sup>Bapoxonae Simón Pedro tacoya werena cotacaya patopa. Bapoxonae muthu joniya. Barichi barapon barapo paparuwa tane xua iratha boca. <sup>7</sup>Matautano taneno po paparuwatha Jesús matasipa quiyontababotatsi. Barapo paparuwa nanta quiyontabiya tsanaya boca. <sup>8</sup>Bapoxonae xan, ponxaein copiya patopan, iru joniyan muthu iya. Poxonae daxita baxuan tan, bapoxonae nainya jume cowuntan xua Jesús bayatha asu. <sup>9</sup>Bayatha jopa payaputaeyino Nacom Pejume Diwesi, po diwesitha xua xota bapon yabara paebatsi po coyene xua bapon bewa asu tsane petupae coyene cuiru weya. <sup>10</sup>Nexata xan, Juan, iru Simón Pedro caibe panawiyambe bo beya.

**Meje yabara poxonae Jesús María tsita naitutatsi,  
powayo Magdala tomarapiwayo  
(Mr 16.9-11)**

<sup>11</sup>María Magdalena, Magdala tomarapiwayo, powa pana tsiwun caya, bapowa equeicha caiberena muthutha patopa. Barapowa muthu coiboto juma weya wecoyei tsuncuae. Poxonae wecoyei tsuncuae nantanuweya nabuxu japasota necobiya muthu iya. <sup>12</sup>Bapoxonae bapowa tane ponbe matatsunpinbe xua ecabe ichaxota bayatha Jesús botatsi petupaein. Barapo matatsunpinbe po paparuwa apiya nama xatatabe pemainya paparuwa. Icha matatsunpin eca Jesús pentasipa coyo deca tatsi. Icha matatsunpin eca Jesús pia pesito coyo deca tatsi. <sup>13</sup>Barapo matatsunpinbe María yainyabatsi, jeichichi:

—María, ¿eta xua metha wecoyam tsauya? jei.

María jume nota, jeye:

—Yaitama cou Tanecanamataxeinaein petupaein pitatsi. Jopa taeinyo xua equeicha xota botatsi petupaein, jei María.

<sup>14</sup>Poxonae bapowa najume wetsiya paebaxoya, xuano xua poxonae napatomeicha necotaxoya, bapoxonae pebin taenotatsi ichitha bapowa jopa yaputaeyo xua apara bapon Jesús. Ichitha bapowa Jesús jopa yaitaetsi. <sup>15</sup>Nexata Jesús María yainyabatsi, jeichichi:

—Ja, ¿eta pocotsiwa came wecoyam tsauyam? ¿Jintam wenawenam? jei.

Barapowa nanta xeina xua mexeya itara pon peubi naein yapu eenawei. Daxota bapowa, jeye:

—Icha xam bayatha pitame petupaein pon Tanecanamataxeinaein, incane netsipaebare xua equeicha exota botame. Tha bapoxonae petupaein equeicha pitichi, jei María.

<sup>16</sup>Nexata Jesús barai, jeye:

—María, jei.

María equeicha napatomeichaxuba. Yawa hebreo jumetha jeye:

—iRabuni! jei (po jumetha xua jei: “Pon jiwi Necuidubin”, jei).

<sup>17</sup>Jesús jume nota, jeye:

—Jopa nejayatabinde tsipei cataunxuae jopa ponaeinyo ichaxota Taxa equiya. Jamaisa ponde, paebareno tajimonaetha xua xan paeban xua jan: ‘Taxa beicha ponaein, po Taxa painya Axa iru’, jan. ‘Barapon Nacom, Tanacom iru paxam painya Nacom’, jan xua, jei Jesús.

<sup>18</sup>Barapoxonae María Magdalena, powa Magdala tomarapiwayo, tsiwun caya Jesús pijimonaе tatsi beya. Bapowa tsipaeba xua bayatha tane pon Pecanamataxeinaein jiwi. Yawano tsipaebano daxita pocotsiwa Jesús paeba bapowatha.

**Meje yabara poxonae Jesús pijimonaе tsita naituta**

*(Mt 28.16-20; Mr 16.14-18; Lc 24.36-49)*

<sup>19</sup>Barapo mataqueitha poxonae cataunxuae awiya domingo, bapoxonae merawi Jesús pijimonaе tatsi nacaetuta. Tsipei judiomonaе cui cunuwatsi daxota bo bichocono boupa daunwei exana. Nexata Jesús barapo tututha patopa. Yawa pijimonaе peitabarayo deca tauncua. Pijimonaе jacobiya jeye:

—Maisa junteма pajinompare, jei Jesús.

<sup>20</sup>Poxonae Jesús baxua najume weta bapoxonae tsita nacobe wan ituta pijimonaе yawa naepa wan ituta. Poxonae Jesús pijimonaе taerucupatsi bichocono juntu coyene weiweina petaxaetsi Jesús pon barapomonaе Pecanamataxeinaeаetsi. <sup>21</sup>Pirapaeyo equeicha Jesús pijimonaе barai, jeye:

—Maisa junteма pajinompare. Icha Taxa neichi xua neitoroba bara paca ichichi paca itorobatsi, jei Jesús.

<sup>22</sup>Nexata bapoxonae Jesús pijimonaе matatsun ofutaba, jeye:

—Nacom pia Pejumope tunaxu tatsi bara paca yantsina, jei. <sup>23</sup>Pomonaе xua pacui cayabara juntemainame abe pia peexanaе cuiru coyenein tatsi, bara barapomonaе Nacom iru cayabara cui juntemainaena abe pia peexanaе cuiru coyenein tatsi. Pomonaе jopa pacayabara cui juntemainaem abe pia peexanaе cuiru coyenein tatsi, bara barapomonaе Nacom iru jopa cayabara cui juntemainaeyo abe pia peexanaе cuiru coyenein tatsi, jei Jesús.

**Meje yabara poxonae Tomás tane xua Jesús equeicha asu**

<sup>24</sup>Tomás, bapon Jesús pijimonaе tatsi jiwana. Bapon icha wun Gemelo, po wun xua jei: “Nama naexanabe pexuyobe”, jei. Barapon Tomás jopa naeаeyo poxonae Jesús pijimonaе tsita naituta.

<sup>25</sup>Pirapae poxonae Jesús napitaba ichamonaе pomonaе Jesús pijimonaе tatsi Tomás tsipaebatsi, jeichichi:

—Paxan Jesús, pon Wanacanamataxeinaein, patan, jeichichi Tomás. Ichitha Tomás jume nota, jeye:

—Jopa jume cowuntsinyo baxua. Jopa bejume cowuntsinyo icha jopa cobe wan taeinyo xua penain wan, xuano xua icha jopa jayabinyo tacobetha. Matautano jopa bejume cowuntsinyo icha jopa yene wan jayabinyo, jei Tomás.

<sup>26</sup>Poxonae ocho po matabibibe yapucaewa xua icha domingotha, bapoxonae equeicha bomxuxtha nacaetuta Jesús pijimonae tatsi. Bapoxonaeru Tomás jame naeca. Bequein bomxux boupa bichocono daunwei exana ichitha Jesús jonarena. Pijimonae peitabarayo deca taunca. Yawa jacobiya jeye:

—Maisa juntea pajinompare, jei Jesús.

<sup>27</sup>Bapoxonae Jesús jeye Tomás beya:

—Moya necobe wan jayabare xua penain wan. Moya taema xua nantiyabe tacobe wanbe. Yawano neyene wan jayabare. Jopa ainya muxu xeinaeinde. Moya maisa nejume cowunde, jei Jesús.

<sup>28</sup>Nexata Tomás jume nota, jeye:

—iJaina, deta Tanecanamataxeinaem! iYawa Nacom, Tanacom! jei Tomás.

<sup>29</sup>Jesús jume nota, jeye:

—Tomás anoxuae nejume cowuntame tanetaemxaem. Ichitha pomonae bequein jopa netaeyo xua daichitha nejume cowanta, barapomonae bichocono jantux coyene weiweina, jei Jesús.

### **Meje yabara xua eta pocotsiwa metha yabara tina barapo diboro**

<sup>30</sup>Jesús ainya coyenein matowa pijimonae peituxtha exaneiba pexeinya petsita ituxtsi coyenewan. Daxita barapo coyenein awiya yabara seica xua jopa yabara tinaeinyo barapo diborothe. <sup>31</sup>Daxita xua xuan pocotsiwa yabara tina po diborothe apara xua baxuan painya yabara jume cowuntsinexam tsane xua Jesús apara bara Mesías. Matautano yabara tina xua painya yabara jume cowuntsinexa xua Jesús apara Nacom Pexanto tatsi. Matautano yabara tina xua painya nexeiaenexa tsane peajuntuyapusuxwa, po peajuntuyapusuxwa xua ataya tsiteca xua poxonae pajume cowuntsiname Jesús.

### **Meje yabara poxonae Jesús tsita naituxta siete poyobe pomonae pijimonaexae tatsi jiwana**

**21** <sup>1</sup>Bapoxonae pirapae equeicha Jesús pijimonae tsita naituxta Tiberias pucua itapatha. Poxonae pijimonae tsita naituxta poxonae apara iche: <sup>2</sup>Jesús pijimonae tatsi nacaetuta. Barapo matabuxuyobe meje: Simón Pedro, irux Tomás pon icha wuxn Gemelo, irux Natanael Caná tomarapin, po tomara eca Galilea nacuatha, irux xan, Juan, irux taeweicho xua Zebedeo

pexantobe tatsi panbe, iru ichunberu. Daxita barapo matabuxuyobe pan panacaetutan Tiberias pucua itapatha. <sup>3</sup>Simón Pedro pana jei:

—Tha duwei yamonaetsi, jei.

Paxan pajanje:

—Paxan iru paca puna ponaeinchi, pajan.

Bapoxonae jeratha daxita panonobabiyán. Ichitha barapo merawitha jopa duwei pataeinyo, bequein payamonan. <sup>4</sup>Poxonae baya pentha tsina, Jesús pana tsita naituta pitapathiya, tuwutha payana dubendenan. Ichitha paxan jopa payaitaeinyo xua bapon apara Jesús. <sup>5</sup>Nexata Jesús pana nebarai:

—Incane, ¿jopa pataem duwei? jei Jesús.

—Jume, duwei aibi, pajan.

<sup>6</sup>Nexata Jesús pana barai, jeye:

—Jera coxa beya bara bepaxoyama peyacamonaewa. Bapoxonae pacapirenaename duwei, jei Jesús.

Baxua paexanan. Pirapae jopa pana itacupaeyo xua patajutaxorenaewa peyacamonaewa, poxoru pin duwei tunto pacapirenan. <sup>7</sup>Nexata xan, Juan, ponxaein bichocono Jesús neantobe, Simón Pedro baran, janje:

—Apara bapon Jesús, pon Wanacanamataxeinaein, jan.

Poxonae Simón Pedro nejume taeba, bapoxonae paparuwa xua nama xuenabota nainya yacuinaya nama xatataba. Bapoxonae mene weitata jopiya. <sup>8</sup>Ichitha paxan pomonae jopa paraichinyo jeratha pajebounan. Barapo jera be conotha tajũ tuwutha berucuarena saya cien metrobe xeina. Bewayo pajeboundenan tsipei peyacamonaewa mentha yawa ducuapona pin duwei tunto. <sup>9</sup>Poxonae jera wepanonobabiyán, bapoxonae isoto patan xua barapo isototha duwein yutaboya yawano xua pan boquiya. <sup>10</sup>Jesús pana barai, jeye:

—Painta xawena duwei xuaunxuae pacaebouname, pana jei.

<sup>11</sup>Simón Pedro jeratha nontabiya. Yawa taetabo itapa bejutabotsina peyamaewa xua bichocono wunca duwei. Ciento cincuenta y tres po duwei matabuxumonaebe. Bequein duwei bichocono wunca daichitha jopa ucupanaiyo peyacamonaewa. <sup>12</sup>Nexata Jesús pana barai, jeye:

—Antha matha paxaema, pana jei.

Paxan jiwana dapon aibi pon peyainyabinexa, pon pejeinexa: “¿Jintam xamda?” pon jei, tsipei daxita paxan payaitan xua bapon apara pon Patatanecanamataxeinaein. <sup>13</sup>Bapoxonae Jesús isoto bepoinya pepichinexa pan. Bapoxonae pana necatsiba yawa duwei pana necatsiba.

<sup>14</sup>Baxua exana poxonae nama acoibi po cuiyobe xua Jesús pana netsita naituta xua poxonae equeicha asũ popona petũpae cuiru coyene weya.

### Meje yabara poxonae Jesús barũ cueicueijei Simón Pedro

<sup>15</sup>Poxonae pana nain wetan xua Jesús pana apata, bapoxonae Simón Pedro, Jesús yainyaba, jeye:

—Simón, pon Juan pexantom, ¿bichocono neantobem, beyacaincha xua po pebiwe neantobe? jei.

—Aa, Tanecanamataxeinaem, bara caena bayatha neyaputaneme xua tacaantobewatsi bichocono, jei Pedro.

Jesús barai, jei:

—Icha neantobem, inta tamonaе tana nejume cowantsiwi yawende, icha pon ovejaxi pe-eenaеin ichi xua yawena ovejaxi, jei Jesús.

<sup>16</sup>Equeicha Jesús barai Pedrotha, jeye:

—Simón, pon Juan pexantom, ¿bichocono neantobem? jei.

—Aa, Tanecanamataxeinaem, bara caena bayatha neyaputaneme xua bichocono tacaantobewatsi, jei Pedro.

Jesús jume nota, jeye:

—Icha neantobem, inta tamonaе tana nejume cowantsiwi yawende, icha pon ovejamonaе pe-eenaеin ichi xua yawena ovejamonaе, jei Jesús.

<sup>17</sup>Equeicha acoibi po jume cuiyobe Jesús barai Pedrotha, jeye:

—Simón, pon Juan pexantom, ¿bichocono neantobem? jei.

Pedro jantũ coyene wecoyei yaitama Jesús yainyaba acoibi po jume cuiyobetha. Pedro jeye Jesustha:

—Tanecanamataxeinaem, bayatha caena daxita yaputaibame.

Matautano yaputanemeno xua tacaantobewatsi, jei Pedro.

Jesús jume nota, jeye:

—Icha neantobem, inta tamonaе pomonaе tana nejume cowantsiwi yawende, icha pon ovejamonaе pe-eenaеin ichi xua yawena ovejamonaе.

<sup>18</sup>Xaniyan catsipaebatsi poxonaе matha cataunxuaе pewowim jinya paparuwa bara jincoutha namaxatabeibame. Matautano matha bara poneibame xua ichaxota ba ichichipa neponaewa. Ichitha poxonaе perum tsane, ichamonaе camaxũ cubiya yotsina. Ichun paparuwa cama xatatsina. Ichamonaе camaxũ caponaena ichaxota jopa ichipaem xua neponaewa, jei Jesús.

<sup>19</sup>Poxonaе Jesús baxua paeba Pedro wunaе tsiwanaya cui yaputane exainchi xua jiwi eta bichi tsane poxonaе Pedro bexubinchi. Matautano Jesús tsiwanaya cui yaputane exana xua jiwi Nacom wunaе jainchinchí xua poxonaе jiwi taena xua po coyene cuirutha xua poxonaе Pedro tũpaena peexanaexaе pocotsiwa Nacom itoroba. Bapoxonaе Jesús jeye Pedrotha:

—iBara ataya yacuiya poponare xua tamonaе jitom! jei Jesús.

**Meje yabara poxonaе Jesús neyabara paeba  
ponxaein xua Jesús bichono neantobe**

<sup>20</sup>Poxonaе Pedro napatomeicha necota, bapoxonaе netaenota xua punauncuan ponxaein Jesús bichocono neantobe. Xan apara bapon pon bayatha matha imoxoyo Jesús caquita xunaecan, poxonaе matha jan:

“Tanecanamataxeinaem, ¿jintam pon cacaenaetapaeba?” ponxaein matha jan. <sup>21</sup>Poxonae Pedro netane, bapoxonae jeye Jesustha:

—Tanecanamataxeinaem, ¿incane ponje tsanerũ? jei Pedro.

<sup>22</sup>Jesús Pedro jume notatsi, jeye:

—Icha xan tacoutha ichichipan xua bapon Juan bara ataya asũ poponaena beya poxonae xua equeicha caewa patopeicaein po cae pin nacuathe, baxua jopa apara cata ainya cuiyo. Jamaisa xam bara ataya yacuiya poponde po coyene xua tamonaе jitom, jei Jesús.

<sup>23</sup>Daxota Jesús pijimonaе tatsi, barapomonaе neyabara tsiwũn capana pijimonaetha xua xan jopa tatũpaewa tsane. Ichitha Jesús jopa paebiyo xua jopa tatũpaewa tsane. Saya apara jei: “Icha xan tacoutha ichichipan xua bapon bara ataya asũ poponaena beya poxonae xua equeicha caewa patopeicaein po cae pin nacuathe, baxua jopa apara cata ainya cuiyo”, jei Jesús.

<sup>24</sup>Xan, Juan, ponxaein xua Jesús yabara paeban. Daxita pocotsiwa xua xuan paeban, apara pexainyeiwan. Matauta barapo diborothe xan apara tinan, pon Juan tsocuaein. Bara paichim daxita xua xuan tinan payaputanemerũ xua baxuan apara bara pexainyeiwan.

<sup>25</sup>Awiya cui yapu seica xua tayabara tinaewa pocotsiwa Jesús daxita exana. Icha daxita diwesin tsana yabara titiniyaetsipan pocotsiwa Jesús exana, metha barapo diboron jopa po cae pin nacue tsijuntutu canaũpaetsipaetsi.

Baja Juan.